

Tsutiarika

Naiti kemitiunetiarie

- ¹ Tsutiapai Kakaiyari muyuawi
meta kwie kaniutawewieni.
- ² Kwie puyuxamuriekai meta pakumawekai,
hapa 'ameukateewa yiriya penukanakai.
Kakaiyari 'iyarieya* haa heima
piyeyeikakai.
- ³ Hiki Kakaiyari mipai kaniutayini: «Hekiariya
ke'uneni».
'Ana hekiariya kaniuneni.
- ⁴ Kakaiyari hekiariya 'aixia katiniuxeiya,
'ana yiriyatsata kanipata.
- ⁵ Hekiariya «tukari» katiniuteriwa,
yiriyata «tikari».
Hiki kaniukiyire, ximerita kanayani,†
mexiakame tukari kanayani.
- ⁶ Kakaiyari mipai kaniutayini:
«'Amakuyewa ke'uneni haa hixiapa
ke'ipata haa taheima mieme meta kwiepa
mieme».
- ⁷ Mipai katiniuyini. Kakaiyari 'amakuyewa kani-
utawewieni,
mipataxianiki haa, tahetia mitamakaki,
taheimata muyemakaki.
- ⁸ 'Amakuyewa, Kakaiyari «muyuawi» katini-
uteriwa.

* 1:2 1:2 'iyari. Ya 'eka. † 1:5 1:5 tukari. Huriyutsixi wahet-
siemieme, xeitukari putsutiarie 'akayuneku tau, 'atsita 'uxa'arieka
'epauka.

Hiki kaniukuyire, ximerita kanayani,
Hutarieka tukari kanayani.

⁹ Hiki Kakaiyari mipai kaniutayini: «Haa
muyuawitia mitama
ke'uyukuxerieni 'axeikia,
'uwakiti ke'ayani».

Kemutayi mipai pitiiyi.

¹⁰ Muwaki «kwie» Kakaiyari katiniteriwa,
 haa muyukuxeiri «haramara» katiniteriwa.
 'Ixeiyati Kakaiyari «'Aixia pi'ane», kaniutayini.

¹¹ Hikita Kakaiyari mipai kaniutayini: «Ketiutineni kwiepa, ke'utineni tupiriyate yuhatsiyarite hexeiyati, 'iteirite yutakari kehexeiyatikani meta yuhatsiyarite.

Naiti xexuiti kemitiupitiarie».

Mipai katiniuyini.

¹² 'Ana katiniutineni naiti,
tupiriyate yuhatsiyari hexeyati,
kiiyexi yu'ikwaxi yuhatsiyari hexeyati kanayani,
naiti kemitiupitiarie.
Kakaiyari miki 'aixia katiniuxeiya.

¹³ Hiki kaniukuyire, ximerita kanayani, hairieka tukari kanayani.

14 Kakaɣari mɪpaɪta kaniutayini:
 «Meke'utixuawere muyuawitsie
 hekiariwiwamete,
 meke'ipata tukari tikari,
 miki 'iniari meke'akine
 taxarita, witarita, 'ahurakaku, xexerixa,
 tukari meta wiyari,

'iniariyari meke'akine.

- 15 Muyuawitsie meke'utimerikani,
kwiepata memihekiariwiekaki».

Mipai katiniuyini.

- 16 Kakaiyari hutame mamariwaweme
hekiariwiwamete kaniutiwewieni,
xeime 'anekame tau tukariki mieme,
xeimeta yaki tixawatime metseri tikariki mieme,
meta xurawetsixi tikariki miemete.

- 17 Kakaiyari hekiariwiwamete muyuawitsie ka-
tiniwarukayatsa
memihekiariwiekaki kwiepa.

- 18 Piwarutiwewi mime matsi waikawa
memimamariwaweniki tukariki tikariki,
hekiariya memipataniki.

Hiki Kakaiyari «'Aixia pi'ane», kaniutayini.

- 19 Hiki kaniukiyaire, ximerita kanayani.
Naurieka tukari kanayani.

- 20 Mipai kaniutayini Kakaiyari: «Yumiireti haapa
meketeye'uwani,
meketeheiwitikani wikixi kwie heima
muyuawi kemiyewa».

- 21 Hiki Kakaiyari katiniwarutiwewieni yunaime
metemamariwaweme haramaratsie
miemete,
meta yunaime memite'ayeneniere 'et-
simepepeti memikuyuatika memiyuxiitia
haata paiti,

meta yunaime memite'awiwawe,
yuxexuime kemitiwarupitia.

Hiki Kakaiyari 'aixia katiniwaruxeiya.

- 22 'Aixia kaniwaruyurieni mipai 'utaiti:
«Xekeneyuxiitia xekeneyumiiriyani,

xekenehineni haapa haramaratsie.
Wikixi meta xekeneyimiriyani kwiepa».

²³ Hiki kaniukuyire, ximerita kanayani,
'auxiwirieka tukari kanayani.

²⁴ Kakaiyari mipai kaniutayini: «Xekeneyimiriyani
kwiepa yunaiti xemayeyuyurini,
yunaiti memiteyutewatsinia, yeutari meta,
yuhukama memuku'uwa kwiepa, yunaime
kememiteheupaime».

Mipai pitiuyi.

²⁵ Kakaiyari yunaime katiniwarunetiani
memiteyutewatsinia,
yeutari, yunaime yuhukama memiteku'uwa,
yunaime kemitiwarupitia.

Kakaiyari mipai kaniutayini: «'Aixia pi'ane».

²⁶ Mipaita kaniutayini: «Tewi tepitawewieni
tahepai tiyuxexeiyaime tahepai
tiyikihaweme.

Pitiwata'aitiani ketsite haramaratsie miemete,
wikixi meta muyuawitsie miemete,
yunaime memiteyutewatsinia,
yeutari,[‡]

yunaime memika'ukiniwawe
yuhukama memuku'uwa kwiepa».

²⁷ Kakaiyari tewi kaniutawewieni yuhepai
'anekame,
pitawewi 'iniarieya mayaniki yuhepai
'anekame.

'Uki meta 'uka piwarutiwewi.

²⁸ 'Aixia kaniwaruyurieni mipai 'utaiti:

[‡] **1:26 1:26** yeutari (tsiriyatari waniuki), naitсарie kwiepa
(hepirayutsixi waniuki).

«Xekeneyuxiitiaka xekeneyimiiriyani,
 kwiepa xekenehineni xeketene'aitani.
 Xepihiritiarieni ketsite haramaratsie miemete,
 wikixi yunaime muyuawitsie miemete,
 yunaime memika'ukiniwawe yuhukama
 memuku'uwa kwiepa».

29 Mipaita katiniwarutahiawe: «Ne nepixeyetuiri
 kwiepa mieme 'iteirite,
 naime 'iteirite yuhatsiyari hexeiyakame,
 naime 'iteirite yutakari yuhatsiyari hexeiyakame.
 Miki naiti xe'ikwai pirayani.

30 Tupiriya nepixeyetuirieni, xe'ikwai mayaniki,
 yunaiti yeutari kwiepa memitexuawe,
 yunaiti wikixi muyuawitsie miemete
 yunaiti memeumaketika kwiepa».
 Kemitayi mipai pitiuyi.

31 Kakaiyari naime katiniuxeiya tita mitiutiwewi.
 «'Aixia pi'ane», kaniutayini.
 Hiki kaniukuyire, ximerita kanayani,
 'ataxewirieka tukari kanayani.

2

1 Mipai katiniutinirieni muyuawi,
 kwie meta naiti tita hetsiena mitixuawe.
 2 'Atahutarieka tukaritsie, Kakaiyari
 kaniuka'uxipieni,
 naime mitiutiniki yu'uximayatsika
 kemituyihawixi.
 3 Kakaiyari 'aixia kaniyurieni 'atahutarieka tukari
 hetsiena mieme mipatsiekaki,

'ana muka'uxipiki, naime yu'uximayatsika
tiutinika muyuawi meta kwie
kemituutawewi.

⁴ Kepauka mitiutiwewiya muyuawi meta kwie,
'iki pi'ixatsiyari.

'Arani meta 'Ewa

Kepauka Yawé Kakaiyari muyuawi meta kwie
mutiwewi,

⁵ 'ana 'akuxi 'iteirite pitiumawekai
pikatitinewekai tupiriyate. 'Ana 'akuxi wiyeri
Yawé Kakaiyari pikakuyuitiwakai, 'ana 'akuxi
'apika'uyeikakai tewi mitita'uximayataki.

⁶ Matsi kwiepa kaniti'ekekaitini 'aixi. Miki
naime kwie puyuniyakai.

⁷ Hiki Yawé Kakaiyari tewi kaniutawewieni
kwieki. Tsurieyatsie 'ihitsieka tukari kanipitiani
mayeniereniki muta'iweniki. 'Ana 'ayeyuriti tewi
kanayani.

⁸ Yawé Kakaiyari haraweri kaniutawewieni
'Ereni mirakutewatsie, tau manatineika hepatsie.
Tewi mutawewi muwa katiniuhiritiani.

⁹ Yawé Kakaiyari kanitinetiani mitiwereki
naime xexuime 'iteirite witsitiuxuxuawereme
'aixia 'aneneme kwaiyari. Haraweri hixiapa
'iteiri tukari tiyupitiwame kaniutinetiani, xeimeta
'iteiri putinetia mitimaikakai tita 'aixia miti'ane tita
'axamiti'ane.

¹⁰ 'Ereni payeneikakai hatuxame mariweti
pi'ipakai harawerita, manata nauka 'akiyarite
puhapanekai pitihatuiyakai harawerita.

¹¹ Mexiakame pititewakai Pitsuni, naitsarie
puyehanekai Kawira mirakutewatsie hakewa
huru maxuawekaitsie.

¹² Huru 'aixia pi'ane 'iya kwieyaritsie mieme. Puxuaweta xetsina witsi' aneti, puxuaweta 'unitse teteyari mutuxa.

¹³ Hutarieka mieme haa pititewakai Kikuni miki Kutsi kwieyaritsie 'aurie kananakuneka naitserie.

¹⁴ Hairieka mieme haa, Tikiritsi pititewakai miki 'Atsiriya tserieta puyehane. Naurieka mieme 'Eupirate hatuxameyari pihiki.

¹⁵ Merikitsi Yawé Kakaiyari tewi kaniuhiritiani haraweri 'Ereni miti'uximayakaki, miti'iwiyani.

¹⁶ Yawé Kakaiyari kanihiritiani mipai rehiaweti: «Ketinekwaka naime 'ikwaxi harawerita mieme.

¹⁷ Peru miki 'iteiri xeikia, tewi xika 'itikwani 'ikwaxiyari miki tewi pitetimoni tita 'aixia miti'ane tita 'axamiti'ane, miki 'iteiri 'ikwaxiyari pepikakwaka. Mexika pe'itikwani, 'ana pepimini».

¹⁸ Hikita Yawé Kakaiyari mipai kaniutayini: «'Aixia pika'ane, 'uki yuxaita muyeikaniki. Peiyehiwa yuteitame. Nepitawewirieni 'iparewiwame hetsiena mieme».

¹⁹ Yawé Kakaiyari katiniwarunetiani 'ena kwiepa yunaime memite'awiwawe meta yunaime yeutari, hiki Kakaiyari 'uki hetsia kaniwa'atiani muwatiteriwa yuxexuime. 'Uki kaniwarutiteriwa yunaime kememiteheupaime, hiki mipai mepitematiwa.

²⁰ Mipai 'ana tewi kaniwarutiteriwa yunaime keyupaimeti memitexiawe memiteyutewatsinia, yunaime memite'awiwawe, yunaime yeutari. Matsi miki nixewiti tewi parewiwameya yemeki pika'atia.

21 Hiki Yawé Kakaiyari 'uki heukutiaka, waikawa kutsukaku kaniwakuhana 'akieya, hutariekata waiyarieya kaneunani.

22 Miki 'uki 'akieyaki, Yawé Kakaiyari 'uka kani-utawewieni, hiki 'uki kani'atirieni.

23 'Arani 'uka xeiyaṭi mipai kaniutayini:
«'Iki hirixia waiyarieya newaiyaritsie pumieme,
'umeyarieyata ne'umeyaritsie pumieme.
“Uka” katinitewakamiki
'uki waiyarieyaki mutawewiyaki».

24 Mipai mitiuyiki, 'ayumieme 'uki kaniyupatamiki yupaapa yumaama wahetsia kaniyeyeimiki, yi'ia hamatia mekaniyu-taxewirikuni meyunaki'erietī, xeiwaiyari mekanakinikuni.

25 Hiki 'uki meta 'uka mepumamawekai mepikayutetewiyakai.

3

Tewi kemitiu'irīwiyarie

1 Kuu, kwinimieme katinimaiwekaitini keyuri hipati yeutari Yawé Kakaiyari muwarutawewiekai, hiki 'uka mipai pitiuta'iwawiyaxi:

—¿Kakaiyari mipai pikahainekai xiari kename xeka'ikwaka naime 'ikwaxi harawerita mieme?

2 'Uka mipai katinita'eiya:

—Tepiyiwawe naime 'ikwaxi temitikwaniki.

3 Miki xeikia 'iteiri 'ikwaxiyari haraweri hixiapa muwe, tepikayiwawe temitikwaniki Kakaiyari pitarahiawekai kename teka'ikwakakekai 'ikwaxi miki 'iteiritsiemieme, xika te'itikwani tepikwini.

4 Kuu 'uka mipai kaniutahiawe:

—Tixai xepikakwini.

⁵ Kakaïyari katinimaika kepauka xemitikwani miki 'ikwaxi, kwinimieme xetemaiwaweti xepakine, xepitemaika tita 'aixia miti'ane, tita 'axamiti'ane, Kakaïyari hepai xepi'aneneni.

⁶ Hiki 'uka miki 'ikwaxi witsi'ane kame kani-uxeiya kanitihiwe'erieni mitakwaniki, timaiweti mayaniki. Hiki kaneka'inini kanitakwani. Kwitita yikina kaniumini mikita kanitakwani.

⁷ 'Ana kwiti mekananutanenieme yuhutati 'arike mipai mepitehetima mepimamawekai, hiki piní xawariki petsera mekaniyutiwewirieni memuyutetewiyakaiki.

⁸ 'Uki yi'ia hamatia mekani'enieni Yawé Kakaïyari harawerita 'uyeikame taikai 'ekatsie, hiki mekaniyuti'awieta memimamawekaiki 'iteiritsata harawerita.

⁹ Peru Yawé Kakaïyari 'uki kaniutahiawe mipai 'utaiti:

—¿Hakewa pepeyeika?

¹⁰ 'Uki mipai kaniutayini:

—Nepimatsi'u'eni 'uwa pe'uyeikame nepimatsi'utimaka nemimawekaiki, 'ayumieme nepiyuti'awietaxi.

¹¹ Hiki Kakaïyari mipai kaniutayini:

—¿Kemi'ane mipai matiutahiawixi kename pemawekai? Miki 'ikwaxi nemixemaiwe'erikatsitiakai xekate'utikwai.

¹² 'Uki mipai kaniutayini:

—Miki 'uka peminetsi'uwititia, pinetsi'umi nepi-takwai.

¹³ Hiki Yawé Kakaïyari 'uka mipai katiniuta'iwawiya:

—'Uka 'aku kepetiuyuri.

'Uka mipai kaniutayini:

—Kuu pinetiu'iriwiyaxi 'ayumieme 'ikwaxi nep-
utakwai.

¹⁴ Yawé Kakaɣyari 'ayumieme kuu mipai katini-
utahiawe:

«Kuu 'aku 'axapepituiyuri,

Yeuta kiekatari watsata pe'uyeikati,

'axapekani'itiariekamiki.

'Ayumieme 'ahukama pepukuyeikani,

tumuanari pekwati yuheyemeki.

¹⁵ 'Eki kuu 'ukamatia xepayuye'unieka,

meta 'aniwema 'uka niwemama wahamatia,

'uka nu'aya xewiti pumatikwinitiani 'amu'utsie,

'ekita pepitikwinitiani keputsayatsie».

¹⁶ Meta 'uka mipai katiniutahiawe:

«Kukuiniya nepitimiiriya kepauka

pemitiniweyanitsie,

matsi 'akina pepinaki'erieka,

miki mati'aitiwame payani».

¹⁷ 'Uki meta mipai katiniutahiawe:

«'Uki 'aku 'Arani,

'ekitsi pepenu'eni 'a'iya, pepitakwai 'ikwaxi,

miki kiyetsie mieme tsepa mipai nematiu-

tahiawixi pemika'ikwakaki.

'Ayumieme kwie 'axakani'itiariekamiki mipai

pemituiyuriki,

haweri mieme peti'uximayati xeikia

pepitikwaka kwiepa mieme, mexi

'ape'uyeikani.

¹⁸ Kwie kanitinetiamiki xuya 'ahetsiemieme,

yeuta mitiutixuxuawereni 'a'ikwai payeikani.

19 Tukariki peti'uximayati pekwaxiyati 'a'ikwaite
 pekatinexeiyakamiki,
 mexi kwiepa pekanuaweni,
 hakewa pemetawewiya.

Tumuanari pekanihikitini,
 hutarieka pekaninuamiki tumuanari
 pemayaniki».

20 'Uki yu'iya 'Ewa pitiuteriwaxi, miki yunaime
 nuiwarite wamaama mayanikekaiki.*

21 Yawé Kakaïyari puwarutiwewiri nawi
 kamixayari 'Arani meta 'iyaya, mikiki
 puwarutikemaritia.

22 Hiki Yawé mipai kaniutayini: «Hikiri 'uki meta
 'uka tahepai mekani'aneneni, metemaiti tita 'aixia
 miti'ane tita 'axamiti'ane, xika me'itikwani 'ik-
 waxi tukari mitiyupitiwa, mepiyiwaweni yuheyey-
 meki me'ayeyuyuriti memuyuhayewaniki».

23 'Ayumieme Yawé Kakaïyari kani-
 waranuyeweiya teiteri 'Ereni haraweriyarita,
 kaniwarupitiani memite'uximayakaki kwiepa,
 'Arani kwieki mutawewiyaki.

24 Waranuyeweiya, haraweri 'Ereni tau
 manatineika hepatsie Kakaïyari teitametemama
 memayeneniere meta xeime 'ixipara takame
 naitsarie 'uyuaneme, huye mi'iwiyaniki kiye
 tukari tiyupitiwame hetsia meutayune.

4

Kahini meta 'Aweri

* 3:20 3:20 Hepirayuki 'Ewa, Tukari panuyine.

¹ 'Arani yu'iya 'Ewa hamatia xeime nunutsi mekanayexeiya Kahini katiniteriwa. Mipai kaniutayini 'Ewa: «Yawé netsiparewiekaku nunutsi 'ukitime nepayexei».

² 'Ariketa hutarieka 'Aweri kanayexeiya, Kahini mutaya. 'Aweri muxatsi wahiweme kanayani, meta Kahini kwiepa ti'uximayatame patia.

³ Miixa tukari 'anuyeyaku Kahini Yawé katiniutimawirieni tita kwiepa mitiuka'e.

⁴ 'Aweri kani'atianita Yawé hetsiemieme muxa 'aixia mi'ane matari mieme muwaiya mawari mayaniki, Yawé 'Aweri 'aixia katiniuxeiya meta mawarieya pinakixi,

⁵ peru Kahini mipai pikatiuxei meta mawarieya pika'inakixi. 'Ayumieme Kahini kaniuyeha'ani, yu'uximatati 'aniuyeikakaitini.

⁶ Hiki Yawé mipai katinitahawe: «¿Titayari kwinimieme petiha'a? ¿Titayari peti'uxiwa'a petitihiximawe?

⁷ Xika 'aixia petiyurienenike heitserie pekanatinierenikeyu. Xika 'aixia pekatiyurieneni, 'axami'ane kamenihupieka metsiwiwake tiyukwa'ame hepai. Peru 'eki pekaniiweni peme'iwa».

⁸ Hiki Kahini yumuta 'Aweri hamatia katiniutixata. Kepauka yeuta yuxaita memu'uwakai, Kahini yumuta kaniumieni.

⁹ Hiki Yawé Kahini mipai katiniuta'iwawiya:

—¿Hakewari 'a'iwa 'Aweri?

Kahini mipai kaniutayini:

—Nepikatitude. ¿Nekuta ne'iwa neti'iwiyame?

¹⁰ Yawé mipai katinitahawe:

—Kepetiuyuri. 'A'iwa xuriyaya kwiepa kumati kanahiواني ne kename 'aixia neketiuyurieni.

¹¹ 'Ayumieme 'axapepi'itiarieka kwie hepaitisita, 'a'iwa xuriyaya muta'itsiki, 'eki pemitayeuri.

¹² Kepauka kwiepa pemika'eni, pikatiutixuxuawereni, kwiepa pepuyeikani peyuku'unaneti.

¹³ Kahini Yawé mipai katiniutahiawe:

—Kwinimiemeri pepinetikwinitia nepikayiwari neminewieka.

¹⁴ Hiki pepinetsi'ayewei, tawarita 'ahixie nepika'uyeikani. 'Ena kwiepa nepuyeikani neyuku'awietaneti yu'uname hepai, xewiti xika netsihanukunake pinetsihemieni.

¹⁵ Yawé mipai katinita'eiya:

—Mipai pepikaranuyeyani. Kemi'ane Kahini mimieni, katinikwinitiarieiki 'atahutamexia. Hiki Yawé Kahini kaniu'iniairitiani, kemi'ane menukunake mika'ikumemiwaniki.

¹⁶ 'Ana Kahini Yawé kaniuku'eirieni, Nuri kwieyaritsie kaneyani, 'Ereni makuma tau manatineika hepatsie.

¹⁷ Kahini yu'iya hamatia xeime nunutsi kanayexeiya 'Enuki katiniteriwa. Kahini kiekari kanikamaximekaitini, 'Enuki katiniteriwa yuniwe hepai.

¹⁸ 'Enuki xeimeta yuniwe kanayexeiya 'Irari katiniteriwa, miki pupaapayatikai Mekuyaheri. Mikita pupaapayatikai Metutsaheri, Metutsaherita pupaapayatikai Rameki.

¹⁹ Rameki yuhutame puwarutiwiti. Xewiti pititewakai 'Ara meta Tsira.

20 'Ara Kawari titewakame kanayexeiya, miki 'ixuriki kiiyari memukii meta wakaitsixi memiwaxiitia watutsi kanayani.

21 Kawari yumuta pexeyakai Kuwari titewakame, miki haripaki meta pirikixaki memiteyuitiawawe watutsi patia.

22 Tsira meta Tuwari-Kahini kanayexeiya, tepia tsuname kanayani meta purunitseki tiwewiwame meta tepiaki. Tuwari-Kahini xeime yutaru 'ukatime kanexeyakaitini Nuhamatitewakame.

23 Rameki mipai katiniwarutahiawe yu'itama 'Ara meta Tsira:

«Xekeneu'enana 'ukari Rameki 'iitamama.

Xekeneu'eni neniuki.

Xeime nepumi tewi

netiukwinitiaaku,

xeimetatsiere temaiki netsihetamieku.

24 Xika kemi'ane Kahini mimieni 'atahutamexia tikwinitiarieiki,

matsi kemi'ane Rameki mimieni haika tewiyari heimana tamamata heimana 'atahutamexia katinikwinitiarieiki».

25 'Arani hairiekata yi'iya matia xeime nunutsi mekanayexeiya, Tseti katiniteriwa, mipai 'utayika: «Kakaiyari pitatsi'upitia xeimeta nunutsi temayexeyaki, 'Aweri hetsiemieme, Kahini mimiekaiki».

26 Tseti xeimeta yuniwe kanayexeiya 'Enuxi katiniteriwa. Hiki mana mekanitsutiani teiteri Yawé mehahaweti kemititewa.

5

'Arani nuiwarimama

1 'Tki 'Arani nuiwarimama mekanihikitini.

Kepauka Kakaiyari tewi mutawewi, yuhapai 'aneme putawewi.

² 'Uki 'uka puwarutiwewi, meta 'aixia kaniwaruyurieni. Kepauka muwarutiwewi «teiteri».*

³ Kepauka 'Arani xeitsienituyari heimana xeitewiyari heimana tamamata wiyari mexeyakai, xeimeta kaniutinuarieni yuhapai 'anekame yuhapai tiyuxexeiyame, Tseti katiniteriwa.

⁴ Tseti 'utinuiwaku, 'Arani kaniuyurieni 'atahaika tsienituyari wiyari, warayexeiyaka tawarita 'ukitsi meta 'ukari.

⁵ 'Arani kaniumini 'atanauka tsienituyari heimana xeitewiyari heimana tamamata wiyari hexeyati.

⁶ Tseti pexeiyakai xeitsienituyari heimana 'auxiwime wiyari kepauka 'Enuxi mayexei.

⁷ 'Utinuiwaku 'Enuxi, Tseti kaniuyurieni 'atahaika tsienituyari heimana 'atahuta wiyari, warayexeiyaka tawarita 'ukitsi meta 'ukari.

⁸ Tseti kaniumini 'atanauka tsienituyari heimana tamamata heimana huta wiyari hexeyati.

⁹ 'Enuxi pexeiyakai nauka tewiyari heimana tamamata wiyari kepauka Kainahani mayexei.

¹⁰ Kainahani 'utinuiwaku, 'Enuxi kaniuyurieni 'atahaika tsienituyari heimana tamamata heimana 'auxiwime wiyari, warayexeiyaka tawarita 'ukitsi 'ukari.

¹¹ 'Enuxi kaniumini 'atanauka tsienituyari heimana 'auxiwime wiyari hexeyati.

* 5:2 5:2 teiteri. Hepirayuki 'Arani meta teiteri panuyine.

12 Kainahani pexeyakai haika tewiyari heimana tamamata wiyari kepauka Marareri mayexei.

13 Marareri 'utinuiwaku, Kainahani kaniuyurieni 'atahaika tsienituyari heimana huta tewiyari wiyari, tawarita warayexeyaka 'ukitsi 'ukari.

14 Kainahani kaniumi 'atanauka tsienituyari heimana tamamata wiyari hexeyati.

15 Marareri pexeyakai haika tewiyari heimana 'auxiwime wiyari kepauka Kareri mayexei.

16 Kareri 'utinuiwaku, Marareri kaniuyurieni 'atahaika tsienituyari heimana xetewiyari heimana tamamata wiyari, tawarita warayexeyaka 'ukitsi 'ukari.

17 Marareri kaniumi 'atahaika tsienituyari heimana nauka tewiyari heimana tamamata heimana 'auxiwime (895) wiyari hexeyati.

18 Kareri pexeyakai xeitsienituyari heimana haika tewiyari heimana huta wiyari kepauka 'Enuki mayexei.

19 'Utinuiwaku 'Enuki, Kareri kaniutihuni 'atahaika tsienituyari wiyari, tawarita warayexeyaka 'ukitsi 'ukari.

20 Kareri kaniumi 'atanauka tsienituyari heimana haika tewiyari heimana huta (962) wiyari hexeyati.

21 'Enuki pexeyakai haika tewiyari heimana 'auxiwime wiyari kepauka Matutsareni mayexei.

22 'Utinuiwaku Matutsareni, 'Enuki Kakaiyari hamatia 'aixia pitiuyeikakai haika tsienituyari wiyari, tawarita hipame piwarayexei 'ukitsi 'ukari.

23 'Enuki kaniuyurieni haika tsienituyari heimana haika tewiyari heimana 'auxiwime wiyari,

24 'aixia mitiyurienekaiki Kakaiyari hamatia, kaniutatimaiyarieni Kakaiyari meiwitiki.

25 Matutsareni pexeyakai xeitsienituyari heimana nauka tewiyari heimana 'atahuta wiyari kepauka Rameki mayexei.

26 'Utinuiwaku Rameki, Matutsareni kaniuyurieni 'atahuta tsienituyari heimana nauka tewiyari heimana huta wiyari, tawarita warayexeyaka 'ukitsi 'ukari.

27 Matutsareni kaniumini, 'atanauka tsienituyari heimana haika tewiyari heimana 'atanauka (969) wiyari hexeyati.

28 Rameki pexeyakai xeitsienituyari heimana nauka tewiyari heimana huta wiyari kepauka Nuhexi mayexei.

29 Rameki Nuhexi pititeriwaxi mipai mutayiki: «'Iki nunutsi pitatsika'uxipitiani ketemite'uximaya tete'uka'eniwati meta ketemite'uximaya kwiepa Yawé 'axa'iyurieku».

30 Nuhexi 'utinuiwaku, Rameki kaniuyurieni 'auxiwime tsienituyari heimana nauka tewiyari heimana tamamata heimana 'auxiwime (595) wiyari, tawarita warayexeyaka 'ukitsi 'ukari.

31 Rameki kaniumini 'atahuta tsienituyari heimana haika tewiyari heimana tamamata heimana 'atahuta (777) wiyari hexeyati.

32 Nuhexi peixeyakai 'auxiwime tsienituyari wiyari kepauka Tsemi, Kami, Kapeti, muwapaa-patikai.

6

Teiteri 'axakememite'uyuri

¹ Merikitsi kepauka teiteri memutamirixi kwiepa meta 'ukari memiwarayexei,

² Kakaiyari niwemama mekaniwaruxeiya teiteri waniwema witsimemite'imarixitakai, hiki mekaniwarutiwitini kemi'ane memiwarutihiwe'eri.

³ Hiki Yawé mipai kaniutayini: «'Ari ne'iyari tewi hetsie pikayekani, tewi mimiwe xeikia kanihikitini, xeitsienituyari heimana xeitewiyari wiyari xeikia puyuruwani».

⁴ Kepauka Kakaiyari niwemama teiteri waniwema memiwarutiwiti, tiri kwinimieme me'utitime mekaniwarayexeiya, kwinimieme mete'ayu'iwati mekanakine meripaiti. Mana mitiyetia kwinimieme me'utiti mekaniutixu-awere kwiepa.

⁵ Hiki Yawé niereti teiteri ke'axa kwinimieme memiteyuriekai, 'axamiti'ane hetsie xeikia memiyikihawekaiki,

⁶ kaniuta'iyarixieni titayari kwiepa tewi mitiutawewiekai, hiki 'iyarieyatsie neikwine.

⁷ 'Ayumieme Yawé mipai kaniutayini: «Tewi kwiepa nemitawewi nekanekumaweriyamiki, yaxeikiata nekatiniyurimiki yeutari wahetsie, kuterixi meta memite'awiwawe. ¿Titayari netiwarutawewi?»

⁸ Matsi Yawé Nuhexi kanixeyakaitini, kani-nakekaitini ke'aixia mitiuyeikakai.

Kememite'utihautsitarie

⁹ 'Iki Nuhexi kemuyi pi'ixatsiyari.

Nuhexi 'aixia katiniuka'iyarikaitini, yakatinikamiekaitini yuteiterima wahamatia. Kakaiyari hetsiemieme 'aixia katiniuyeikakaitini.

¹⁰ Yuniwema yuhaikame kaniwarayexeiya: Tsemi, Kami meta Kapeti.

¹¹ Kakaiyari kaniuniere kwiepa 'axamiti'ane kemitixuawekai, teiteri kememiteyunanaimakai.

¹² Kakaiyari 'uniereka kwiepa kwinimiemi matsi 'axamiti'ane muxuawekaiki teiteri wahet-sie,

¹³ Nuhexi mipai katiniutahiawe: «Teiteri nekaniwatayuniyamiki, miki meteyuriekaku kwiepa 'axamiti'ane kwinimieme katinixuaweni. 'Ayumieme teiteri nekaniwareuyehiamiki meta kwie naime.

¹⁴ Kiye maye'utsiya kanuwayari keneutawewi 'apakame, 'uyewaikawame kenayeitia, kwetsika miyiwiki kenewakuwiri taitana meta herie.

¹⁵ Mipai pakame: xeitsienituyari heimana huta tewiyari meturuyari 'ayetewime, xeitewiyari heimana haika meturuyari 'atayeukame, tamamata heimana nauka meturuyari heutitewame.

¹⁶ Kii yuheima haikakia manawewiya hepai mipai paimeme hexeyakame keneutawewi, meriumeturuyari heutitewame 'axawatikaime 'anakunekame yukanamiki hetia meta yu'etsata yu'itupari hexeyakame.

¹⁷ Ne haa waikawa nekanani'amiki kwiepa, yunaiti memitekwiniki kwiepa memite'u'uwa memite'ayeneniere.

¹⁸ Peru 'eki hamatia ne tiratu tepexeiyani, kanuwa 'amitimariwetsie xekaneutahaxiakuni

'eki meta 'aniwema, 'a'iya meta 'amu'e'ema.

¹⁹ Ketiniwareuta'ina kanuwa 'amitimariwetsie yuhuhutame yunaime kwiepa memite'u'uwa memite'ayeneniere, 'uki 'uka mame xeikia, yunaime memitexuawe.

²⁰ 'Ahamatia mekaneutahaxiakuni yuhuhutati memite'awiwawe, tewaxi meta yeutari, kuterixi, memitawikweniki.

²¹ Meta waikawa 'ikwaite ketinekuwawa ketineuta'ina, 'ahetsiemieme meta tewaxi wahetsiemieme, xemitekwakaki».

²² Hiki Nuhexi mipai katiniuyurieni, Kakaiyari kemitita'aitia.

7

¹ Hiki Yawé Nuhexi mipai katiniutahiawe: «'Eki xeikia 'aixia pekatiniuka'iyarini 'ena pemuyeika, kanuwa 'amitimariwetsie keneutahaki 'atiiriyama xeyunaiti.

² Yunaime tewaxi mawariyari meminaki'eriwa, keniwareuta'ina me'atahutame 'ukitsi meta 'ukari, yeutari 'aixia memika'anene mawariyari yuxexuime 'ukitsi meta 'ukari.

³ Memite'awiwaweta yunaime me'atahutame, 'ukitsi meta 'ukari, memikaheuyewautseniki 'ena kwiepa.

⁴ Kariki 'atahutarieka tukari 'aye'ayu, wiyeri nekaniyuitiamiki 'ena kwiepa mikawiyeki huta tewiyari tukari meta tikariki, mipai nekatiniwarakumaweriyamiki kwiepa memitama nemiwarutawewi».

⁵ Nuhexi naime yakatiniuyurieni Yawé kemitita'aitia.

⁶ 'Ataxewime tsienituyari wiyari pexeyakai Nuhexi, kepauka mītiutihauritixi.

⁷ Hiki kaneutahani kanuwa 'amītimariwetsie niwemama yunaiti, 'iyaya meta mu'e'emama, meyutawikweitsitianike mītitihauritikekaiki.

⁸ Yunaiti tewatsiekate memimawariwa meta memikamawariwa yeutari, memite'awiwawe meta kuterixi,

⁹ mekaneutahaxiani Nuhexi hamatia yuhuhutati meheuyuti'iwatikaiti 'uki 'uka, Kakaiyari kemira'aitakai.

¹⁰ 'Atahutarieka tukari 'anukayaku, wiyeri kanitsutiani kwiepa memitihaunitsie mieme.

¹¹ Kepauka Nuhexi 'ataxewime tsienituyari wiyari mexeyakai, hutarieka metseriyaritsie tamamata heimana 'atahuta tukariyaritsie, 'ana haramaratsie haa patinexia, muyuawitsie pīreuyepierixia mikawiyeki.

¹² Huta tewiyari tukari meta tikari kaniwiyekaitini kwiepa.

¹³ Miki tukaritsie Nuhexi kanuwatsie mekaneutahaxiani, niwemama Tsemi, Kami meta Kapeti, Nuhexi 'iyaya meta mu'e'emama yuhaikati.

¹⁴ Wahamatia mekaneutahaxiani yunaiti yeutari meta tewaxi, kuterixi metatsiere memite'awiwawe.

¹⁵ Mipai mekateneutahaxiani kanuwa 'amītimariwetsie Nuhexi hamatia yunaiti meheuyuti'iwatikaiti kwiepa memitexuawe,

¹⁶ yunaiti memitexuawe yiki mete'ananeti, mekaneutahaxiani meheuyutiniti 'uki 'uka, Kakaiyari Nuhexi kemira'aitiwakai. Hiki Yawé 'ana katineunani kitenie kanuwatsie.

17 Hiki karima kaniwiyekaitini huta tewiyari tukari. Kepauka haa muwayenexia kanuwa 'amitimariwe kananuyewiere kwie heima.

18 Hiki matsi haa waikawa kanewayenetikateitini haa kanitimiekaitini, kanuwata kananuyewiekaitini hetsiena.

19 Waikawa haa kanitiyani hiri 'amanutititi kwiepa meutitekai naime kaneuyunitiaxiani.

20 Hiri heima 'atahuta meturuyari kuxi haa kanitiyani.

21 Mipai mekateneuyehiiyani kwiepa memite'u'uwakai: memite'awiwawe, yeutari, tewaxi, kuterixi, metatsiere teiteri.

22 Yunaiti mekatenukwini kwiepa memite'u'uwakai, yunaiti memite'ayeyuyurikai.

23 Kakaiyari kwiepa katiniwarakuyeitiani yunaime memite'u'uwakai, teiteri meta tewaxi meta yeutari, kuterixi, meta memite'awiwawe meteyunaime. Yunaiti mekatenukuyeituarieni kwiepa memi'u'uwakai. Nuhexi xeikia mekaniuyuhayewa meta kemi'ane hamatiana memiyetekai kanuwa 'amitimariwetsie.

24 Xeitsienituyari heimana huta tewiyari heimana tamamata tukari kwie kaneuyunekaitini.

8

1 Merikitsi Kakaiyari Nuhexi kanaye'erien meta yeutari, tewaxi hamatiana memiyetekai kanuwatsie. 'Eka kaniuyuitiani, waikawa tirikaiyeti kaniuku'eka, 'ana haa kanitsutiani 'etsiwa kawaximeti.

² Haramara tetiata haa matineikakai kane-unarixiani, muyuawitsieta katineunarixiani, wiyerita katiniuhayewa.

³ Haa kanikawaximekaitini 'aniari kwiepa. Xeitsienituyari heimana huta tewiyari heimana tamamata tukari heutineku, haa waikawa kanikawaximekaitini.

⁴ 'Atahuta metseritsie tamamata heimana 'atahuta tukaritsie kanuwa kananutateni 'Ararati hiriyaritsie.

⁵ Haa tsieti kanikamiekaitini, tamamata met-seritsie mexiakame tukaritsie waikawa hiri peti-hekiarixia.

⁶ Huta tewiyari tukari 'aye'aku, Nuhexi 'itupari 'etsimiyewa kaneuyepieni kanuwa 'amitimariwe kanamikieyatsie mewewiekai,

⁷ hiki kwatsa kaniutatuani, miki mana xeikia kaniuwietiyekakaitini, 'ikwewieti haa mikawaniki.

⁸ Tawarita kukuru meutuxa kaniutatuani, timaimiti xika'akuri haa waikawa kawatiyani.

⁹ Kukuru kaninuani kanuwatsie memawekaiki hakewatsi heka'uxipieni haa 'akuxi kwie manukanakaiki. Nuhexi yumama kaneutatsera, 'enutuka mana kanuwatsie kaneitatuani.

¹⁰ Tawarita 'atahuta tukari 'anukayaku, hutariekata kukuru kaniutatuani.

¹¹ Kiyirimekaku kukuru kaninuani, yuyekarauki huriwa yirariyari 'atiti hekwame yurime. 'Anari Nuhexi mipai katinetimani kename haa kawatiyakai kwieri hahekiakai.

¹² Tawarita 'atahuta tukari kanikakwewieni, hairiekari kukuru kaneni'ani, 'anari kukuru pikanua.

¹³ 'Ataxewime tsienituyari heimana xewi wi-

yari pexeyakai Nuhexi kepauka haa mukawa. Mexiakame metseriyaritsie mexiakame tukaritsie Nuhexi kanuwa 'amitimariwe kanamikieya kananutiyepieni meta kwie miwakini hepai katinixeyakaitini.

¹⁴ Hutarieka metseritsie xetewiyari heimana 'atahuta tukaritsie, kwieri waikawa kaniwakikaitini.

¹⁵ 'Anari Kakaiyari Nuhexi mipai katiniutahiawe:

¹⁶ «Kanuwatsie kenanayeye'ari 'atiri yama, 'a'iya, 'amu'e'ema yunaiti.

¹⁷ Yaxeikiata keniwaranaye'ari 'ahamatia memiteye'inekai: memite'awiwawe, tewaxi meta kuterixi. Mekeyumi iriyani, mekeyuxitiaka, kwiepa mekehineni».

¹⁸ Hiki kanuwatsie mekananayekine, Nuhexi meta niwemama, 'iyaya meta mu'e'emama.

¹⁹ Mekatenanayekineta yunaiti: tewaxi, memite'awiwawe, metatsiere yunaiti kuterixi, meta kwiepa memitexuawe yuxexuiti yiki memite'anene.

²⁰ Hiki Nuhexi mawari tenutsariyari kaniutawewieni Yawé hetsiemieme, mana katiniwarutitaiya tewaxi memimawariwa meta memite'awiwawe memimawariwa.

²¹ Kepauka Yawé 'iakariyari witsimu'ia mu'ukwixi mipai katiniuyuhawe:

«Tsepa teiteri tiri yari paiti 'axamemiteyurie, tawarita kwie 'axanepikayurieni tewi ya'ane wiwiekaku. Metatsiere hatsuakuri nepikatiwakwini kwiepa memitexiawe, hiki kenemitiyuri.

²² »Mexi'akuxi kwie 'atsikayiwe,

pitiuka'etsitireni pitiuka'itsanatireni,
 Xexerixa payeikani meta pukuxixireni,
 witarita payeikani meta taxarita,
 pukuhekikiareni meta pukuyiyireni».

9

Kakaiyari tiratu kemituwewi Nuhexi hamatia

¹ Kakaiyari Nuhexi 'aixia kaniuyurieni meta niwemama mipai 'utaiti: «Xekeneyuxiitiaka, xekeneyumiiriyani kwiepa xekenehineni.

² Yunaiti kwiepa memitexuawe mepitexemakaxeni: memite'awiwawe, yeutari, kuterixi, ketsite haramaratsie memiteye'uwa. Yunaimexepitewata'aitiani.

³ Yunaiti memitekuyuatika memite'ayeneniere meta mititsitsirawi tupiriyate xe'ikwaite katinayeimiki. Ne naimexiki nekatnixeyetuirieka.

⁴ Peru xekia 'ayeniereme xepikakwa'ani, wai 'ayexureme nekanixatani xuriyatsie tukari muxuaweki.

⁵ Yurikitsi xuriyaki nekatnixetawawiriemiki. Yunaimexyeutari yunaimexeteiteri kememuyuyurieka nekaniwaxeiyakamiki.

⁶ »Xika xewiti tewi xuriyaya 'utayeurieni, mikita xewiti tewi kanimiemiki, tewi mutawewiyaki

Kakaiyari hepai 'aneti.

⁷ »Xeme matsi xekeneyumiiriyani, xekeneyuxiitiaka, kwiepa xekenehineni».

⁸ Tawarita Kakaiyari Nuhexi meta niwemama katiniwarutaxatiani, mipai katiniwarutahiawe:

⁹ «Ne tiratu nepiwewieni xehetsie, xexiixarimata wahetsie,

10 meta yunaime xehamatia memite'u'uwa wahamatia, tatsiari yunaiti kwiepa memitexuawe kanuwatsie memiyetekai: memite'awiwawe, tewaxi meta yeutari.

11 'Iki netiratu kanihikitini: Tawarita teiteri mepikaheuyehiyani wiyeriki, tawariri pikatitihauriti yunaime mitiwareuyehipaki».

12 Tawarita Kakaiyari mipai kaniutayini: «Tiratu 'iniariyari nepixexeitsitiani yuheyemeki xehetsiemieme meta yunaime xehamatia memite'u'uwa memite'ayeneniere:

13 Haiwitiritsie nekuwiwi nekaniuyeteni, miki kani'iniaritikamiki kwie hamatia tiratu kenemituwwewi.

14 Kepauka kwiepa haiwitiri nemanuni'ani, hetsiena xika nekuwiwi 'uyehuni,

15 nepaye'erieni tiratu kenemituwwewi xehamatia meta yunaime kwiepa memitexuawe wahamatia. Hatsuakuri waikawa pikakawiye mitiwareuyehianiki memitekwiwawe.

16 Kepauka nekuwiwi haiwitiritsie manutahuni, ne ne'ixeyame nepaye'erieni tiratu kenemituwwewi yuheyemeki xehamatia meta yunaime kwiepa memitexuawe wahamatia».

17 Kakaiyari katinanunini Nuhexi mipai tikihiaweti: «'Iki kanihikitini tiratu nemuwewi yunaime kwiepatari wahetsiemieme».

Nuhexi niwemama

18 Nuhexi niwemama kanuwatsie memanayeki mekanihikitikaitini: Tsemi, Kami meta Kapeti. Miki Kami xeime payexei yuniwe Kanani titewakame.

19 'Tki meyuhaikatı Nuhexi niwemama kiekari mepukama naitserie kwiepa.

20 Hiki Nuhexi kwiepa kaniuti'etiyani, meta kaxie kaniuka'iteita.

21 Heiwa kaxie winuyari kaniuti'ieni kaniu-titaweni, maweti katiniuhuni 'ixuriki kiiyarita paiti.

22 Kami Kanani paapaya, yupaapa kaniuxeiya maweme, hiki miki katiniwarekuxatiani yu'iwama.

23 Tsemi Kapeti hamatia mata 'ixurikiyari me'utihurieka yunaiparitsie meheitiyexiaka, yukutama me'uhuti mekanenukanani yupaapa mimawekaiki. Miki mepika'ixei maweme, xaitsiepita memeukunenierekaiki.

24 Hiki kepauka Nuhexi mukatawaiparixi, piritima nu'aya hetsimiyumate mixeiyaikaiki.

25 Mipai kaniutayini:

«Kanani 'axake'itiarieka.

'Iwamama memiyuhuta

yemeki mepite'i'aitiaka wairiyarika».

26 Mipaita kaniutayini:

«'Aixia ketikihawariwani Yawé Tsemi
Kakaiyarieya.

Kanani ke'ayani wairiyarika
ti'uximayatsiriwame.

27 Kakaiyari Kapeti kwieya 'ake'utayeuriya.

Tsemi manukatsie Kapeti ke'ukani,

Kanani tiwa'uximayatsiriwame ke'ayani».

28 Kepauka memutihau waritana Nuhexi 'apuyeikakai 'akuxi haika tsienituyari heimana huta tewiyari heimana tamamata wiyari.

29 'Atanauka tsienituyari heimana huta tewi-yari heimana tamamata (950) wiyari hexeyati kaniumini.

10

Nuiwarite kwiepa

(Tsut 10:2-31 - Tsut 11:10-27, 1Kem 1:5-27)

¹ 'Iki mepihiki Tsemi, Kami meta Kapeti Nuhexi niwemama meta wanuiwarima, tiutihauritikuke memiwarayexei.

² Kapeti tiiriyamama* mipai mepitetetewakai: Kumexi, Makuki, Marahi, Kawani, Tuwari, Metseki meta Tiratsi.

³ Kumexi tiiriyamamata: 'Atsikenatsi, Xipati meta Tukaxima.

⁴ Kawani tiiriyamamata: 'Eritsaha, Taritsi, Kitiini meta Xuranini.†

⁵ Hipati miki haramara tetsita memitiyaxixi, yuxexuiti yunuiwarima mehexeyati mepaki yukwie meta yuniuki.

⁶ Kami tiiriyamamata mipai mepitetetewakai: Kutsi, Mitsirahini, Puti meta Kanani.

⁷ Kutsi tiiriyamamata mepitetetewakai: Tsewa, Kawira, Tsaweta, Xakama meta Tsaweteka. Xakama niwemama Tsawa meta Rerani mepihiki.

⁸ Kutsi Nimiruri paapaya pihikitikai, mutamariwaxi mexiakame tewi kwinimieme titirikaiyeti matiaki 'ana,

⁹ miki waikawa reutamieweti meta heuyutamieweti kamati kanayani Yawé hixie.

* **10:2 10:2** *Tiiriyamama panuyine nuiwarimamata.* † **10:4 10:4** *Xuranini waikawa pihikia, heiwa Ruranini.*

'Ayumieme hipati mīpai meputiyuane: «'Iki tewi Nimiruri hepai pireuyutamiewe Yawé hixie».

¹⁰ Kiekarieya 'amītimamariwawekai mira'aitakaitsie kanihikītikaitini Waweri, 'Ereki, 'Akari, meta Karine, Tsinaxi kwieyaritsie.

¹¹ Miki kwieyaritsie 'uyeikati Nimiruri kaneyani 'Atsuxi paiti, manata kanitiwewieni Niniwe kiekariyari, Xekuwuti-'Ixi meta Kahara

¹² meta Xetseni, kiekari mīmariwe Niniwe meta Kahara wahixiapa mīyema.

¹³ Mitsirahini, watutsi kanayani rureutsixi, 'anameutsixi, rehawitsixi, natuhitsixi,

¹⁴ paturutseutsixi, katurukitsixi meta katurit-sixi miki piritsiteutsixi wanuiwarima memaki.

¹⁵ Kanani nu'aya Tsiruni kanayani matīarieya, hutarieka mieme Heti,

¹⁶ meta nuiwarimama kewutseutsixi mekanihikītikaitini metatsiere 'amuxeutsixi, keriketseutsixi,

¹⁷ heweutsixi, 'aratseutsixi, tsineutsixi,

¹⁸ 'axiwareutsixi, tsemareutsixi metatsiere ka-matitsixi.

Hikita 'iki nuiwarite kananeutsixi mekaneuyu-taxiriexiani,

¹⁹ miki wakwie kaniye'atīyani Tsiruni tsutiarieti Keraxi paiti 'u'ati meta Kahatsa paiti, Tsuruma hepatsieta, Kumuxa, 'Arimaha, meta Tsewuhini, metatsiere Ratsa paiti.

²⁰ 'Iki Kami nuiwarimama mekanakine, yux-exuiti yuxiīyarima mewarexeiyati meta yuniuki, yukwie meta yunuiwarite.

²¹ Tsemi, Kapeti matsikaya, 'Ewexi niwemama

watutsi kanihikitikaitini, mikita tiri kaniwarayex-eiya.

²² Tsemi niwemama mekanihikitikaitini: 'Erami, 'Atsuxi, 'Axipatsari, Ruri, meta 'Arami.

²³ 'Arami niwemamata mekanakine: 'Utsi, Huri, Ketexi, meta Mahatsi.

²⁴ 'Axipatsari Tseraki paapaya kanayani. Meta Tseraki 'Ewexi paapaya patia.

²⁵ 'Ewexi yuhutame yuniwema piwarayexei: matiarieya Pereki pititewakai, 'ana kwie mutixitekieki, hutarieka miemeta pititewakai Kutani.[‡]

²⁶ Kutani meta puwapaapatikai: 'Arimurari, Tserepi, Katsaxi-Maweti, Yeraki,

²⁷ Harurani, 'Utsari, Rikira.

²⁸ 'Uwari, 'Awimaheri, Tsawa,

²⁹ 'Upixi, Kawira meta Kuwawi. Yunaiti 'iki Kutani niwemama mepaki,

³⁰ miki Metsa kwieyaritsie mepititekai meta Tsepaxi paiti, tau manatineika hepatsie mihiriyatsie.

³¹ 'Iki mepihiki Tsemi niwemama wanuiwarima meta yuniuki mehexeiyatikaiti yukwie meta yunuiwarite.

³² 'Iki mekanihikitini Nuhexi xiiyarimama waniwema, kememiteheukunuiwa, meta wakwie naiti. 'Iki waxiiyarima wahetsie mekanayenexiani naiti kiekari mitama kwiepa, kepauka memutihau reutiyetana.

[‡] **10:25 10:25** Hepirayuki *Pereki panuyine kwie mutixitekie.*

11

Teiteri tuxiyu kememite'utawewi

¹ Merikitsi miki tukaritsie teiteri xeiniukiyari xeikia mekanexeiyakaitini naitsarie kwiepa.

² Hiki mehekineka tau manatineika hepatsie, mekanitaxeiya hakuwerime Tsinaxi kwieyaritsie, mana mekanikuyaxe.

³⁻⁴ Hiki mipai mekatenuxata: «Kiekari tepikamani xeime tuxiyu hexeiyakame muyuawitsie heuti'akame, xinariya tepitiwewieni tepititaiya. Mipai teteyurieu 'aixia tepitexeyarieni, meta tepikataxiyaxiani naitsarie kwiepa». 'Ana xinariya mekaniuyurieni tetexi mikaxuawekaiki, kwetsika miyiwu mekaniuyurieni mana kwieta matineikakaiki tsepa haxu muxuawekai.

⁵ Hiki Yawé kaniukateni kiekari mixeiyaki meta tuxiyu teiteri memiwewietiwekaiki,

⁶ mipai kaniutayini: «Yunaiti mepixeikiekariyari meta xeiniukiyari xeikia mepexeya, 'ayumieme miki 'uximayatsika meputsutia, kememitexata yamepitayurieni.

⁷ Matsi 'aixia piyini waniuki nepipataxiani, memikayu'eniekakiri yunaiti».

⁸ Mipai Yawé waruyurieu mekaneutayeixiani naitsarie kwiepa, mekatenuhayewata me'iwewietiweti kiekari.

⁹ 'Ayumieme miki kiekari Waweri katiniuteriwarieni, mana Yawé waniuki kaniupataxiani teiteri kwiepa memitama yunaime memikayu'eniekaki, manata yaxeikia naitsarie miwareutaxirixiaki.

*Tsemi nuiwarimama**(Tsut 11:10-27 - Tsut 10:21-31, 1Kem 1:17-27)*

¹⁰ 'Iki Tsemi nuiwarimama wa'ixatsi kanihikitini:

Kepauka teiteri memutihau huta wiyari 'anuyemiekaku kepauka Tsemi xeitsienituyari mexeiyakai, 'ana nu'aya 'Axipatsari kaniutinuiwa.

¹¹ 'Axipatsari 'utinuiwaku Tsemi kaniutihuni 'akuxi 'auxiwime tsienituyari wiyari, tawarita warayexeiyaka 'ukitsi 'ukari.

¹² Kepauka 'Axipatsari xeitewiyari heimana tamamata heimana 'auxiwime wiyari mexeiyakai, niweya Tseraki kaniutinuiwa.

¹³ Tseraki 'utinuiwaku, 'Axipatsari kaniutihuni 'akuxi nauka tsienituyari heimana haika wiyari, tawarita warayexeiyaka 'ukitsi 'ukari.

¹⁴ Kepauka Tseraki xeitewiyari heimana tamamata wiyari mexeiyakai, niweya 'Ewexi kaniutinuiwa.

¹⁵ 'Ewexi 'utinuiwaku Tseraki kaniutihuni 'akuxi nauka tsienituyari heimana haika wiyari, tawarita warayexeiyaka 'ukitsi 'ukari.

¹⁶ Kepauka 'Ewexi xeitewiyari heimana tamamata heimana nauka wiyari mexeiyakai, niweya Pereki kaniutinuiwa.

¹⁷ Pereki 'utinuiwaku 'Ewexi kaniutihuni 'akuxi nauka tsienituyari heimana xeitewiyari heimana tamamata wiyari, tawarita warayexeiyaka 'ukitsi 'ukari.

¹⁸ Kepauka Pereki xeitewiyari heimana tamamata wiyari mexeiyakai, niweya Xehu kaniutinuiwa.

19 Xehu 'utinuiwaku Pereki kaniutihuni 'akuxi huta tsienituyari heimana 'atanauka wiyari, tawarita warayexeiyaka 'ukitsi 'ukari.

20 Kepauka Xehu xeitewiyari heimana tamamata heimana huta wiyari mexeiyakai, niweya Tseruki kaniutinuiwa.

21 Tseruki 'utinuiwaku Xehu kaniutihuni 'akuxi huta tsienituyari heimana 'atahuta wiyari, tawarita warayexeiyaka 'ukitsi 'ukari.

22 Kepauka Tseruki xeitewiyari heimana tamamata wiyari mexeiyakai, niweya Nakuxi kaniutinuiwa.

23 Nakuxi 'utinuiwaku Tseruki kaniutihuni 'akuxi huta tsienituyari wiyari, tawarita warayexeiyaka 'ukitsi 'ukari.

24 Kepauka Nakuxi xeitewiyari heimana 'atanauka wiyari mexeiyakai, niweya Teraki kaniutinuiwa.

25 Teraki 'utinuiwaku Nakuxi kaniutihuni 'akuxi xeitsienituyari heimana tamamata heimana 'atanauka wiyari, tawarita warayexeiyaka 'ukitsi 'ukari.

26 Kepauka Teraki haika tewiyari heimana tamamata wiyari mexeiyakai, mekaniutinunuiwakaitiniri niwemama 'Apirami, Nakuxi, Karani.

Teraki nuiwarimama

27 'Iki Teraki kemuyi 'ixatsieya kanihikitini, 'Apirami, Nakuxi meta Karani wapaapa.

Karani Ruti pupaapayatikai,

28 Karani kaniumini 'Uxi karireutsixi wakwieyaritsie, matinuiwaxitsie, paapaya Teraki 'ayeyurikaku 'akuxi.

²⁹ 'Apirami Tsarahi kaniutiwitini, meta Nakuxi Mirika kaniutiwitini Karani niweya, miki tawarita xeime 'uka kanayexeiya 'Itsika titewakame.

³⁰ Perutsi Tsarahi pikaniwewekai, pikayiwekai tiri miwarayexeiya.

³¹ Teraki kanayeyani 'Uxi karireutsixi wak-wieyaritsie Kanani 'uta'eriwati. Yuniwe 'Apirami 'awititi meta yuteukari Ruti, meta yumu'e Tsarahi 'Apirami 'iyaya. Peru Karani kiekariyaritsie me'u'axiaka mana mekanikuyaxe,

³² mana Teraki kaniumini huta tsienituyari heimana 'auxiwime wiyari hexeiya.

12

'Apirami kemiranayexeiya

- ¹ Merikitsi Yawé 'Apirami mipai katiniutahiawe:
«Keneuku'eiri 'akwie,
 'amarema meta 'apaapa kie,
 kenemie kemi'ane kwie nemimatsixeitsitiansie.
² »'Eki 'ahetsie nuiwari mariweme nepinetiani,
 'aixia nepimatsiyurieni,
 'aixia petikuxaxatsiwame nepimatsi'ayeitiani,
 'aheki hipatita 'aixia mepi'itiarieni.
³ Ne 'aixia nepiwayurieka kemi'ane 'aixia memimatexeiyani,
 meta 'axanepiwayurieni kemi'ane
 'axamemimatsiyurieni.
 'Eki 'akimana 'aixia mepi'itiarieka yunaiti nuiwarite kwiepa memitama».
⁴ Hiki 'Apirami kanayeyani, Yawé kemirehiawekai, meta Ruti hamatiana kaneyani. Kepauka mayetia 'Apirami Karani kiekariyaritsie

haika tewiyari heimana tamamata heimana
'auxiwime wiyari pexeyakai.

⁵ Kepauka metia 'Apirami Kanani paiti, yu'iya
pewiti Tsarahi, meta yumatsu Rutu, yaxeikia
yunaima te'i'uximayatsiriwamete Karani
miwarutinaneikai, meta tita memitehexeyakai.
Kepauka Kanani memuye'axia,

⁶ 'Apirami mana 'uyeyaka Tsikeni
mirakutewatsiepai kaninuani, xiu manuwe
mirayutimawati Mure mirakutewatsie. 'Ana
mana kananeutsixi mepititekai miki kwieyaritsie.

⁷ Mana Yawé 'Apirami mipai katiniutahiawe:
«Ne 'iki kwie 'anuiwarima nekaniwaye-
tuiriemiki». Hiki mana 'Apirami tenutsari mawari
wewiwame kaniutawewieni Yawé hetsiemieme,
mana mitahiawixiki.

⁸ Mana miyetia kaneyani muhiyatsie Weteri
'aurie, mana nuaka kaniuyutaxamarutiani,
Weteri tau makayuyupike katini'anekaitini 'Ahi
kiekariyarita tau manatineika. Manatatsiere
tenutsari timawame kaniutawewieni, Yawé
mahaweniki.

⁹ Manata miyetia 'Apirami 'axikai 'umieti
'uyeriximeti Nekexi kwieyaritsie paiti kaniye'ani.

'Apirami kemiretia 'Ekipitu

¹⁰ Hiki 'ana haakaxa kanayani waikawa
'Apirami manukateitsie, 'ayumieme kaneyani
'Ekipitu paiti.

¹¹ Hiki kepauka 'Ekipitu meutahanikekai, mipai
yu'iya Tsarahi katiniutahiawe: «Ne nepitimate 'eki
'uka witsipepiti'imari.

¹² Nepitimate kepauka memimatsihexeiya
'ekipituri mipai mepetiyuani: "Ti'a'iya

'iki", 'anari mekanenemiekuni, 'ekita mekamanehayewakuni.

¹³ Peru neuxei mipai kenetayiki ximixi kename ne'iwa pehiki, ne 'atsinemikaheku'itiriwaniki 'eki mipai pehetayiyu, nemikahekumemieriwaniki».

¹⁴ Kepauka meta'a 'Apirami 'Ekipitu kwieyarit-sie, 'ekipitutari Tsarahi witsimekateniuxeiya.

¹⁵ Yaxeikiata mekanixeiya, te'uximayatamete Parahuni hetsia miemete, hiki mekanekine mete-heitaxatianike 'uka witsikemiti'imarikaiki. Hiki 'ayumieme kanewitikieni paratsiyu paiti.

¹⁶ Tsarahi hetsiemieme 'Apirami 'aixia mekate-niuxeiya. Katiniyetuiriyarieni muxatsi, wakait-sixi, puxuri, kameyutsixi meta te'uximayatamete 'ukitsi 'ukari.

¹⁷ Perutsi Tsarahi hetsiemiemeki 'Apirami 'iyaya, Yawé Parahuni kaniu'uximatiani meta yunaimetiriyamama waikawa kwiniyaki.

¹⁸ 'Ayumieme Parahuni pitituti'a, miwitikiemeki 'Apirami, mipai katinitahiawe: «¿Titayari miya penetiuyuri? ¿Titayari mipai pekanetiutahiawixi kename 'iki 'aiyatikai?

¹⁹ ¿Titayari kename 'aiwa petiutayi? Ketakuta matsi ne'itititinike. Hikiri 'aiya kenawititi keneu-mieni».

²⁰ Parahuni yuteiterima kaniwaruta'aitiani 'Apirami memayeweyaki meta 'iyaya metatsiere tita mirexeiyakai.

13

'Apirami Ruti hamatia kememiteheuyutaxirixia

1 Merikitsi 'Apirami kanayeyani 'Ekipitutsie yu'iya hawititi meta yumatsu Ruti yunaiti, yunaima metewara'arieti yutewama, Nekexi mirakutewatsie me'eriet.

2 'Apirami pixikutikai tewaxi piwarexeiyakai, pirata pexeiyakai meta huru.

3 Kepaukata Nekexi kwieyaritsie miyetia, 'Apirami 'axikai kaneyani Weteri kanakunuani tatsiari meripaiti matiari manukateitsie Weteri meta 'Ahi wahixiapa.

4 Mana meripaiti mawari taiyame mutawewiekaisie, mana 'Apirami Yawé kaniutahiawe.

5 Meta Ruti 'Apirami maweiyakai pukatewakai, muxatsi, wakaitsixi, meta waikawa 'ixuriki kiyari pexeiyakai.

6 Peru hakewa memakutekai pikawareunanakekai yuhutati mana memititeniki, memiyuwaikawakaiki watewama.

7 'Ayumieme mekaniuyutikwitikine 'Apirami memitehiiriekai meta Ruti tehiwemetemama wahamatia. Metatsiere mana mekanikiekaitini 'ana kananeutsixi meta peretseutsixi.

8 Hiki 'Apirami mipai Ruti katiniutahiawe: «Pikaheuyewetse tame temitakwitiweni, meta tateiterima, hurawa temi'iwamarixiki.

9 Mana pukuma kwie 'apiyewa. Nepimatsiwawirie nexaitame pemnetsihayewaki. Xika 'eki peheyani ta'utata neta tatserieta nepiyemie, xika tatserieta peheyani neta ta'utata nepiyemie».

10 Ruti kananieretiyani naitsarie, Kurutani 'utima muweritsie kaneuyeniere, naiti 'aixia

katiniu'anekaitini Tsuhaxi paiti 'uyeniereti, 'aixia katiniuhaxiekaitini, Yawé harawerita hepai meta 'Ekipitu kwieyaritsie hepai. Mipai katiniu'anekaitini mana Tsuruma meta Kumuxa kepauka Yawé mika'ika'unawekaitsie.

¹¹ Hiki Ruti kaninakire hetsiena mieme mayaniki naiti haa Kurutani 'utima muyeweritsie, 'ayumieme kaneyani tau manatineika hepatsie. Mipai mekateneuyutaxiriexiani 'Apirami meta Ruti.

¹² 'Apirami Kanani kwieyaritsie kaniuyuhayewa, Ruti kaneyani mayeweritsie kiekari makumanetsie, Tsuruma 'aurie kaniutayerini.

¹³ Teiteri Tsuruma kiekatari 'axamekatenu'iyarikaitini, Yawé hepaitisita waikawa 'axamiti'ane mekatenyuriekaitini.

¹⁴ 'Arike Ruti 'Apirami 'uku'eirieku Yawé mipai katinitahiawe: «'Apirami 'aku, mana pemanuwetsie keneutanierixia, ta'utata, tatserieta, tayeta meta tatsutia.

¹⁵ Miki nepimatsiyetuirieni meta 'anuiwarima yuheyemeki pemixeiya kwie naime.

¹⁶ Ne yumireme nepiwarayeitiani 'anuiwarima tumuanari hepai. Xewiti xika tumuanari 'iniataweni, kaniyiwemikita 'anuiwarima miwati'iniataki.

¹⁷ Kenemie kenayekexiya 'iki kwie kemayetewi meta kematayewa, ne nekamaniyetuiriemiki».

¹⁸ Hiki 'Apirami kaniuyupata kaneyani Hewuruni 'aurie paiti makuxiuya, Mamire 'iteirieya maku'u 'aurie. Manata mawari taiyame kaniutawewieni Yawé hetsiemieme.

'Apirami Ruti hetsie kemitiutanua

¹ Hiki 'ana tukaritsie te'aitamete: 'Amixaperi Tsinaxi kiekame, 'Ariuki 'Eratsaxi kiekame, Keruxirahumexi 'Erami kiekame, Tirari Kuyetihimi kiekame,

² miki mekaniwarutakwini te'aitamete: Wera Tsuruma kiekame, Wiritsa Kumuxa kiekame, Tsinawi 'Arimaha kiekame, Tsemewexi Tsewuhini kiekame, meta ti'aitame Tsuhaxi kiekame.

³ Miki meyu'auxiwiti me'uyutinika mepiwarukuxeri yukuyaxima mayeweritsie Tsinirini mirayetewatsie, metatsiere Haramara Mimiki mitimatiwatsie.

⁴ Ti'aitame Keruxirahumexi tamamata heimana huta wiyari katiniwa'aitiakaitini, tamamata heimana haika wiyaritsieke mewaraye'unieti mekanakine.

⁵ Xeiwiyari 'anuyeyaku, Keruxirahumexi meta hipati te'aitamete memitinikai mekanayekine, mekaniwaruka'una xepahitsixi 'Atsitaruti-Karinahini kwieyaritsie meta mekaniwaruka'una tsutsitsixi Kami kwieyaritsie meta 'emitsixi Tsawe-Kiriyatahini kwieyaritsie,

⁶ yaxeikiata hureutsixi Tsehihi hiriyaritsie kiekatari, 'atsitapaiti Parani mekaniye'axiani makumawe meuhuratsie.

⁷ Me'akunuaxiaka 'Enimitsipati paiti mekaniye'axiani, tatsiari Karetsi mitiyetewatsie, 'amarekitsixi wakwie naima mepiwarunawairi, 'amuxeutsixi wakwietsie mekaniye'axiani Katsetsuni-Tamaxi kwieyari mekaniwarunawairieni.

⁸ Hiki Tsuruma te'aitamete, Kumuxa kiekame, 'Arimaha kiekame, Tsewuhini

kiekame, meta Wera kiekame, tatsiari Tsuhaxi manuyine, mekanayekine mayeweritsie Tsirini mitiuyetewatsie muwa mekaniwarutakwini,

⁹ te'aitamete, Keruxirahumexi 'Erami kiekame, Tirari Kuyehini kiekame, 'Amixaperi Tsinaxi kiekame, meta 'Ariuki 'Eratsaxi kiekame. Mekaniyunaukakaitini yu'auxiwime mewaraye'unieti.

¹⁰ Mayeweritsie Tsirini putsu puxuawekai waikawa kwetsika miyiwu 'uyemaneti, kepauka memeuyuta'unaxia te'aitamete Tsuruma kiekame meta Kumuxa kiekame, muwa mekanekaxirieni, hipati xeikia mekaniuyiwekaxiani mekaniuyuta'una hiritisie paiti.

¹¹ Miki memite'ayu'iwaxi, Tsuruma meta Kumuxa timieme mekateniunawani naime tewaxi, meta wa'ikwaite, mipai mete'uyurieka mekanekine.

¹² Ruti mana mukateiki Tsuruma kiekariyaritsie 'Apirami matsuya, mikita mekanehana meta yunaime tewamama.

¹³ Perutsi xewiti 'uyuta'unaka, 'Apirami hepirayu tewiyari katinekuxatiani kemitiuyi, Mamire 'amuxeu tewiyari xiuya makuma mukateiki. Mamire pi'iwayatikai 'Etsikuri meta 'Anexi, miki 'Apirami matia mekaniyu'eniekaitini.

¹⁴ Hiki kepauka 'Apirami 'amitiutaxatarie ke-name matsuya hehanie, kaniwaruta'inieni haika tsienituyari heimana tamamata heimana 'atahaika teiteri me'u'ixiparame kiena memutinunuiwaxi xeikia, hiki mekaniwaranukuweiya Rani kwieyaritsie paiti.

15 Yiwikita 'Apirami yuteiterima yunaiti
mekaniwarutakwini mekaniwara'iwa,
mekaniwaranukuweiya Huwa mitiyetewatsie
paiti Ramatsiku yeta.

16 Mipai mekateniwarunawairieni tinaime,
metatsiere yumatsu Ruti kaniutawikweitsitiani
meta tinaime piiniteya, hipame 'ukarawetsixi
meta hipame teiteri.

17 Kepauka 'Apirami makunua ti'aitame
Keruxirahumexi ha'iwaka meta hipame
te'aitamete memeweyakai, ti'aitame Tsuruma
kiekame neikunake mayeweritsie Tsawe meta
Ti'aitame mirayetewatsie.

18 Meta Merikitsereki, ti'aitame Tsareme
kiekariyaritsie meta mawari wewiwame
Kakaiyari 'Amutewi hetsiemieme, paa meta winu
kanimini.

19 Hiki Kakaiyari kaniutawawirieni 'Apirami
'aixia muyurieniki, mipai 'utaiti:

«Kakaiyari 'Amutewi, muyuawi mutawewi meta
kwie,
'Apirami 'aixia keyurieka.

20 Kakaiyari 'Amutewi naimekimiyiwe
pamipariyutsi nekanipitiaka,
mimatsi'uparewi memimatsi'aye'unie
pemiwara'iwaki».

Hiki 'Apirami pitiyetuiri, tamamatatsie timieme
xeime naime.

21 Ti'aitame Tsuruma kiekame, mipai 'Apirami
katiniutahiawe:

—Neteiterima keneneyetuiri, piinite ketinapiti.

22 'Apirami mipai katinita'eiya:

—Yawé hixie mipai neputayi, Kakaiyari 'Amutewi, muyuawi mutawewi meta kwie,

²³ kename nitixaiti nekaranupini miti'apiini, hiru tima, nawi kakaitsie mieme tima. Mipai hatsuaku pepikayawe mipai pemitayini: “Ne 'Apirami xiku nepeyeitia”.

²⁴ Ne tixaiti nepikareuyehiwa nehetsiemieme, hirixiatsi neteiterima memite'utikwai. Meta meminetsi'aweiya 'Anexi, 'Etsikuri meta Mamire, miki hirixia mekete'utipini yuhetsiemieme.

15

Kakaiyari tiratu kemitiuwewi 'Apirami hamatia

¹ Hiki mipairi tiyiku, Yawé 'Apirami kaniutahiawe heinitsika hepai tiyuxexeyameki:

«'Apirami, pepikaheumaka.

Ne 'ahetsie nunuwame nekanihikitini,
kenemimatiyetuirieni waikawa katinayeimiki».

² Hiki 'Apirami mipai katinita'eiya:

—Yawé nekakaiyari, titayari 'imikieri penetiye-tuirieni, ne nunutsi 'akuxi nepikahexeiya, tita nemirexeiya neti'uximayatsiriwame 'Eriyetsexi Ramatsiku kiekame tipiinieya katinayeimiki?

³ Xeimetima nunutsi pemikanetsiyetuirieweki, xewiti netsiparewiwame nepiinite katinanupimiki.

⁴ Yawé mipai katinitahiawe:

—Hawaiki miki tewi 'apiinite miranupini pika'ayani, 'apiinite miranupini yuriki 'aniwe piyaneni.

⁵ Hiki Yawé kanenuyewitini takwa paiti, mana mipai katinitahiawe:

—Muyuawitsie keneutinieri, keniwaruti'iniata xurawetsixi, xika peyiweni pemiwaruti'iniata. Mipai mekaniyupaimekakuni 'anuiwarima.

⁶ 'Apirami Yawé yuri pitiuta'eriri, 'ayumieme Yawé miki heitserie hexeiýame kanayeitiani.

⁷ Mipaita katinitahiawe:

—Ne Yawé nekanihikiti, nemimatsi'ayewiti 'Uxi karireutsixi wakwieyaritsie nemimatsiyetuirieniki 'iki kwie.

⁸ Perutsi 'Apirami mipai katinita'iwawiya:

—Yawé neti'aitiwame, ¿kehepai neretimani ke-name penetsiyetuirieni?

⁹ Yawé mipai katinita'eiya:

—Kenene'atiiri xeime wakaxi, xeimeta kapura, xeimeta tuuru muxa yunaiti haika wiyari mehikikaime, yaxeikiata xeime haimi 'aminena xeimeta kukuru yakiminena.

¹⁰ 'Apirami 'iki naime katini'atirieni, hixiata kaniwaxitexiani, huhutatame 'anuyutaxeiyatikaime katiniuyatsa, peru pikawarutixite memawiwawe.

¹¹ Hiki wirikixi mekani'axekaitini wahetsie memikwikwi'ikaiki, matsi 'Apirami kaniwatatu-axakaitini.

¹² Kepauka kiyirumekaki, 'Apirami kaniukumini, yapauka yiriya kananukatani hetsiena, hiki kanimakaitini.

¹³ Yawé mipai 'Apirami katiniutahiawe:

—Mipai ketinemaika 'anuiwarima xeime kwieyaritsie mepititeni yapaimexia, mana mepiteta'aitiarieni, menanaimarieti, nauka tsienituyari wiyari.

14 Peru neta yaxeikia nepiwa'uximatiani miki teiteri memitewata'uximayatsitiani, 'ana mepayekine 'anuiwarima metixinarieme, waikawa miraye'atika mete'upiti.

15 'Ekita pekanikumawerimiki peka'uximatiarieti, waikawa pe'ukiratsititike pekanimimiki.

16 Nauka nuiwariyari me'anuyeyayu, waxiiyarima 'ena mekani'axiakuni, hiki 'ena memitama 'amuxeutsixi 'axamekateniu'iyarini 'ana nekaniwarakumaweriyamiki.

17 Kepauka tau makayunixi, kepauka mukuyirixi, kaniuhekiare huxunu hepai 'aneti kitsi watiwieti, meta tai mana puyewiekai, miki tewaxi memixitekietika wahixiata mekaniuyekikakaitini.

18 Miki tukaritsie Yawé 'Apirami hetsia tiratu kaniuwewieni. Mipai katinitahiawe:

—'Iki kwie nepiwayetuirieni 'anuiwarima, haa 'Ekipitu mieme manuyeka, meta 'amipa manuyekatsie paiti 'Eupirate mititewatsie.

19 Keni teiteriyari wakwie nekanixatani, meta kenitsixi, karimuneutsixi,

20 hetitsixi, peretseutsixi, xepahitsixi,

21 'amuxeutsixi, kananeutsixi, keriketseutsixi meta kewutseutsixi wakwie.

16

Hakari meta 'Tsimaheri

1 Merikitsi Tsarahi 'Apirami hamatia nunutsi mepikahexeyakai. Tsarahi xeime pexeyakai 'uka ti'uximayatame 'ekipitutanaka Hakari tite-wakame,

2 hiki Tsarahi mipai katinitahiawe yukina:

—Yawé pikanetsipitiawe nunutsi ne-mayexeyaki. 'Ayumieme, keneukahu'i neti'uximayatsiriwame Hakari hamatia. Heiwati miki 'utiniweni neniwema memakineki.

'Apirami yakatiniutanaki'erieni 'iyaya kemirehiawekai.

3 Hiki Tsarahi tiyu'uximayatsiriwame 'ekipitutanaka Hakari 'uwiya, 'Apirami kaniyetuirieni mi'iyayatniki. Mipai katiniuyini kepauka 'Apirami tamamata wiyari muyuriekai Kanani kwieyaritsie.

4 'Apirami Hakari hamatia kaniukahuni, miki kaniutihukata. Kepauka Hakari miretima ke-name 'ayehukakai, kaniyuti'iretiyani yukutsiyari Tsarahi hixie.

5 Hiki Tsarahi 'Apirami mipai katiniutahiawe:

—'Ekitsi ya'ane kame pekaniwiwieka kenemitinanaimarie. Ne nepimatsiyetui ti'uximayatame 'a'ia mayaniki, hikiri mayehuka mariweme kanayuyeitiwani. Yawé yake'utayini kemi'ane heitserie mexeiya, xika 'eki yatini ne.

6 'Apirami mipai katinita'eiya:

—'Eki heitserie pepexeiya ti'uximayatame pemi'ti'aitiakaki, ketine'aitiaka kemimatinake kehepai 'aixia mi'ane.

Hiki Tsarahi waikawa kaniti'uximatiatiyani, 'ana Hakari kaniuyuta'una makumawetsie paiti.

7 Mana niuki tuayame Yawé hetsia mieme kani-taxeiya, haixa matinieretsie huye Tsuhuxi mieme manuyehanetsie

8 mipai katinita'iwawiya:

—Hakari, Tsarahi ti'uximayatsiriwame, ¿hakewa pepeyetia, hakewa pepeutia?

Hakari mipai kaniutayini:

—Nepeyuta'unaxi nekutsiyari Tsarahi hetsia.

⁹ Niuki tuayame mipai katinitahiawe:

—Kenakunua hetsiana, yaketinekamieni kemimare'aitia.

¹⁰ Yaxeikiata 'anuiwarima nepiwatimiriya, xewiti pikayiwani miwaruti'iniata.

¹¹ »Hikiri pemayehuka xeime nunutsi 'uki pekanayexeyamiki, 'Itsimaheri pekatiniteriwamiki, Yawé mi'eniki 'ahiwerika.

¹² Tewi mikatiyu'aitiarinia kanayeimiki, puxu tsi-maruni hepai.

Yunaime kaniwatakwmiki, yunaitita mekanitamiekuni, yu'uximatiati puyeikani yu'iwama yunaime wahamatia».

¹³ Yawé Hakari mitiutaxatiaki mipai pititeriwaxi «Kakaiyari peminiere». Mipai mutainekaiki: «Hiki nepixei kemi'ane minetsixeyia».

¹⁴ 'Ayumiemeta mipai pititewa putsu Karetsi Wereri wahixiapa mitiniere «Kakaiyari mayeyuri putsuya minetsixeyia».

¹⁵ Hakari xeime nunutsi kaniutiniweni 'Apirami niweyatime, 'Apirami miki 'Itsimaheri katiniuteriwa.

¹⁶ 'Apirami nauka tewiyari heimana 'ataxewi wiyari kanexeyakaitini kepauka 'Itsimaheri mutinuiwaxitsie.

17

Tiratu meta xitekiya 'inariyari

1 Kepauka 'Apīrami nauka tewiyari heimana tamamata heimana 'atanauka wiyari mexei yakai, Yawé mipai katinitahiawe:

«Ne Kakaiyari Naimekimitirikaiye nekanihikitini, nehixie keneuyeikani 'aixia ketineyurieneti.

2 Mipai nepeye'atiani 'ahetsia tiratu meta yumireme nepiwarayeitiani 'anuiwarima».

3 Hiki mipai tiu'enaka 'Apīrami, kwiepa kaniukahiximakeni, Kakaiyari 'akuxi kaniyeweyakaitini tikuxatati:

4 «'Iki tiratu 'ahamatia nekaniwewieka: 'Eki yumireme nuiwarite wapaapa pekanayeimiki.

5 Hikiri 'Apīrami pepikatitewaka, matsi pitari 'Apīrahami pepititewaka, mipai nemimarahiaweki kename yumireme nuiwarite wapaapa nematsi'ayeitiani.*

6 Kwinimieme petixiweme nepimatsi'ayeitiani 'ahetsie mepiyekine te'aitamete meta nuiwarite.

7 'Ahetsiemieme 'iki tiratu nepiwewie meta 'anuiwarite wahetsiemieme, 'iki tiratu yuheyemeki mieme payani, yunaime 'anuiwarima wahetsiemieme. Ne 'akakaiyari nepihikitini, meta 'anuiwarima wakakaiyari.

8 'Eki meta 'anuiwarima nepixeyetuirieni naime Kanani kwieyari, yuheyemeki mixekwietiniki, hakewa hiki xeme'uwa teewatari wahapai xe'aneti. Neta xekakaiyari nepihikitini».

9 Kakaiyari 'Apīrahami mipai katiniutahiawe:

* 17:5 17:5 'Apīrami hepirayuki panuyine 'ukiyari mimariwe. 'Apīrahami hepirayuki panuyine yumireme wa'ukiyari yatini wa'ukiyari mitiuyukananimaya.

«Netiratu xekenaye'atia, 'eki meta yaxaikia 'anuiwarima yuheyemeki.

10 'Iki kanihikitini tiratu 'ahamatia nemiwewie meta 'anuiwarima wahamatia, meta yunaiti xemeye'atianiki: Yunaiti 'ukitsi xitekiya 'iniariyari meke'uwewiyarieni.

11 Yuwaiyarisie xitekiya 'iniariyari xepiwewieni, miki pi'iniaritari tiratu kenemitiwewie ne xehamatia.

12 Hiki 'ena mitiyehane memitinunuiwa yunaiti xitekiya 'iniariyari mekekuwewiyariwani 'atahaika tukaritsie, meta yunaiti tiri 'akie memitinunuiwa, meta nanaiyakate teiteri tsepa xenuiwarima wahetsiemieme mekahiki.

13 Yunaiti xewiti pikayukuhayeikawani, 'akie memitinunuiwa meta kemi'ane pemiwatinawe, xitekiya 'iniariyari meke'uwewiyarieni. Mipai pitiyuhayewa netiratu xewaiyarisie kayeiweti, tiratu yuheyemeki mihikiki.

14 Merikite kemi'ane mika'iniaritarieni, yuwaiyarisie mika'uxitekieni, miki pukumaweriyarieni xehetsia. Yamikatikatiaki netiratu kemaine».

15 Mipaitatsiere Kakaiyari 'Apirahami katiniutahiawe:

«Tsarahi 'a'ia, Tsarahi pepikatiuteriwaniri, Tsara pita pititewaka.†

16 Ne 'aixia nepiyurieni, nunutsi xeime nepixeyetuirieni. Waikawa 'aixia nepiyurieni, miki yumireme nuiwarite wamaama payani, hetsiena mepiyekine te'aitamete kiekaritsie memiteta'aitaxiani».

† 17:15 17:15 Tsara hepīayuki panuyine ti'aitame niweya.

17 Hiki 'Apirahami kaniutihiximakeni kwiepa kaniutananeni mipai tiku'eriwati: «¿Kamitsi tiyiwe 'uki nunutsi mayexeiya xeitsienituyari wiyari hexeiya, meta tiyiwe mitiniweni Tsara nauka tewiyari heimana tamamata wiyari hexeiya?»

18 'Ayumieme 'Apirahami Kakaiyari mipai katiniutahiawe:

—'Itsimaheri 'aixia pe'iyuriekaku ke'uyeikani.

19 Kakaiyari mipai katinita'eiya:

—Tsara nepixata 'a'iya xeime nunutsi payexeiya 'aniwetime, 'Itsahaki pekatiniteriwamiki. Miki hamatia netiratu payeyurini meta nuiwarimama wahetsia, tiratu yuheyemeki mieme mihikiki.‡

20 'Itsimaheri hetsiemiemeta nepimatsi'enie. Ne 'aixia nepiyurieni, waikawa miiriweme nepayeitiani, yuwaikawa nuiwarimama nepiwarayeitiani. Tamamata heimana huta te'aitamete wapaapa kanayeimiki. Hetsiena nuiwari mariweme nekaninetiamiki.

21 Matsi netiratu 'aniwe 'Itsahaki hetsie kanayeyurikamiki, Tsara peyexeiya yurika 'epauka xeiwiyari 'anuyeyayu.

22 Kepauka Kakaiyari mitiutahayewaxi 'Apirahami hamatia tikuxatati kaniukumawere hixiena.

23 Miki tukaritsie kwitiwa 'Apirahami yuniwe 'Itsimaheri xitekiya 'iniariyari kaniwewirieni, meta kiena memutinunuiwakai metatsiere muwarutinaneikai, meta hipame 'ukitsi kiena memititeikai yunaime, Kakaiyari kemire'aitiwakai.

‡ 17:19 17:19 'Itsahaki hepipayuki panuyine mutanawe.

²⁴ Nauka tewiyari heimana tamamata heimana 'atanauka wiyari pexeiyakai, 'Apirahami kepauka xitekiya 'iniariyari muwewiyarie,

²⁵ nu'aya 'Itsimaheri tamamata heimana haika wiyari kanihikaitini.

²⁶ Meta 'Apirahami yuniwematì yunaitì xitekiya 'iniariyari mekaniuwewiyarieni miki tukaritsie

²⁷ yunaitì meyunitì 'ukitsi wahetsia kiekatari, meta memutinunuiwaxi wahetsia, meta nanaiyakate teewatari waniwema.

18

Yawé 'Apirahami kemititaxatia nunutsi

¹ Merikitsi Yawé kaniuyuhekiata 'Apirahami hetsia Mamire makuxiuyatsie, 'Apirahami 'ixuriki kiiyari hixie 'uxipiekaku tuka 'uxikakaku.

² Hiki 'Apirahami kepauka manukunierixi, yuhaikame 'ukitsi kaniwaruxeiya yateewa meti'ukame. Waruxeiyaka kaniutanautsa yuxamaru hixie tikeka watahiaweke. Wahixie 'utihiximakeka,

³ mipai kaniutayini:

—Neti'aitiwame, xika yapera'eriwani, yemeki nepimatsiwawirie ne'aurie xeikia pemika'uyeyeikaniki.

⁴ Haa nepita'aita kimana yu'ikate xemitihauxiniki, 'anake xepika'uxipieni 'iki kiyie 'etipiwari hetia.

⁵ Tixe'uximayatsiriwame manukatsie xemiye'axiaki, 'ikwai nekanita'aitamiki 'aixia xeteheu'erieti xemiyehuki kexemitehu.

Miki mipai mekaniutiyuani:

—Kamitsi 'aixia pi'ane, mipai ketineuyuri.

⁶ 'Apirahami kaneyani yapauka Tsara 'ixuriki kiiyarita, hiki mipai Tsara katiniutahiawe:

—Mexiwa 'aixia. Harina 'aixia mi'ane xetewi-yari kiruyari keneuhawiya, paa keneutiwewi.

⁷ Meta 'Apirahami kaneyani 'unautsarimeti hakewa tewaxi memeyenakai, muwa xeime tsikeru kaniwayehana waiyakame waiyarieya mikatse'i, ti'uximayatame kaniyetuirieni, mikita mexiima kanitawarika.

⁸ Hiki katiniwarumini kunereki retsiki meta tsikeru warikariyariki. Kepauka memitekwaikai 'Apirahami kiyetia kaniuwekaitini wa'aurie.

⁹ —¿Hakewari 'a'iya, Tsara?

'Apirahami mipai katiniwaruta'eiya:

—Huma payeka 'ixuriki kiiyarita.

¹⁰ Hiki xewiti mipai katinitahiawe:

—Xeiiwiyari 'anuyeyayu tawarita nepimatsiha'iwatamie, 'ana 'a'iya Tsara nunutsi kanexeiyakamiki.

Tsara kanita'enakaitini yu'ixuriki kiiyari hixie, miyamitikuxataikai waritana yateewa piti'enakai.

¹¹ 'Apirahami Tsara hamatia mepi'ukirawetsixitikai, Tsara mitihukata pikayiwekairi.

¹² 'Ayumieme, Tsara kaniutananeni mipai tiku'eriwati: «Pikayiwe nemuyutemawieka miyamiraniuwaki, neri 'ari nepikayiwe, nekinatari pi'ukiratsi».

¹³ Hiki Yawé mipai 'Apirahami katiniutahiawe:

—¿Titayari Tsara tiutanawe? ¿Kamitsi yurikati'erie mitiniweniki miyayumaiti?

14 ¿Kamitsi Yawé hepaitsita tixaiti tixuawe katiyiweti? Yurika nekanayenemiki 'epauka, 'ana Tsara nunutsi kanexeiyakamiki.

15 Tsara kaniutimani, katini'itaiya mipai katinitahawe:

—Nematsi nepika'utanawekai.

Peru Yawé tawarita mipai katinitahawe:

—Huu, peputananai.

'Apirahami tsurumatarikemitiwawikweitsitiamikikai

16 Hiki mekananuku'uni 'iwatamete mekanekine Tsuruma hepatsie. 'Apirahami wahamatia kaneyani waretateutianike.

17 Yawé mipai katiniku'eriwakaitini: «¿Nekapititaxatiani 'aumi 'Apirahami kenemitiyurieni?

18 'Apirahami nuiwarieya mariweti payani meta tirikaiyeti, miki kimana yunaiti nuiwarite kwiepa memitama 'aixia mepi'itiarieni.

19 Ne nepenayexei yuniwema muwata'ixatsitianiki meta watiriyama, Yawé huyeya'utia memuhuniki, yamemiteyuriekakiri tita 'aixia miti'ane tita mitiheitserie. Hiki mipai me'anyakaku Yawé piraye'atiani 'Apirahami kemitiutahawixi».

20 Hiki 'ayumieme Yawé 'Apirahami mipai katiniutahawe:

—Nepika'inewieri hiwerika Tsuruma Kumuxa wahepaitsita mieme, waikawa 'axamepiteyurie.

21 'Ayumieme nepinierimie, xika 'aku yuritini 'axamete'u'iyarini kememutiyuane memutitsuana, yati pitikatixai nekatinetimaimiki.

22 Yuhutati 'iwatamete xeikia mekanekine Tsuruma, 'Apirahami 'akuxi kaniuyuhayewa Yawé hamatia.

23 Hiki 'Apirahami Yawé hixie hurawa kaniuyani mipai katinitahiawe:

—¿Kamitsi yuriki petika'una heitseriemeki yamitikamie 'axamitiyuriene hamatia?

24 Miki kiekaritsie xika me'u'uwani huta tewiyari heimana tamamata heitseriemeki yamemitekahu. ¿Yunaime petiwaka'una, pekareiyehiwirieni kiekari pewanaki'erieti heitserie memexeiya?

25 Mipai pemitiyurieneni matsi 'aixia pika'ane. Heitseriemeki yamitikamie xika 'umieni 'axamitiyuriene hamatia meta yaxeixia memite'anuyehuni yunaiti. Mipai matsi hatsuaku pepikatiyurieneni. 'Eki 'itsikame pekanihikitini 'iki kwie naime hetsiemieme. ¿Tami kemitiheitserie pekatiyurieni?

26 Yawé mipai katinita'eiya:

—Xika huta tewiyari heimana tamamata heitserie yamemitekahu Tsuruma kiekariyaritsie newarukaxeiya, wahetsiemieme kiekari naime nekatineuyehiwiriemiki.

27 'Apirahami mipai katinitahiawe:

—Ne nepinemate kenetineuyehiwiriekwa kwinimieme nematiku'iwawiyaki neti'aitiwame, ne tumuanari naxi nepihiki.

28 Peru xika meheuyewekake yu'auxiwiti mema'atikineki huta tewiyari heimana tamamata. ¿Petika'una naime kiekari yu'auxiwiti memeuyewetseki?

Yawé mipai katinita'eiya:

—Xika huta tewiyari heimana yu'auxiwime
newaretaxeiya heitserie memexeiya
nepika'ika'una.

²⁹ 'Apirahami tawarita mipai kaniutayini:

—Keri xika huta tewiyari xeikia pewaretaxeiya.

Yawé mipai katinita'eiya:

—Heitserie memexeiya miki huta tewiyari
meyupaimemeki nepika'ika'una kiekari.

³⁰ 'Apirahami tawarita mipai kaniutayini:

—Pepikaha'aka neti'aitiwame, matsi
kenenepitiaka nemitikuxataniki. Keri xika
xeitewiyari heimana tamamata xeikia
pewaretaxeiya.

Yawé mipai katinita'eiya:

—Nepihayewa xeitewiyari heimana tamamata
wahetsiememeki.

³¹ 'Apirahami tawarita mipai kaniutayini:

—Kenetineuyehiwirieka miya nematikux-
axatiwaki neti'aitiwame, peru xika pewaretax-
eiya xeikia xeitewiyari heitserie memexeiya.

Yawé mipai katinita'eiya:

—Miki xeitewiyariki nepika'ika'una.

³² Miki tawarita mipai katinitahiawe:

—Pepika'uyeha'ariweni neti'aitiwame, kenene-
upitia tawarita nemitaniuniki. Xikata tamamata
pewaretaxeiya xeikia.

Yawé 'imatirieka mipai katinitahiawe:

—Miki tamamata waheki nepika'ika'una.

³³ Kepauka mitiutahayewaxi Yawé tikuxatati
kaneyani, 'Apirahami meta kanakunuani yukie
'ixuriki kiivarita.

19

Yawé kemitika'unaxi Tsuruma meta Kumuxa

¹ Merikitsi kanikuyiririmekaitiniri
 kepauka niuki tuayamete Tsuruma
 memiye'axia. Ruti kiekari kitenie kanakateitini
 miranutakikatiretsie. Kepauka miki miwaruxei,
 kananukukeni watahiaweke, wahixie kwiepa
 kaniukahiximakeni.

² Mipai katiniwarutahiawe:

—Neuxei 'iwatamete, nepixewawirie waikawa
 'iki tikaritsie nekiita xemuyuhayewaniki. Muwa
 yi'ikate xemetihauxini peyiwe, 'uxa'akeri ximeri
 xekaniyehuni kexemitehu.

Peru miki mipai mekaniutyuani:

—'Aixia pi'ane miyapemitarahiawe, matsi tame
 kiekari hixiapa teiteri memayutixexeiriwatsie te-
 petiheni.

³ Peru Ruti katihayewakaku yukie wa'inieti
 mepeki 'utimana, kiitana mekaniu'axiani.
 Ruti wa'ikwai muwa putiwarukawewiri
 'aixia ti'aneame, paa mikakuxanariyarietika
 kaniutikwaxiya, miki mekateniukwani.

⁴ Hiki mekakakutsiwawekaku 'akuxi, kii
 'aurie mekanaketikine teiteri mana Tsuruma
 kiekariyaritsie kiekatari. Yunaiti teiteri kiekatari
 mekaniyiakaitini xewiti tima kayuhayewati,
 temari 'ukirawetsixi yunaiti mekateniyiakaitini.

⁵ Ruti mekanewaye'inieni, mipai mekateni-
 tahiaawe:

—ǂHakewari 'ukitsi memu'axia 'akie metihenike?
 Keniwarayeni'a. Tame wahamatia tepikahini.

⁶ Hiki Ruti yukiita hewayeyaka, reunaka kite-
 nie,

⁷ mipai katiniwarutahiawe:

—Neuxeï nehamikuma, mipai xepikayiaka.

⁸ Ne yuhutame nepiwarexeiia neniwema 'ukari 'iimarixi 'akuxi, nekaniwarayeni'amiki tsepa kexemiwayuriku miki, peru 'iki 'ukitsi 'axaxepikawayurieka, miki mekaniu'axiani nekiita memayeheniki.

⁹ Peru miki mipai mekatenita'eia:

—Mana keneukuye'a. 'Iki 'ena pikakiekame, hikita tati'aitiamiki. Hikitsiari matsi 'eki kwinimieme 'axatekamaniyuriekakuni 'ena mitiyehane pemikawataunieki.

Hiki Ruti mekaneukutaima hurawa kitenie mekaniuti'uni 'itupari meheu'unake.

¹⁰ Peru memuyuhuta 'ukitsi yumamate mekaniutitsera, Ruti mekaneutahana kiitana meta mekateneunani kitenie.

¹¹ Hiki miki, 'itupari memeu'unakai temari 'ukirawetsixi mekaheuneniereti mekanayeitiarieni, kitenie hakewa mehikitikai mepika'itaxeiri.

¹² Hiki Ruti mipai mekateneye'eritiani:

—¿Tawarita 'atiriyama pekatiwarexeiia 'ena? Keniwaranuwitiki xaitsie yunaime 'amunema, 'aniwema 'ukitsi meta 'ukari, yunaime kemi'ane memi'a'iwama, 'iki kiekaritsie mepikayuhayewani,

¹³ hiki tame tekanika'unakuni. 'Axa'iti'ane hiwerika Yawé hetsia paiti kaniye'ani, 'ari 'iyarieyatsie katineuyeyani. 'Ayumieme tame pitatsiheyeni'a temika'unaki.

¹⁴ Hiki Ruti kanayeyani wata'inienike yuniwema wakinama memakinekekai, kemi'ane memiwatiwitinikekai.

Mipai katiniwarutahiawe:

—Mexiima. Kiekaritsie xekenayekini, Yawé kanika'unarimeni.

Matsi miki yaki 'utaineme mepi'eriekai.

¹⁵ 'Ari kuhekiaririmekaku tawarita Ruti yax-eikia mekatenikihawekaitini niuki tuayamete. Karima mipai mekaniutiyuani:

—Keneyumexiitiati. Keniwaranuwitiki 'a'iya meta 'aniwema memuyuhuta, xemikakukukuweniki kepauka kiekari mika'unarieni.

¹⁶ Ruti kayumexiitiakaku, niuki tuayamete mayatsie mekanikawire, 'iyaya meta niwemama memuyuhutakai, kiekaritsie mekaniwaranuyewitini, Yawé miwarutinenimayataxiki.

¹⁷ Mewarayewitikari kiekaritsie, xewiti niuki tuayame mipai kaniutayini:

—Xekeneuyuta'una. Yu'utima xepika'anakuneniereni mayeweritsie xepikahewa'uweni. Hiritsie paiti xekeneuyuta'una, nikahirixia xe'ukwini.

¹⁸ Ruti mipai kaniutayini:

—Neuxeitsi hawaiki, waikawameki nepimatsiwawirie, neti'aitiwame.

¹⁹ 'Ekitsi 'aixia pekanetiniuxeiya, ke'aixia nehetsiemieme pemituyuri pimariwe netukari pemutawikweitsitiaki. Ne matsi nepikayiwe nemineta'una hiritsie paiti, nika netsi'anuku'axe kepauka mika'unarieni kiekari, tietitsi neminemi.

²⁰ 'Ena kiekari yateewa pukuma 'etsiyewiti, mana nepineta'una. ¿Xekaneneupitia mana pita nemineta'unaki? Miki kiekari 'etsikaniyeuka, mikitsie nekaniyuti'awietamiki.

²¹ Hiki xewiti miki mipai katinitahawe:

—Kepeminerawawiriwa yanepira'eriwa.
Nepika'ika'una kiekari pemexaxata.

²² Keneumienitsiari xeiya, kene'ata'una mana paiti, peheta'ayuke yanepitiyurieni.

'Ayumieme miki kiekari Tsuhaxi titewati patia.*

²³ Ruti Tsuhaxi peta'a tau haneximekaku.

²⁴ Hiki Yawé tai wiyeriyari kaneyeni'ani meta 'atsupire taiyari kaniukawiwieni muyuawitsie mieme Tsuruma meta Kumuxa wahetsie.

²⁵ Mipai katiniwaruka'una miki kiekarite meta yunaime mana kiekatari, naime mayeweritsie meta tita mana mitixuawekai.

²⁶ Peru Ruti 'iyaya yu'utima kananakuniere 'una teteyari kanayani.

²⁷ Hiki 'uxa'arieka ximeri paiti 'Apirahami kananukukeni, kaneyani hakewa Yawé hamatia mirekuxataki.

²⁸ Kaneutaniere Tsuruma meta Kumuxa wahepatsie meta naitsarie mayeweritsie, hiki mana kitsi kaniuxeiya mana hatineikame, huxunuta wa'ati piratineika.

²⁹ Mipai Kakaiyari pitika'unaxi miki kiekarite makuweritsie mukumanekai, peru 'Apirahami kemirehiawekai paye'eri, Ruti mana putawikweitsitia kiekari ka'unarieximekaku mana mukateiki.

Ruti meta niwemama

³⁰ Hiki Ruti marikaki Tsuhaxi kayuhayewamiti, kaneyani hiritisie paiti yuniwema memuyuhuta warawititi. Mana paiti terita kanayekateitini wahamatia.

* ^{19:22} ^{19:22} Hepirayuki Tsuhaxi 'etsimiyewa kananuyineni.

31 Merikitsi mīxari muwa me'ayeteti, Ruti niweya 'amiyumate yutaru mipai katiniutahiawe:

—Tapaapa pi'ukiratsiri, meta naitsarie 'ena mītiuyehanetsie mepumawe 'ukitsi memitatsitiwitiniki, naitsarie teiteri kememiteyutiwitiki.

32 Hikimi, tepititawaitiani, 'anari hamatiana tekanikahikuni, mipai teyime tanuiwarima tepīwarayexeiya.

33 Hiki miki tikaritsie yupaapa mekaniuti'itiani, hiki kahayu'eriwakaku, 'ana niweya 'amiyumate kaniukahuni hamatiana.

34 'Uxa'arieka, 'amiyumate mipai yutaru katiniutahiawe:

—Neuxei, ne hiki tikaritsie nepaapa hamatia nepukahui. Yaxeikiata hiki taikai tepiti'itiani, 'ekita hamatiana pepikahuni, mipai teyime tanuiwarima tepīwarayexeiya.

35 Miki tikaritsieta yupaapa mekaniuti'itiani, miki kahayu'eriwakaku, niweya yakimiyumate hamatiana kaniukahuni.

36 Mipai me'uyika yuhutati Ruti niwemama mekaniutihukataxiani yupapatsie miemekī.

37 'Amiyumate xeime 'ukitime kaniutiniweni, Muhawi katiniteriwa, muhawitsixi wapaapa matia.†

38 Taruyata yaxeikia, 'ukitime kaniutiniweni, Weni-'Ami‡ katiniteriwa, 'amunitsixi wapaapa matia.

† 19:37 19:37 Hepirayutsixi waniukiki, Muhawi 'etsiwatikaku yaxeikia piti'enīiriki yupaapa hetsiememe. ‡ 19:38 19:38

Hepirayutsixi waniukiki, Weni-'Ami 'etsiwatikaku yaxeikia piti'enīiriki ne'iwama wanu'aya.

20

'Apirahami meta 'Awimereki

¹ 'Apirahami mana miyetia kaneyani Nekexi mirakutewatsie 'erieti, Karetsi Tsuhuxi wahixiapa kaniuyuhayewa Keraxi mirakutewatsie.

² 'Apirahami, Tsara mi'iyayatikai, kename 'iwayatikai kaniutainekaitini. 'Ayumieme mana 'Awimereki, Keraxi kwieyaritsie ti'aitame, katiniuta'aita miwitikiemiekī Tsara, neiwitini 'iyaya mayaniki.

³ Hiki miki tikaritsie, Kakaiyari 'Awimereki kaniutahiawe heinitsitana, mipai katinitahiawe:

—Neuxei 'eki pekanimimiki 'ukaratsi pemewitiki, miki 'ukaratsi kaniwikieka.

⁴ Hiki 'Awimereki 'ukaratsi hamatia mikakahuiwekaiki, mipai katinitahiawe:

—Ti'aitame, pepikanetsikumemiwani, ne 'axanepikatiuyuri,*

⁵ 'Apirahami mipai pinerahiawekai kename 'iwayatikai, 'ukaratsi yaxeikiata pinetiutahiawixi, neri yuriki neti'erieti nepeiwiti, peru ne'iyaya ne'inawairienike nepikatiuyuri.

⁶ Kakaiyari mipai katinita'eiya:

—Mipai nepitimate, yuri petiwa'eririeti pepeiwiti, 'ayumieme nepikamatsi'upitia pemikumayianiki, xurikime pemikatiwiwiwaniki nehetsia.

⁷ Peru miki 'ukaratsi keneyetua hiki, miki kinaya niukame kanihikitini nehetsiemieme, kanenitawawiriemiki 'ahetsiemieme pemuyeikaniki

* 20:4 20:4 'axanepikatiuyuri. Hepirayutsixi waniukiki ne meta neteiterima 'axatepikate'uyuri.

'akuxi, peru xika peka'iyetuani 'eki yaxeikia 'akie kiekatari wahamatia pekanimimiki.

8 'Uxa'arieka ximeri 'Awimereki yuteiterima warutahiaweka, katiniwarutaxatiani kemitiuheinikai. Miki me'i'enieka waikawa mekaniutimamani.

9 Hiki 'Awimereki, 'Apirahami katiniutani'airieni mipai katinitatieni:

—Neuxei, kepetatsi'uyuri. ¿Kepaukakuta 'axanepimatsi'uyuri, titayari xurikime petatiti-wiwiriwa nehetsie meta nemira'aita wahetsie? 'Axamemite'u'iyari kememikanetsi'uyuri 'eki pita waikawa 'axapepinetsi'uyuri.

10 ¿Kepetiku'eriwati miyapeputayi?

'Awimereki mipai titatieku,

11 hiki 'Apirahami mipai katinita'eiya:

—Ne mipai nepitiku'eriwakai, xeme Kakaiyari xeka'ayemakaxeme nepi'eriekai, xenetsimienike nepi'eriekai ne'iya hetsiemieme.

12 Peru kaniyuritini miki kanine'iwatini, nepaapa niweya kanihikitini, peru nemaama pikaniweya, 'ayumieme piyiwekai ne'iya mayaniki.

13 Kepauka mipai minetiuta'aitia Kakaiyari, kename nepaapa nemaama newaku'eirienikekai, kename 'ateewa neyemieikai, ne ne'iya mipai nepitiutahiawixi: «Neuxei mipai nepimatiwawirie: Tsepa hakewa temeki, kename ne 'amatsika nehiki peputaineni».

14 Hiki 'Awimereki Tsara 'Apirahami kaniyetuirieni meta katinimini muxatsi, wakaitsixi, te'uximayatamete 'ukitsi meta 'ukarawetsixi.

¹⁵ Meta 'Awimereki mipai katinitahiawe:

—Neuxei, nekwie 'ena kanikumaka, hakewa mimatsihenakeni mana keneukani.

¹⁶ Tsara meta mipai katiniutahiawe:

—Neuxei, 'a'iwa nepu'itia tamamata heimana xewi kiruyari heimana 'imeriyu pirata tepiayari, miki kani'ayumiemetini 'axapemikaramamatiwaniki, mipai memitehetimaniki 'a'iwama kename 'eki 'at-sipekatiuyuri, mipai xewiti 'atsipikametitamani.†

¹⁷ Hiki 'Apirahami Kakaiyari kaniutawawirieni, kepauka muyutanenewi Kakaiyari 'aixia kaniwaruyurieni 'Awimereki meta 'iyaya, metatsiere mitiwa'aitiakai, meminiwewaweniki hutarieka,

¹⁸ Tsara miya miranuyetiaki, 'Apirahami 'iyaya, Yawé 'Awimereki kie kiekatari 'ukarawetsixi mekaniwewaweme kaniwarayeitiakaitini.

21

'Itsahaki kemitiunuiwaxi

¹ Yawé kemainekai, Tsara 'aixia kaniuyurieni, katinaye'atiani kemirehiawekai.

² Tsara kaniutihukata 'Apirahami nu'ayatime kanayexeiya 'ukiratsitikaku. Kakaiyari kepauka mainekai 'ana katiniunake.

³ 'Apirahami yuniwe 'Itsahaki katiniuteriwa, Tsara hamatia memeyexei.

⁴ 'Apirahami xitekiya 'iniariyari 'Itsahaki kaniuwewirieni 'atahaika tukari 'anukayaku, Kakaiyari kemitita'aitia.

⁵ Xeitsienituyari wiyari kanexeyakaitini 'Apirahami kepauka 'Itsahaki mutinuiwaxi.

† 20:16 20:16 Hepirayuki pikahekia.

⁶ Hiki Tsara mipai kaniutayini: «Kakaiyari nemutanaweniki yapinetiupitia, yaxeikiata kemi'ane memitehetimani meputinaweni nehamatia.

⁷ Matsi nixewiti 'Apirahami mipai pikarehiawekai kename ne tiri newatitsit-sitiani-ekai, matsi hiki nunutsi nepayexei nu'ayatime 'ukiratsitikaku».

Hakari meta 'Tsimaheri kememitehayeni'arie

⁸ Nunutsi 'Itsahaki kaniutawere, tsitsieya mekaniku'eiritsitiani. Miki tukaritsie 'Apirahami 'ixiarari kaniuwewieni yuniwe hetsiemieme.

⁹ 'Ana Tsara mipai katinetimani 'Itsahaki 'ekipitutanaka Hakari nu'aya 'Apirahami hamatia meyexeyakai kaninanaimakaitini 'i'atseti.*

¹⁰ Hiki 'ayumieme Tsara 'Apirahami mipai katiniutahiawe:

—Kenanuni'a ti'a'uximayatsiriwame yuniwemakame, neniwe 'Itsahaki tita pemitietuirieni 'apiini, miki mana heitserie pikahexeyani ti'a'uximayatsiriwame nu'aya.

¹¹ Kepauka 'Apirahami miyamitiutahiawarie, kaniuyukahiwerieni nu'aya mihikitikaiki Hakari hetsiemieme.

¹² Peru Kakaiyari 'Apirahami mipai katiniutahiawe: «Pepika'a'iyaritiaka nunutsiki meta maa-maya ti'uximayatameki. Tsara kemerahiawe yaketineuyuri, 'anuiwarima 'Itsahaki hetsie pita mekaniyekinikuni.

¹³ Meta ti'uximayatame nu'aya nuiwari mari-weme nepayeitiani, 'aniwe mihikiki».

* **21:9 21:9** Kiriye-kutsixi waniukiki 'Itsahaki. Peru hepi-rayutsixi waniukiki pikahexaxata.

14 'Uxa'arieka, ximeripaiti 'Apirahami nanukukeni, paa, nawi haa 'uyemakame Hakari naiparieyatsie nekawirieni. Hikita nu'aya kaniyetuirieni, meta kaniwarutateutiani. Hakari kanayeyani, mekaniuhukaitini me'u'eriet makumawetsie Weritsewa mirakutewatsie.

15 Kepauka yuhaa memayexi nawita miyemakai, Hakari yuniwe 'itsitia 'itiyeka,

16 kaneyani yateewa mana 'ukaiti kaniutitsiatiyani maamaya, temaiki kaxeiyamiti kepauka miminikekai.†

17 Hiki Kakaïyari temaiki tsuarieya kaniu'enieni, Hakari kaniutahiawe muyuawitsie paiti niuki tuayame Kakaïyari hetsiemieme mipai katinitahiawe: «Hakari mipai pepikayianeni. Pepikamaka, Kakaïyari temaiki tsuarieya kaniu'enieni.

18 Xeïya kenemie hetsiana keneuwitiximeni pepika'itatuayani, ne miki nuiwarieya mariweme nekanayeitiamiki».

19 Hiki Kakaïyari Hakari haixa kaniuxeitsitiani. 'Anari yapauka 'utihanika nawi kixauriyaritsie temaiki kaniuharitiani.

20 Hiki Kakaïyari temaiki hamatia kaniuyeikakaitini, miki kaniwerekaitini makumawetsie kaniukateitini, tupi 'iriki kwinimieme timiïwet kanayani.

21 Parani mirakutewatsie kaniukateitini makumawetsie, maamaya 'ekipitutanaka kaniwiritiani.

'Apirahami meta 'Awimereki tiratu kemite'uwewi

† 21:16 21:16 Hepirayuki kaneyani yateewa, yatini tupiki tiutamiyi 'iri keteewa mukawautse panuyine.

22 'Ana 'Awimereki 'Apirahami hetsia kaninuani, Pikuuri titewati kaneteitakaitini kuyaximama wa'ukiyari, mipai 'Apirahami katiniutahiawe:

—Mipai tepitemate, Kakaiyari waikawa pimatsiparewie naime kepemitiyuriene.

23 'Ayumieme, yakenetineutahiawi Kakaiyari hixie, hiki kwitiwa, kename pekaneti'itaiyani meta neniwema yaxeikia nenuiwarima, yakeneutayiki kename yaxeikia penetixeiyani kenemimatixeiya, meta yunaime teiteri 'iki kwieyaritsie kiekatari pemanuyeika 'ateewa kiekame hepai.

24 'Apirahami mipai kaniutayini:

—Huu, yanepira'eriwa.

25 Peru 'Apirahami 'Awimereki katiniutaxatiani putsu hepaitsita, miki teiterimama memi-nawairiekaiki.

26 'Awimereki mipai kaniutayini:

—Nematsi mipai nepikatimaikai, 'ekitsi mipai penerahiaweka, ne 'atsinepikimate kemi'ane miyamitiyuri.

27 Hiki 'Apirahami wakaitsixi kaniwarutiwiya muxatsi meta, 'Awimereki kaniumini, miki tukaritsie yuhutati tiratu mekaniuwewieni.

28 Peru 'Apirahami 'atahutame muxatsi 'ukarawetsixi kaniwarayehapani yukuraruta,

29 'Awimereki 'Apirahami mipai katini-uta'iwawiya:

—¿Titayari petiwarayehapana miki 'atahutame muxatsi?

30 'Apirahami mipai katinita'eiya:

—'Iki 'atahuta muxatsi 'ukari keniwaru-tanaki'eri. Matsi mipai mitimatsiikiniki kename ne putsu ne'utawewi.

³¹ 'Ayumieme mana Weritsewa pitiuteriwarie, mana tiratu memuwewiki yuhutati.‡

³² Hiki tiratu me'uwewiekari Weritsewa, 'Awimereki Pikuuri matia kuyaxi wa'ukiyari piritsi-teutsixi yukwiewaritsie mekanakunuaxiani.

³³ Hiki mana Weritsewa, 'Apirahami tamaritsiku titewakame kaniuka'eni, mikitia Yawé Kakaiyari 'atsimikayiwe kaniutahiawekaitini.

³⁴ Miixa wiyari 'Apirahami kaniutihuni piritsi-teutsixi wakwiewaritsie 'ukaiti.

22

Kakaiyari 'Apirahami kemitiuta'iniataxi

¹ Merikitsi yapaimexia tukari 'anukayaku, Kakaiyari 'Apirahami kaniuta'iniata, mipai katinitahiawe:

—'Apirahami 'aku.

'Apirahami mipai katinita'eiya:

—'Ena nepuyeika.

² Kakaiyari mipai katinita'aitiani:

—'Aniwe muyuxewi 'a'iyariki peminakierie, kenawititi kenemie Muriya kwiewaritsie paiti. Hiki mana keneutimawa mawari naiti mitaiyariwa hepai, xeime hiri nemimatsixeitsitianitsie.

³ 'Uxa'arieka ximeri paiti kananukukeni 'Apirahami yupuxu kaniutixiratiani miranu'ikataki. Meta kiye kaniutiwiteni miretimawarieni hetsiemieme, hiki meyhutame

‡ 21:31 21:31 Weritsewa hepirayuki putsu 'atahuta muxatsi panuyine meta tiratu.

te'uximayatamete meta yuniwe 'Itsahaki warawititi kanayeyani hakewa Kakaiyari mirehiawekai.

⁴ Hairieka tukaritsie me'uhuti, 'Apirahami hiri 'ateewa kaniuxeiya hakewa Kakaiyari mexataka.

⁵ Hiki 'Apirahami miwarawitiki te'uximayatamete yuhutame, mipai katiniwarutahiawe:

—'Ena xekeneyuhayewa puxu hamatia. 'Akuxi temaiki meta ne tepuhuni, Kakaiyari temetahiaweki, kwitiwata tepakunuaxiani xehetsia.

⁶ 'Apirahami kiyexi 'uti'ika 'Itsahaki kaniutitiani, mikita tai kaniutikweni meta nawaxa kanakakeni. Hiki mekanekine yunaiti me'uhuti.

⁷ 'Itsahaki 'Apirahami mipai katiniutahiawe:

—Nepaapa.

Paapaya mipai katinita'eiya:

—¿Tita neniwe?

'Itsahaki mipai kaniutayini:

—Neuxei, kiyexi tema'i, tai temakwe'e, peru ¿hakewa muxa temeitimawa?

⁸ 'Apirahami mipai katinita'eiya:

—Neniwe. Kakaiyari kaniyiweni miki muxa kaneyetuamiki.

Hiki mekanihukaitini.

⁹ Hiki kepauka memuye'axia Kakaiyari hakewa mexataka, mana 'Apirahami mawari taiyame kaniutawewieni meta kiyexi 'aixia katiniunetiani mana. Hiki yuniwe 'Itsahaki 'uwiyaka kanihiani mawari taiyametsie kaneteni kiyexi heima.

¹⁰ Hiki 'Apirahami yunawaxa kaniwatihana yuniwe mienike mawari mayaniki,

11 peru Yawé niuki tuayameya 'anakwiti
heimana kanetaniuni karima mipai tikihiaweti:

—'Apirahami. 'Apirahami 'aku.

Mikita mipai katinita'eiya:

—'Ena nepuyeika.

12 Hiki niuki tuayame mipai katinitahiawe:

—Keneuhayewa temaiki, pepikatikwinitika.
Nepiretimari 'eki Kakaiyari pepayemakaxe,
pepika'uyuta'ima 'aniwe penetsiyetuirienike
muyuxewi.

13 Hiki 'Apirahami kananieretiyani, muxa
kaniuxeiya yu'awateki tsekame 'itsitsie. Hiki
'Apirahami 'ixinaka kanitimawa taipa yuniwe
hetsiemieme.

14 'Ayumieme 'Apirahami mana pitiuteriwaxi:
«Yawé pirayetuirieni tita mireuyehiaka». 'Ayu-
mieme teiteri mipai meputiyuane: «Hiritsie Yawé
pirayetuirieni».

15 Yawé niuki tuayameya 'Apirahami kaniu-
tahiawe hutarieka taheima paiti,

16 mipai katinitahiawe:

—'Eki pepiraye'atia kenemutayi, 'aniwe
muyuxewi pepika'utikweri, 'ayumieme ne yuriki
nekanaineni —Yawé mipai kanaineni—.

17 'Aixia nepimatsiyurieni waikawameki,
'anuiwarima yimiireme nepuwarayeitiani
xurawetsixi muyuawitsie memitama wahepai
meta xiekari haramara tetsita mitika
hepai. Meta 'anuiwarima mepite'ayu'iwani
kemi'ane memiwaraye'unie wakiekarite
mepiwanawairieni.

18 Yemeki kenematiutahiawixi yapemitikatiaki, yunaiti nuiwarite kwiepa memitama 'aixia mepi'itiarieka 'anuiwarima waheki.

19 'Apirahami kanakunuani hakewa memeyuhayewakai te'i'uximayatsiriwametemama, hiki yunaiti mekanekine Weritsewa, hakewa 'Apirahami mekatei.

Nakuxi niwemama

20 Hiki kepauka, 'Apirahami katiniutamarieni kename 'iwaya Nakuxi yi'iya Mirika hamatia, tiiiri mewarayexei.

21 Matiarieya 'Utsi titewati kanayani, 'utimanata mekaniutinunuiwa Wutsi, Kemuheri matia. 'Iki wa'utiamieme 'Arami paapaya kanayani.

22 Miki wa'utiata mekaniutinunuiwa Ketseri, Katsú, Piriratsi, Hirurapi, 'imatirieka Wetuheri,

23 miki Xeweka paapaya patia. 'Iki mepihiki 'atahaika tiiiri Mirika Nakuxi hamatia memiwarayexei, 'Apirahami 'iwaya.

24 Nakuxi meta kaniwarayexeiya tiiiri Xeuma titewakametsie, hutarieka yi'iyatsie. Miki mepitetetewakai, Tewaki, Kakani, Takatsi, meta Mahaka.

23

Tsara kemitiumi

1 Tsara xeitsienituyari heimana xeitewiyari heimana 'atahuta wiyari kaniutihuni,

2 kaniumini Kiriati-'Ariwa mirakutewatsie, tatsiari Hewuruni kiekariyaritsie Kanani kwieyaritsie. 'Apirahami puyuheiweriekai waikawa hetsiena mieme.

³ Hiki 'Apīrahami mana 'auriena 'anukukeka, kaneyani Heti nuiwarimama mipai tiware-tahiaweke:

⁴ —Neuxei, ne 'ena nepikakiekame, peru kwie teri xepinetsituirieni muwa ne'iya nemeutateniki.

⁵ Hiki hetitsixi mipai 'Apīrahami mekatenu-uta'eiya:

⁶ —Neuxei 'eki ketaneu'eni, 'eki mariweme mexiakame pepihiki. Keneuka'awieta 'a'iya tateri 'aixia mi'aneneta tsepa kemi'ane teriyarita. Xewiti yuteri pikametsitikweririeni 'a'iya muwa pemeutateniki.

⁷ Hiki 'Apīrahami kananukukeni nakatutsita hetitsixi wahixie,

⁸ mipai katiniwarutahiawe:

—Xika yuriki xenakeni ne'iya 'ena nemika'awietaki, xekeneneuparewi, 'Epuruni mipai xeteneutahiawi Tsukaxi nu'aya,

⁹ kenetsi'utuirieni teri Makipera mirakutewatsie muka, miki kwieya maka'atikatsie. Mipai xeketeneutahiawi kenetsi'utuirieni yemeki kemiraye'axe, mipai ne 'ena mikite wateukume nehexeiyati nepayani netiiriyama wahetsiemieme.

¹⁰ Hiki 'Epuruni Heti tewiyari mana kaniukateitini yuteiterima wahamatia, 'ayumieme 'Apīrahami katiniutaxatiani humapaiti 'eniiriikimeki, hipatita memi'enieniki yaxeikiata kiekari kitenie memuyekikakai:

¹¹ —Hawaiki, neti'aitiwame keneneu'eni, nematsi nepimatsimikwa miki teri meta kwie naime. Ne'iwama mepi'enana kename nematsimikwa. Mana keneukateuki 'a'iya.

12 Peru 'Apirahami tawarita nakatutsita yu-naime wahixie mana kiekatari,

13 hiki yunaiti me'enanakaku 'Epuruni mipai katiniutahiawe:

—Neuxei, keneneu'eni kwerieti. Ne tawarita yanepaine nemimatipitianiki kwie kemiraye'axe. 'Eki yaketineutanaki'eri, mipaike ne'iya mana nepika'awieta.

14 Hiki 'Epuruni mipai 'Apirahami katiniuta'eiya:

15 —Neti'aitiwame, keneneu'eni. Kwie nauka tsienituyari pirata tuminiyariki* piraye'axe. Mipai paimemeki 'atsitepikatiyuani. Hiki 'a'iya keneka'awieta.

16 'Apirahami 'Epuruni matia 'aixia mekate-niuxata, hiki hetitsixi wahixie katinayukatuani kemitiheitserie: nauka tsienituyari pirata tumini-yariki, tumini waikawa miti'axe hepai katininani tetuayamete wahepai.

17 Mipai 'Apirahami kwie katiniunaneni 'Epuruni tipiinieya, Makipera mirakutewa Mamire 'aurie tserietana. Miki teri naim kiyexite mireuti'ukai miki kwieyaritsie 'Apirahami tipiinieya kanayani.

18 'Apirahami tipiinieya piratia yuheyemeki hetitsixi teiteriyari wahixie meta kiekari kitenie memutakikakai.

19 Hiki 'Apirahami yu'iya Tsara kaniukateuku terita kaneitatani, Makipera mirakutewatsie Mamire tserieta, yaxeikiata Hewuruniki pumatiwa, Kanani kwieyaritsie katini'aneni.

* 23:15 23:15 tumini. Hepirayutsixi waniukiki tsekerexi.

²⁰ Mipai tiuyiku miki kwie meta teri hetitsixi wapiini pikaratari, 'Apirahami tipiinieya pita kanayani mikite wateukume mayaniki yuheye-meki.

24

'Itsahaki meta Xeweka

¹ Merikitsi 'Apirahami kani'ukiratsitikaitiniri waikawa wiyari kanexeiyakaitini, Yawé Kakaïyari kaniparewiewekaitini naimeki.

² Hiki 'Apirahami 'ukiratsi meripaiti miparewi kaniuta'inieni, kiena naime miti'uximayatsirie kai tita mirexeiyakai, mipai katinitahiawe:

—Neteuritia keneutame'i,

³ Yawé hixie yuriki yakenetineutahiawi, kemi'ane kwie meta muyuawi mutawewi, kename 'uka 'ena kiekame Kanani peka'iwititiani neniwe

⁴ 'Itsahaki, matsi pekaniyemieni nemarema wahetsia, muwa neniwe 'iyaya mayani pekananuyewaumiki.

⁵ Ti'uximayatame mipai katinitahiawe:

—¿Perutsi xika 'uka ne'utima mamie kaheyuwairiyani 'iki kwieyaritsie paiti? ¿Kamitsi neramie 'aniwe neranuwitini wakie paiti?

⁶ 'Apirahami mipai katinitahiawe:

—Hawaiki, neniwe pepikahewitikini muwa paiti,

⁷ Yawé Kakaïyari muyuawi mutawewi nekie pinetseheyewiti ne'iwama wahetsia, mipai netihiritiati: «'Anuiwarima nepiwayetuirieni 'iki kwie», miki yuniuki tuayame kananun'amiki 'ahamatia mimatsi'anuwitiniki, 'eki

pemeyiwekaxianiki 'uka pemawitini neniwe
'Itsahaki hetsiemieme.

⁸ Xika 'uka 'a'utia mamie kaheyuwairiyani,
'eki pepixine kenemerahiawe, peru neniwe
pepikahewitikini muwa paiti.

⁹ Hiki ti'uximayatame 'Apirahami teurieyatia
kaneutameni, mipai katinitahiawe kename yuriki
yatikayani kemitihiiritia.

¹⁰ Hiki kameyutsixi kaniwarukuha'aritia
tamamata meyupaimeme 'Apirahami
tewamama, meta waikawa 'imikierite
katiniukuha'aritia, kaneyani Nakuxi
manukateitsie Metsuputamiya kwieyaritsie.

¹¹ Mana nuaka kiekari warita haputsu
'aurie yukameyutsixi kaniwarukatuani.
Hiki kaniukutaikaire, kepauka 'imarixi
mematihaniwetsie kanaye'ani.

¹² Hiki ti'uximayatame mipai katiniuyutane-
newieni: «Yawé, 'Apirahami neti'aitiwame
Kakaiyarieya, waikawa nepimatsiwawirie hiki
'aixia nemitiyurieniki, 'Apirahami nekutsiyari
kepemitinaki'erie yaketineuyuri.

¹³ Ne 'ena nepuwe haa matineika
newatakwewieti, 'ena kiekatari waniwema
memayekinirime metihaninike.

¹⁴ Keneupitia 'iya 'uka kemi'ane mipai
nemitihiawe: “Neuxei 'aye'i kenanakahani
'etsiwa nemanuhareniki”, mikiita mipai
kenetiuta'eiya: “Kenanutihareka, 'akameyut-
sixita nekaniwatiharitiamiki”, miki 'uka
kehikitini pemenayexei 'Itsahaki hetsiemieme
mati'uximayatsiriwame. 'Ana mipai nepiretimani
kename yapetiuyuri pe'inaki'erie 'Apirahami

neti'aitiwame».

¹⁵ Hiki yunenewieti karanuniwekaku Xeweka kaniuxeiya, 'akanamiekaitini yuye'i 'anakayeti. Xeweka Wetueri kaniniweyatikaitini, Wetuheri kaniwaniwetikaitini Mirika Nakuxi hamatia, Nakuxi 'Apirahami 'iwaya.

¹⁶ Miki 'uka witsipiti'iimarikai, pikawikiekai, 'uki pikamaikai 'akuxi. Miki haa matineika nuaka kaniutihanini. 'Ari piyemieximekai

¹⁷ hiki ti'uximayatame kaniutanautsa hepana, mipai katinitahiawe:

—ǃ'Etsiwa 'eki pekanetiuharitiaawe haa 'aye'ita miemek?

¹⁸ 'Uka mipai katinita'eiya:

—Kenanuhareka.

Yuye'i 'anakahanaka kanenutiharitiani.

¹⁹ Kepauka ti'uximayatame 'anuharekuri, Xeweka mipai katinitahiawe:

—Nekaniwatihaniimikita 'akameyutsixi wahet-siemieme memitihareniki kememiteuhariku.

²⁰ Hiki tewaxi mematiharewetsie 'ikatuaka, waikawamexia kanakunuani hanineti memite'atiharewetsie 'ikatu'ati, yunaiti memitihareniki kameyutsixi.

²¹ 'Apirahami ti'uximayatsiriwame kanixeyakaitini, mipai tiku'eriwati xika'aku Yawé tiyurienekaitini, 'aixia 'anemek makunuaniki.

²² Kepauka kameyutsixi memite'utahayewaxi mehareti, ti'uximayatame huru nakitsayari hewati'ika tsurieyatsie kaniyewirieni 'ataxewime kiramuyari raheteme, meta huru matsiwayari kaneimaniriexiani hutame, xeitsienituyari kiramuyari raheteme, ti'uximayatame mipai katinita'iawawiya:

23 —Neuxeï, ¿kemi'ane 'eki pepiraniwe, 'apaapa kie meyekani 'aumi reyíwe?

24 Miki mipai katinita'eiya:

—Ne Wetuheri nepiniweya, Mirika meta Nakuxi waniwe,

25 mana xemetiheni peyiwe meta miaxa waikawa pexiawe kameyutsixi wahetsiemieme.

26 Hiki ti'uximayatame kaniutitunumakeni Yawé pamipariyutsi kaniupitiani

27 mipai 'utaiti: «'Aixia pepitiuka'iyari Yawé 'Apirahami neti'aitiwame Kakaiyarieya, pe'inaki'erieti pepikatihayewa meta 'aixia pepinetiuye'atia 'iwamama wahetsia».

28 Xeweka kaneyani 'unautsarimeti yumaama hetsia, mana katinitaxatiani kemireiyuriekai.

29 Xeweka xeime yumatsika kanexeiyakaitini Rawani titewakame, miki 'unautsarimeti kanayeyani ti'uximayatame heuwaumieka, haa matineika 'akuxi miki kaniukateitini.

30 Rawani yu'iwa nakitsa kaniuxeirieni meta matsiwa metatsiere kani'enieni tikuxatakaku ti'uximayatame kemirehiawekai. 'Ayumieme kanayeyani ti'uximayatame heuwaumieka, haputsu matiniere kanitaxeiya, yukameyutsixi wahamatia.

31 Mipai katinitahiawe:

—Kimi, 'eki 'aixia pepi'tiarié Yawé yametipitiakaku. ¿Titayari 'ena peti'akuhayeikawani kiekari warita? Neri 'aixia nepirekuyuri kiita xemeyeheniki, meta 'akameyutsixi wahetsiemieme.

32 Hiki ti'uximayatame kiepa kaniye'ani. Yapauka Rawani kameyutsixi kaniwaruti'ikapieni mi'axa kaniwarutimini, meta haa kaniwaruhanitiani ti'uximayatame meta miwarawitikikai yu'ikatetsie memauyuhauxixianiki.

33 Kepauka memitekwanikekai 'Apirahami ti'uximayatameya mipai kaniutayini:

—Ne, nepikatikwani yanetayimeke titaki nemitikuyiane.

Hiki Rawani mipai katinitahiawe:

—Yakeneutayikikuta.

34 Ti'uximayatame mipai katinitsutiani:

—Ne 'Apirahami ti'uximayatsiriwame nekanihikitini.

35 Yawé waikawa 'aixia kaniyurieka kaniparewieka. Katinikupinirieka muxatsi, wakaitsixi, huru, pirata, te'uximayatamete 'ukitsi 'ukari, kameyutsixi, meta puxuri.

36 Meta neti'aitiwame 'ukiratsititiri yu'iya Tsara hamatia xeime nunutsi mekanayexeiya, neti'aitiwame yuniwe naime katiniupitiani.

37 Hiki neti'aitiwame mipai pinerehiritia: “Neniwe pepikakuwititiani 'ena kiekame kananeutsixi waniwe, nemanukatsie.

38 Matsi pita kenemie ne'iwama me-manu'uwatsie, mana kenetiwwa 'uka neniwe 'iyaya mayaniki”.

39 Ne mipai nekatineitahiawe neti'aitiwame: “Neuxeitsi. ¿Peru xika 'uka kaheyuwairiyani ne 'utima mamie?”

40 Hiki mipai nerahiawe: “Yawé nehamatia puyeika, miki 'ahamatia yuniuki tuayame

panuni'ani, 'aixia 'anemekî pemakunuaniki
pemeikaxeiyakîta 'uka neniwe hetsiemieme
nepaapa türiyamama wahetsia.

⁴¹ Xîka ne'iwama mekaheitaunieni 'uka,
mîpai 'ekîri pepikaraye'atiani kepemutayî neri
wairiyarika nepikamatsipitiani”.

⁴² »Kepauka haa matineika nemunua mîpai
neputayî: “Yawé 'Apîrahami Kakaiyarieya,
xîka mîpai matinakeni, waikawameki
nepimatsiwawirie 'aixia ketineuyuri 'aixia
nemirakunuaniki.

⁴³ 'Ena nepuka, neta'ikwewati haputsu
matinieretsie. Xîka xewiti 'îimari hayeyani
kuhanîneti, mîpai nepîtitahiawe: 'Neuxei, 'Etsiwa
keneneuharitîa 'aye'îta mieme’,

⁴⁴ xîka kemî'ane mîpai mîtayîni: 'Kenanuhareka
'eki, nekaniwatihanîmîkîta kameyutsixi
wahetsiemieme’, mîkî kehîkîtîni 'uka
pemanayexei Yawé, netî'aitiwame nu'aya
hetsiemieme”.

⁴⁵ »'Akuxi nekaranunîwekaku neyunenewietî,
Xeweka nekaniuxeiya mana 'amiekame yuye'î
'anakayeti. Hîkî kaniutihanîni haputsuta, mîpai
nekatineitahiawe: “Neuxei, keneneuharitîa”.

⁴⁶ Mîkî yapauka yuye'î 'anakahanaka mîpai
kanetinetahiawe: “Kenanutihareka 'eki, meta
'akameyutsixi nekaniwatiharitîamîkî”. Mexi ne
neheharekai mîkîta nekameyutsixi kaniwareti-
haritîani.

⁴⁷ Hîkî nekaneita'iwawiya: “¿Kemî'ane
pepîraniwe?” Kepauka mîkî mîpai mînereta'ei:
“Wetuheri nepîniweya, Nakuxi Mirîka waniwe”,
ne tsurîeyatsie nekaneiyewirîeni nakîtsa meta

matsiwa hutame nekaneimini,
⁴⁸ hiki nekanetitunumakeni Yawé
 pamipariyutsi nekanepitiani, 'Apirahami
 Kakaifarieya, 'aixia minetiuye'atia 'uka
 nemitaxeiyaki 'iwamama waniwetime
 neti'aitiwame nu'aya hetsiemieme.

⁴⁹ Hiki, yaxekeneteneutahiawi xika 'aixia
 xetekakinikuni xe'inaki'erieti neti'aitiwame,
 metatsiere yaxeneteneutahiawi xika katixaitini.
 Netari kenemiyianeni».

⁵⁰ Hiki Rawani Wetuheri hamatia mipai meka-
 niutiuyuani:

—Xiari Yawé matsi mipai paine, tame huu
 temaitikani tepikayiwawe meta tixai.

⁵¹ Mana puka Xeweka kenanuwitiki
 mati'aitiwame nu'aya 'iyaya kanayeimiki,
 heitseriemeki Yawé kemaine.

⁵² Hiki kepauka 'Apirahami
 ti'uximayatsiriwame mipai mitiutahiawarie,
 kaniukatunumakeni kananakatutsire Yawé hixie.

⁵³ Hiki katinewatipini huruki mitiwewiyatika
 meta pirataki metatsiere 'ixurikite miraye'atika
 Xeweka katiniupitiani. Yaxeikia matsikaya meta
 maamaya katiniwayetuirieni 'imikierite.

⁵⁴ 'Anari miki meta miwarawitikikai
 mekatenukwani mekatenu'ieni, mana
 mekanikuheteitini wahetsia.

'Uxa'arieka ximeri kepauka memanuku'ui,
 'Apirahami ti'uximayatsiriwame mipai
 kaniutayini:

—Nekanakunuamikitsiari neti'aitiwame hetsia.

⁵⁵ Peru Xeweka matsikaya meta maamaya
 mipai mekaniutiuyuani:

—Tamamata tukari 'akuxi ke'ukunuani Xeweka, 'anake tsepa metia.

⁵⁶ Ti'uximayatame mipai kaniutayini:

—Neuxeitsi xepikanetsi'ukununuitiwani, 'aixia 'anemeki nemakunuaniki Yawé yapitiuyuri, 'ayumieme xekeneneupitia nemiyemieki neti'aitiwame kie.

⁵⁷ Hiki miki mipai mekaniutiyuani:

—Xeweka tepita'iwawiya ketayini.

⁵⁸ Miki me'ita'inieka mipai mekatenita'iwawiya:

—¿Petiymie 'iki 'utia?

Xeweka mipai katiniwaruta'eiya:

—Huu.

⁵⁹ Hiki mekanipitiani Xeweka miyemieki, meta 'ukaratsi yamiti'iwiyakai mitaweriyaxi 'Apirahami ti'uximayatsiriwame 'utia meta memeweiyakai.

⁶⁰ Hiki Kakaiyari mekaniutawawirieni Xeweka hetsiemieme 'aixia miyurieniki mipai me'utiyuati: «Ta'iwa, tame mipai tepiteku'eriwa:

Yuwaikawame wamaama peke'ayani.

'Anuiwarima kemi'ane memiwaraye'unie mekete-waruta'aitiani wakiekaritetsie».

⁶¹ Hiki Xeweka meta memite'ita'uximayatsirieni me'anuti yaxeka kameyutsixi wahetsie mekanekine 'Apirahami ti'uximayatsiriwame 'utia. Mipai Xeweka katinewitikieni, 'ana kanayeyani.

⁶² Hiki 'Itsahaki kaninuakaitini haputsu matinieretsie «'Amuyeika Minetsixeiya» mititewatsie, 'anatsi Nekexi mirakutewatsie kaniuyeikakaitini.

⁶³ Merikitsi taikai kanikuyani yeuta.
Hiki yapauka kameyutsixi kaniwaruxeiya
me'aye'axiaximeme mematiteitsie.

⁶⁴ Yaxeikiata Xeweka 'Itsahaki kaniuxeiya, 'ix-
eiyaka kananakayani kameyutsie

⁶⁵ ti'uximayatame mipai katiniuta'iwawiya:
—¿Kemi'ane piyane mana yeuta matimie
tahepa?

Ti'uximayatame mipai kaniutayini:

—Neti'aitiwame kaniyaneni.

Hiki Xeweka kaneuyuku'eima yihixie 'ixurikiki.

⁶⁶ Hiki ti'uximayatame 'Itsahaki naime katiniu-
taxatiani kemirakunua.

⁶⁷ Hiki 'Itsahaki Xeweka 'ixuriki kiiyarita
kaneutawitini maamaya muyehupukaitsie
Tsara, kanitiwitini waikawa 'inaki'erietí,
'iyaya kanayani. Mipai 'Itsahaki yu'iyaritsie
katiniuyinitiani maamaya mumikaikiri.

25

'Apirahami kemitiumi

(Tsut 25:1-4 - 1Kem 1:32-33)

¹ Merikitsi 'Apirahami tawarita 'ukaratsi kaniu-
tiwitini Tsetura titewakame.

² Miki hamatia yuniwema kaniwarayexeiya:
Tsimirani, Kutsani, Merani, Mariyani, 'Itsiwaki
'imatirieká Tsuhaki.

³ Kutsani Tsawa paapaya kanayani meta Rerani.
Rerani niwarimama mekanakine 'atsureut-
siki, retutseutsixi, rehumeutsixi.

⁴ Mariyani niwemama mekanakine, 'Epa,
'Epexi, Kanuki, 'Awiraha, 'imatirieká 'Eriraha.
'Iki yunaiti Tsetura niwemama mekanihikitini.

⁵ 'Apīrahami yuniwe 'Itsahaki naime katiniye-tuirieni tita mirexeiyakai.

⁶ Meta 'Apīrahami hipame yī'ītama waniwema tiwayetuirieka kaniwareni'ani, mexi'akuxi 'a'uyeikakai, 'Itsahaki hamatia memikatiteniki, tau manatineika hepatsie kaniwareni'ani.

⁷ 'Apīrahami kaniutihuni xeitsienituyari heimana haika tewiyari heimana tamamata heimana 'auxiwi (175) wiyari.

⁸ Miya paimexia 'utihuka 'Apīrahami kaniumini waikawa 'ukiratsititiri, tutsimama memakuhe wahetsia kaneyani.

⁹ Niwemama 'Itsahaki meta 'Itsimaheri meyunaiti mekanika'awieta terita Makipera mirakutewatsie Mamire 'aurie, 'Epuruni kwieyatsie, Heti tewiyari Tsukaxi nu'aya.

¹⁰ 'Apīrahami minanekai pihikitikai hetitsixi muwarunanairiekai, muwa mekaneitateni 'iyaya Tsara hamatia.

¹¹ Hiki 'Apīrahami 'ukumawereku, Kakaiyari 'Itsahaki 'aixia kaniuyurieni 'Apīrahami nu'aya, putsu 'aurie kaniuyuhayewa «'Amuyeika Minetsixeiya» mititewa 'aurie.

*'Itsimaheri nuiwarimama
(Tsut 25:12-16 - 1Kem 1:29-31)*

¹² Iki mekanihikitini 'Itsimaheri nuiwarimama, 'Apīrahami nu'aya Hakari hetsie meyexei, 'ekip-itutanaka Tsara parewiwameya.

¹³ Mipai mekatenitetewaka 'Itsimaheri niwemama: Newayuti, Tseraxi, 'Ariweheri, Miwitsani,

¹⁴ Mitsima, Rumaha, Matsa,

¹⁵ Haraxi, Temaha, Ketuxi, Napitsi meta Tserema.

16 'Iki mepihiki 'Itsimaheri niwemama, tamamata heimana huta nuiwarite mepaki kememitetetewa yaxeikia, yuxexuiti kwie mehexeyati mepaki me'ukutetikaiti.

17 'Itsimaheri xeitsienituyari heimana xeitewiyari heimana tamamata heimana 'atahuta (137) wiyari puyeikakai. Kaniumini tutsimama memakuhe wahetsia kaneyani.

18 Nuiwarimama Kawira mekaniuyuhayewa meta Tsuhuxi, 'Ekipitu 'aurie mekatenitekaitini, huye 'Atsiriya haneme manuyehanetsie, mana mekaniuyuhayewa yu'iwama mewaraye'unieti.

Kakuwu meta 'Etsahu kememite'ununuiwaxi

19 'Iki 'Itсахaki kemuyi pi'ixatsiyari, 'Apirahami nu'aya.

20 'Itсахaki huta tewiyari wiyari kanex-eiyakaitini kepauka Xeweka mutiwiti, Wetuheri niweya, Rawani taruya. Wetuheri Rawani hamatia 'arameu teiteriyari mepihikitikai Parani-'Arami mepikiekataritikai.

21 Hiki Xeweka pikaniwewekai, 'ayumieme 'Itсахaki Yawé kaniutawawirieni hetsiena mieme, hiki Yawé kani'enieni nenewierieya, Xeweka kaniutihukata.

22 Peru hukayahetsie paiti meyeteti yuhutati tiri mekaniyukwitiwekaitini, miki 'ayumieme mipai kaniutayini: «Xika mipai netiuka'eniwamiki, titayari 'anetiuyeikani?» Hiki Yawé kaniutahiawe kanita'iwawiya.

23 Miki mipai katinita'eiya:

«'Ahukatsie huta nuiwariyari mepiyetei,
huta nuiwariyari 'ahukatsie meyeteti me-
payuye'unie.

Xewiti tirikaiyeti kanayeimiki xewitita hawaiki,
'amiyumate yutaru katinita'uximayatsiriemiki».

²⁴ Hiki Xeweka kepauka maye'atīarie matini-wenitsie, yuhutame kaniwarayexeiya tīiri.

²⁵ Matīari mutinuiwaxi kipateya kani-tatairawikaitini, naiti hauhuxati. 'Etsahu mekateniteriwa.

²⁶ 'Utīmanata mutinuiwaxi yu'iwa 'Etsahu keputsayatsie 'awietī kaniutinuiwa. Miki Kakuwu mekateniteriwa. Kepauka miki tīiri yuhutati memutinunuiwaxi 'Tсахaki haika tewiyari wiyari kanexeyakaitini.

²⁷ Tīiri mekaniutiwawere. 'Etsahu yeuta kan-inakekaitini, yeutari kwinimieme tiwareutakwi-weti kanayani. Kakuwu meta kayuwati muyeika kanayani, yukie mukani kaninakekaitini.

²⁸ 'Tсахaki matsi waikawa 'Etsahu kaninaki'eriekaitini, minakekaiki xi'erikaya mitikwaka, Xeweka matsi Kakuwu waikawa kaninaki'eriekaitini.

²⁹ Hiki Kakuwu pītiyuwewiriekai tikwanike, mana 'Etsahu kaninuani 'uxeti yeuta hanuyaka mipai katinitahiawe:

³⁰ —Netineumikwa miki 'itsari mīxetaki, kwinimieme nepiti'uxe. ('Ayumieme 'Etsahu 'Erumi pītiuteriwarie).*

³¹ Kakuwu mipai katinita'eiya:

—Keneneutuiriekameri heitserie
kepēmirexeiya 'eki meri pemīmiemeki.

³² 'Etsahu mipai kaniutayini:

* **25:30 25:30** 'Erumi hepīrayuki panuyine mīxeta.

—Haakaki nepimixime, tixaitiki
pikatiyunaki'erie heitserie kenemirexeiya
nemexiakametiti.

³³ Kakuwu matsi tawarita mipai katinitahiawe:

—Kamitsi keneneutuiiri heitserie kepemirexeiya
yanetineutahiawi 'aheyemeki.

'Etsahu yuriki yakaniutayini, miki mipai
katiniyetuirieni heitserie kemirexeiyakai
mexiakametiti.

³⁴ Kakuwu 'Etsahu katiniumini mume
'etsimipepe 'itsariyariki meta paa kanimini.

Hiki tiukwaka 'anutihareka kaneyani. Mipai
tiuyurieka tixaiti katiyunaki'erikame payeitia
heitserie kemirexeiyakai mexiakametiti.

26

'Itsahaki meta 'Awimereki

¹ Miki tukaritsie waikawa haakaxa kanayani
miki kwieyaritsie, meripaiti 'Apirahami
muyeikakaitsie hepai. 'Ayumieme 'Itsahaki
kaneyani Keraxi, 'Awimereki manuyeikakai
piritsiteutsixi tiwa'aitiwame.

² Mana Yawé kaniyuhekiata mipai
katinitahiawe: «Pepikaheyeikani 'Ekipitu.
Miki kwieyaritsie keneuyuhayewa kemi'ane
nemimatsi'uxeitsitiatsie.

³ Mana keneuyeikani yatewimeki. Ne'ahamatia
nepuyeikani, 'aixia nepimatsiyurieka, kariki
matsi 'eki meta 'anuiwarima nepixeyetuirieni
'iki naime kwie. Mipai yuriki nepireye'atiani
'apaapa 'Apirahami kenemirahiawekai.

⁴ Nepiwatimiiriya 'anuiwarima xurawetsixi
wahepai, 'iki naime kwie nepixeyetuirieni,

'anuiwarima waheki yunaiti nuiwarite kwiepa memitama 'aixia mepi'itiarieka.

⁵ 'Apirahami minetsi'anu'eniki naime kenemiti'aitiakai, 'iniari niukiyariki, kenemirehiawekai meta kenemiti'ikitiakai».

⁶ Hiki 'Itsahaki Keraxi kaniuyuhayewa.

⁷ Kepauka teiteri mana kiekatari memiku'iwawiyakai 'iyaya hepaitsita, miki kename 'iwaya kaniutainekaitini, Xeweka kwinimieme witsikatini'imarikaitini, 'Itsahaki kaneumakaitini heitserie mitiwataxatiani, mipai pitiku'eriwakai me'imienike 'iyayaki pi'eriekai.

⁸ Miixa tukari 'anukayakuke, 'Awimereki pir-itsiteutsixi tiwa'aitiwame yukiiita paiti 'ayekaiti kanitanieriekaitini kiekaritsie, hiki 'Itsahaki kani-uxeiya yi'iya Xeweka 'ikamaiwame.

⁹ Hiki 'Awimereki 'Isahaki heki katiniutani'ani, mipai katinitahiawe:

—¿Kamitsi miki ti'a'iya? ¿Titayari kename 'a'iwa petiutayi?

'Itsahaki mipai kaniutayini:

—Ne nepixemakakai, xe'iwitikuti xenet-simienike nepi'eriekai.

¹⁰ Peru 'Awimereki mipai katinitahiawe:

—Mipai pepikatatsiyurieneni 'eki tame, tawarita xetikari xika 'anukayanike, xewiti hamatiana xika 'ukahunike, hiki 'eki teyunaime 'axapepitatsiyurienikekai.

¹¹ Hiki 'Awimereki yunaime yuteiterima mipai katiniwarutahiawe:

—Kemi'ane 'iki tewi 'axamimatiaka yatini 'iyaya, kanimieriemiki.

¹² Miki wiyaritsie 'Itsahaki kaniuka'eni miki kwieyaritsie, 'aixia katiniuxuawere Yawé miparewiekaiki.

¹³ Mipai titsutiaka 'Itsahaki waikawa rexeiyati kanayani.

¹⁴ Muxatsi waikawa piwarexeiyakai, wakait-sixi, meta teiteri mitiwa'aitiakai, piritsiteutsixi waikawa piiniteyaki mekaniniukimakaitini.

¹⁵ Kepauka 'Itsahaki paapaya mayeyurikait-sie 'Apirahami, miki teiterimama putsu meputi-wewiekai, peru 'ariketa piritsiteutsixi mepenu-teukixia.

¹⁶ Hiki 'Awimereki 'Itsahaki mipai katiniutahiawe:

—Hikiri 'eki matsi waikawa pepirexeiya, pepitatsi'a'iwari, 'ayumieme keneumieni 'enari pepika'ukani.

¹⁷ Hiki 'Itsahaki kaneyani mayeweritsie Keraxi mirayetewatsie, mana kaniuyuhayewa.

¹⁸ Tawarita putsu kanewatiwiwixiani, paapaya 'Apirahami muyeikakaitsie mieme, piritsiteutsixi memeikanaxiakai 'umikuri, 'Itsahaki yaxeikiata katiniteriwaxiani paapaya kemititeriwaxiakai.

¹⁹ Hiki heiwa mieme 'Itsahaki hetsia te'uximayatamete putsu mekanitutawewieni mana mayeweritsie, hiki haixa mekanituxaxiya.

²⁰ Peru manata Keraxi kiekatari mana memitetihiwakai mekaniiwarutitieni 'Itsahaki teiterimama muxatsi wahiwemete, miki mipai me'utiyuati kename miki pita wahetsiememetikai. 'Ayumieme 'Itsahaki Mirayukwine katiniteriwa miki putsu, kimana meyukwitiwekaiki.

²¹ Tawarita xaitsie 'Itsahaki teiterimama putsu mekaniutawewieni, hutariekata mana mekaniuyutitieni, miki putsu 'Itsahaki Temataye'unie katiniteriwa.

²² 'Itsahaki kaneyani 'aheteewakaku mana tawarita putsu kaniutawewieni, mikiki hirixia mepika'uyutikwi, 'ayumieme katiniteriwa 'Amakuyewa, mipai kaniutayini: «Hiki Yawé pitatsi'upitia 'ena temu'uwaniki».

²³ Mana miyetia Weritsewa kaneyani.

²⁴ 'Ana tikaritsie Yawé kaniuyuhekiata mipai katinitahiawe:

«Ne 'apaapa 'Apirahami Kakaiyarieya nekanihikitini.

Pepikamaka, ne 'ahamatia nepuyeika.

'Apirahami 'aixia mitiuyuriki,

'aixia nepimatsiyurieni nepiwatimiriya 'anuiwarima».

²⁵ Hiki 'Itsahaki mawari taiyame kaniutawewieni, mana Yawé kaniutahiawe. Mana kaniuyuhayewa, teiterimamata mana putsu mekaniutawewieni.

²⁶ Hiki 'Awimereki kaninuani Keraxi paiti 'ayeneka, 'Itsahaki hamatia titaxatake, 'Akutsati kaneweiyakaitini tixaxatiwameya meta Pikuuri kuyaximama wa'ukiyari.

²⁷ 'Itsahaki mipai katinita'iwawiya:

—Xeme xepikanetsinaki'erie, xepinetsi'ayewei, ʔitayarita 'uxete'ahu?

²⁸ Miki mipai mekatenita'eiya:

—Mipai tepitehetima Yawé 'ahamatia puyeika, mipai tepiteku'eriwakaku tiratu tepiwewienikeyu. Yuriki tepitahiritianikeyu. Mipai tiratu tepuyurienikeyu:

29 'Eki 'atsipepikatatatsiyurieneki, tameta 'axatepikamatsiyurieki, matsi pita 'aixia 'anemeki tepimatsixeiya, 'aixia 'anemeki tematsihetateutia. Hiki 'eki Yawé 'aixia kameniyurieka.

30 Hiki 'Itsahaki 'ixiarari kaniwaruwewirieni, mekatenukwani miki mekatenu'ieni.

31 'Uxa'arieka ximeri me'anuku'uka yunaiti me'uyu'enieka tiratu mekaniuwewieni, hiki 'Itsahaki kaniwarutateutiani, miki mekanitahiawe hamikutsixi mekanakine.

32 Miki tukaritsie 'Itsahaki teiterimama mekaniu'axiani mipai me'utiyuati xeime putsu hepaitsita:

—Haa tekanetaxeiya tewati'ineka.

33 'Itsahaki kanitateriwa miki haputsu, Tsewa katiniteriwa, 'ayumieme hiki mana kiekari Werit-sewa katinakutewaka.

'Itsahaki Kakaiyari kemitiutahiawixi Kakuwu 'aixia muyurieniki

34 Kepauka 'Etsahu huta tewiyari wiyari mex-eiyakai Yuhuri titewakame kaniutiwitini, Weheri niweya Heti tewiyari. Tawarita xeime tiutiwiti Watsemati titewakame, 'Eruni Heti tewiyari niweya.

35 'Iki 'ukari yuhutati 'Itsahaki meta Xeweka waikawa mekaniwaru'uximatiani, mete'uka'eniwati 'amepu'uwakai hipati memihikikaiki.

27

1 Merikitsi 'Itsahaki kepauka 'ukiratsi matia ka-hauniereti kanayani. Hiki kepauka 'Etsahu katini-utani'airieni yuniwe matari mieme, mipai katini-tahiawe:

—Neniwe.

'Etsahu mipai katinita'eiya:

—Tita perayexeiya nepaapa.

² 'Itsahaki mipai kaniutayini:

—Pepinetsixeiya nepu'ukiratsiri, kwitiwa nepumiwe.

³ Hiki yeuta kenemie 'atupi meta 'a'iri perapiti tixaiti ketinemi'a mitikwaiwa.

⁴ Witsi'aneame kenenekawewiri minetsinake hepai, kenene'atiiri nemikwaniki. Hiki 'ana Kakaiyari nepitawawirieni 'aixia mimatsiyurieniki nekamiwetikuxi.

⁵ Hiki Xeweka kanita'enakaitini, 'Itsahaki yuniwe 'Etsahu kemitikihawekai, 'ayumieme 'amiretia 'Etsahu yeuta reumiemieka yupaapa hetsiemieme,

⁶ Xeweka yuniwe Kakuwu mipai katiniutahawe:

—Neuxei, 'apaapa nepe'eni 'Etsahu matia pitekuxataakai, mipai pitekikihawekai:

⁷ ketinemiemie kenenekawewiri tsiha'aneame nemikwaniki. Mipaitsiere pitehiawe kename 'aixia 'iyurieni Yawé hixie mexi kamiwe.

⁸ Hiki keneneu'eni neniwe kenemimatitahawe, yaketinekaye'a.

⁹ Kenemie tsipuri memuyename keniwarahapani yuhutame 'etsimemipepe 'aixia memi'anene nepikawewirieni 'apaapa 'itsari tsiha'aneame minake.

¹⁰ 'Eki pepenu'irieni meikwaniki mipai miki Kakaiyari petawawirieni 'aixia mimatsiheyurieniki kamiwetikakuxi.

11 Perutsi Kakuwu yumaama mipai katiniutahiawe:

—Neuxeitsi, peru nematsika 'Etsahu kwiniemieme pihuhuxa neta hawaiki.

12 Xika nepaapa netsihemayiani, pihetamani ke-name neti'itaiyane, 'anari peitawawirieni 'ax-anemi'itiariekaki, 'aixia nemi'itiariekaki pikatixai.

13 Hiki maamaya mipai katinitahiawe:

—Neuxei nepita nehetsie ketiunake miki 'axami'ane. 'Ekiti yaketineuyuri kenemimarahiawe, kenemie kapuratsixi kenenehaniriemie.

14 Kakuwu tsipuri kaniwarekuhapani yumaama kani'atirieni, miki 'itsari kanikawewirieni kemitinakekai 'Itsahaki.

15 Hiki Xeweka 'Etsahu kamixaya kaniwayehurieni 'aixia mi'ane mi'utakai yukiita, miki Kakuwu kananakatitiani.

16 Hikita kapuratsixi wanawiyariki mamateya kaniuti'eima, meta kiipitiana hakewa mikaheuhuxakai,

17 hiki Xeweka Kakuwu yuniwe katiniyetuirieni 'itsari paa mame.

18 Kakuwu yupaapa hetsia nuaka mipai katinitahiawe:

—Nepaapa.

'Itsahaki mipai katiniuta'iwauni:

—¿Kemi'ane neniwe 'eki peputaine?

19 Kakuwu mipai katinita'eiya:

—Ne 'Etsahu neputaine, 'aniwe mexiakame. 'Ari nepihewewi kepeminerahiawekai. Kenanukukeka ketineukwa'i tita nemiremi,

'anari Kakaiyari pepitawawirieni 'aixia minetsiyurieniki.

²⁰ Hiki 'Itsahaki kanita'iwawiya:

—¿Kwitiwa kuta peremi, neniwe?

Kakuwu mipai katinita'eiya:

—Yawé 'akakaiyari pinetsihewarewi nemeitax-eiyaki kwitiwa.

²¹ Hutarieka 'Itsahaki mipai katinitahiawe:

—'Ena 'aurawa kenayaka nemetsimayiani mipai nemiretimaniki xika 'aku neniwe 'Etsahu peyianeni.

²² Kakuwu 'aurawa kaniuyani paapaya 'imayaka mipai kaniutayini:

—Kakuwu hepai pepitiuxaxata, peru mamate 'Etsahu pimamateya.

²³ Hiki paapaya pikaheitima, mamateya muhuxatikateiki 'Etsahu hepai. Kepaukari Kakaiyari mitawawirienikeka 'aixia miyurieniki,

²⁴ tawarita kanita'iwawiya:

—¿Yuriki 'aku neniwe 'Etsahu petiyiane?

Kakuwu mipai katinita'eiya:

—Yuriki ne nekaniyaneni.

²⁵ Hiki paapaya mipai kaniutayini:

—Netinatuiiri neniwe nemitikwaniki tita pemiremi, hiki Kakaiyari nekanitawawiriemiki 'aixia mimatsiyurieniki.

Kakuwu katinekatu'irieni paapaya mitikwaniki, meta kaxie winuyari kanikatu'irieni, 'Itsahaki katiniukwani meta kananu'ieni.

²⁶ Hiki paapaya mipai katinitahiawe:

—'Aurawa kenaye'a neniwe, keneneu'itsi.

27 Kakuwu 'aurawa kaniuyani kani'itseni.
Kepauka 'Itsahaki mi'ikwixi kamixaya, hiki
Kakaiyari kaniutawawirieni 'aixia miyurieniki,
mipai 'utaiti:

«Huu, 'iki neniwe 'itsita timieme hepai pi'ia
Yawé 'aixia miyuriekaiki.

28 Kakaiyari waikawa wiyeri kematsi-
heyení'airiwani muyuawitsie mieme,
waikawa pemiukaxexeianiki 'ena kwiepa
timieme
tiriku meta kaxie winuyari.

29 Waikawa teiteri 'ahetsia mekete'uta'uximayata,
nuiwarite 'ahixie meke'utitunuma'uni.

'Ai'wamatime peketiwaruta'aitiani,
'amaama niwemama 'ahixie
meke'utitunuma'uni.

Kemi'ane 'axamimatsiyurieni mikita
'axapi'itiarieka,
meta kemi'ane 'aixia mimatixeyani mikita
'aixia pi'itiarieka».

30 Hiki 'Itsahaki yuniwe hetsiemieme Kakaiyari
'utawawirieku, Kakuwu 'amitiwayetia 'Etsahu
kaninuani rekumieka.

31 Mikita katiniukawewieni 'ikwaiya, yupaapa
katine'irieni, mipai katinitahiawe:

—Nepaapa, kenanukukeka ketineukwa'i tita
nemiremi. Hiki Kakaiyari keneutawawiri 'aixia
minetsiyurieniki.

32 Hiki 'Itsahaki kanita'iwawiya.

—¿Kemi'aneta 'eki peputaine?

'Etsahu mipai kaniutayini:

—Ne 'Etsahu neputaine, 'aniwe 'anemiyumate.

33 'Itsahaki kaniutimani 'uyiyiakati mipai kaniutayini:

—¿Kamitsi kemi'ane piyianekai xikepaiti minerekumi 'itsari minetsi'atiiri? 'Eki 'akuxi pekanuawekaku, ne nekanikwani naime. Meta Kakaiyari nekaniutawawirieni hetsiena mieme 'aixia nekaniyurieni, mikiri 'aixia 'itiarieti kanayeimiki.

34 Kepauka 'Etsahu mu'enaxi paapaya kemainekai karima kaniutatsuani yuhiweriet, mipai yupaapa katiniutahiawe ha'ati:

—Ne waikawa nepimatsiwawirie, nepaapa 'aku, Kakaiyari keneutawawiri nehetsiemieme neta 'aixia minetsiyurieniki.

35 Peru 'Itsahaki mipai katinitahiawe:

—'Amuta kaneukuyeixiani kane-tiniu'itaiya, mikiri naime katinepiini tita miti'ahetsiemiemetikai.

36 'Etsahu mipai kaniutayini:

—'Ayumieme xiari Kakuwu xepite'iteriwaxi, hikiri hutarieka kaneniukwamana, matiari meri kaneniunawairieni kenemitimexiakame, hikita 'aixia kenemi'itiarienikekai kaneniunawairieni. ¿Pekatiyiwe Kakaiyari pemitawawirieni 'aixia minetsiyurienikita ne?

37 'Itsahaki mipai katinita'eiya:

—Neuxei ne, Kakaiyari neputawawiri Kakuwu hetsiemieme mimati'aitiakaki, nepitawawiri tsiere maremama yunaiti memite'ita'uximayatsirieniki, tiriku waikawa mukaxexeianiki meta kaxie winuyari. ¿Hiki tita netiutawauni 'ahetsiemieme pitiumaweri, neniwe 'aku?

38 Peru 'Etsahu pikatihayewakai:

—¿Xeimieme xeikia petiyiwakai Kakaiyari pemitawawirieni 'aixia xewiti xeikia mi'itiarieniki? Keneutawawiri Kakaiyari neta 'aixia minetsiyurieniki.

Mipai 'utayika tawarita kaniutatsuani karima.

³⁹ Hiki 'Itsahaki mipai katinitahiawe:

«'Eki kwiepa 'aixia miraku'anetsie
pepika'uyeikani,
wiyeri muyuawitsie makaneika makaxiruwe
pepika'uyeikani.

⁴⁰ 'A'ixiparaki pe'amieneti pepuyeikani,
'amuta pepiti'uximayatsirieka.

Peru kepauka petirikaiyeti pemayani,
pepiyuxina kemimati'aitia».

Kakuwu kemitiuyuta'unaxi

⁴¹ Mana mitiyetia, 'Etsahu Kakuwu kani-hekakaitini paapaya Kakaiyari mutawawiriki hetsiena mieme 'aixia miyuriekaki. 'Etsahu mipai katiniku'eriwakaitini: «'Arikutari kwitiwa pimini nepaapa miyuke, nemuta Kakuwu nepimieni».

⁴² Hiki kepauka Xeweka miretima 'Etsahu kemitiku'eriwakai, Kakuwu kaniuta'inieni mipai katinitahiawe:

—Neuxei, 'a'iwa 'Etsahu pimatsimiemiki pemitinawairiki.

⁴³ 'Ayumieme neniwe, keneneu'eni:
Keneuyuta'una Karani paiti, ne'iwa kie Rawani,

⁴⁴ miki hetsia kenekani kepaukake 'amatsika miratimaiya ha'ati.

⁴⁵ Ratimaiyayu kepemitiuyuri, 'anake niuki nepanuni'ani pemamieki. Yanepikara'eriwa tietitsi xeitukaritsie yunaiti xemineuyukwixia.

⁴⁶ Hiki Xeweka 'Itsahaki mipai katiniutahiawe:
 —Neri nepikayiwe 'anemuyeikani 'iki hetitsixi
 wahamatia 'Etsahu 'itamama mepinetsihiweritia.
 Xikata Kakuwu Heti tewiyari 'utiwitini 'ena
 kiekame Kanani matsi 'aixia piyinikeyu xika
 ne'uminike.

28

¹ Hiki 'Itsahaki Kakuwu katiniutani'airieni.
 'Aixia kaniyurieni, meta mipai katinita'aitiani:

—'Uka 'ena Kanani kiekame pepika'utiwitikini.

² Hiki kwitiwa kenemie Parani-'Arami paiti,
 'ateukari Wetuheri hetsia, xeime kenetiwitiki
 'atatatsi Rawani niweya.

³ Kakaiyari Naimekimitirikaiye 'aixia
 kematsiyurieka waikawa peke'utaxiini, 'ahetsie
 memiyekineki nuiwarite yuwaikawati.

⁴ 'Ekita kematsiyetuirieni meta 'anuiwarima
 'Apirahami 'aixia kemuyuriekai, 'iki xepiini
 mayaniki hiki temanu'uwa teewanarixi wahapai,
 'Apirahami kemitiutahiawarie 'iki kwie hepaitsita.

⁵ Mipai titahiaweka kaneini'ani yuniwe
 'Itsahaki Parani-'Arami kwieyaritsie Rawani
 hetsia, 'Etsahu meta Kakuwu wamaama Xeweka
 matsikaya hetsia, Rawani matia Xeweka
 Wetuheri piwapaapatikai 'arameu tewiyari
 kanihikitikaitini.

⁶ 'Etsahu katinetimani kepauka 'Itsahaki
 Kakuwu 'aixia miyuriekai meta kename
 heini'akai Parani-'Arami kwieyaritsie paiti
 mana metineikeki. Yaxeikiata katinetimani
 kepauka paapaya 'aixia 'iyurieka, mipai
 mititahiawixi kename 'uka mana Kanani kiekame
 katiwitikinikekai,

⁷ meta Kakuwu kepauka metia Parani-'Arami paapaya meta kememitehehiawekai.

⁸ 'Ana mipai katinetimani 'Etsahu, kename paapaya 'ukarawetsixi Kanani kiekatari kawanaki'eriekai.

⁹ 'Ayumieme tsepa mineikekai 'Etsahu kaneyani hakewa paiti tatatsieya mekatei 'Itsimaheri 'Apirahami nu'aya. Mana xeime kaniutiwitini nu'ayatime Makarati titewakame, Newayuti taruya kanihikitikaitini.

Kakuwu Weteri kemitiuheini

¹⁰ Kakuwu kanayeyani Weritsewa, huye kananukuweiya Karani haneme.

¹¹ Kepauka tau makayunixi 'umiekaku mana kaniukateitini, tete kaniutituni kanikamu'urita, hiki 'ukahuka kaneukuni.

¹² Mana katiniuheinini, 'imimui 'ahatayeume kaniuxeiya kwiepa yuwetikaime muyuawitsie heutiyuneme, miki 'itima mekananutikikaitini niuki tuayamete Kakaiyari hetsia miemete me'anutikikame me'anakakikame.

¹³ Metatsiere Yawé kaniuxeiya 'auriena 'uweme, mipai tikihiaweme: «Ne Yawé nepihiki 'ateukari Kakaiyarieya 'Apirahami meta 'apaapa 'Itsahaki. 'Eki yaxeikia 'anuiwarima 'iki kwie nepixeyetuirieni mana hiki pemanukatsie.

¹⁴ Miki yumiireti mepakine kwie tumuanariyari hepai. 'Amepitayeure 'ayeta, 'atsutia, 'atserieta, 'a'utata meye'atikaiti meta yunaiti nuiwarite kwiepa memitama 'aixia mepi'itiarieni 'eki 'akimana meta 'anuiwarima».

¹⁵ Ne 'ahamatia nepuyeikani. Nepimatsi'iwiyani tsepa hakewa pemeyeika,

meta nepimatsi'akunuitiani 'iki kwieyaritsie.
Nepikamatsiku'eirieni neraye'atiameke
kenemutayikai».

16 Kepauka Kakuwu manutanierixi mipai
katiniu'erieni: «Yuriki Yawé 'ena puyeika, ne
'atsinepikatimaikai».

17 Heumatiri waikawa tawarita mipai kaniu-
tayini: «'Ena xiri pakupatsie, 'ena xiri pihiki
Kakaiyari kie, muyuawi kitenie piti'ane».

18 'Uxa'arieka ximeripaiti kananukukeni
Kakuwu, tete kaniutituni mimu'uritakai
'a'uweme kanayeitiani huriwa hatseitiyariki
kanika'iya patsiekame kanayeitiani.

19 'Ana mana kiekari kanikumakaitini
'Arimetira maku'u titewati, peru Kakuwu
kanipata Weteri pita katiniteriwa.

20 Hiki mana Kakuwu mipai kaniutayini: «Xika
Kakaiyari nehamatia 'uyeikani netsi'wiyani
hakewa nemeutia, xika neremikwani meta
nereketiaka,

21 xika ne'akunuani 'aixia nereu'erietu nepaapa
hetsia, hiki 'ana Yawé nekakaiyari kanayeimiki.

22 'Ikita tete 'anemitake Kakaiyari kiiya
kanayeimiki, naime tita Kakaiyari minetimini,
nekaniyetuiiemiki tamamata hetsiemieme
xeime».

29

Kakuwu kemireta'a Parani-Harami

1 Merikitsi Kakuwu kaneyani, tau manatineika
hepatsie kiekatari wakwieyaritsie kaniye'ani.

2 Hiki mana 'uta'aka yeuta haputsu
kaniuxeiya, 'auriena haika tewayari

muxatsi mekani'uxipitiariekaitini mana
memitiharewekaiki. Miki haputsu tete
'ayeukameki kananukanakaitini.

³ 'Ayumieme yunaiti tehiwemete
meyukuxeiriemeke mekaniyexirakaitini, hiki
yunaima mewatiharitame, tawarita yunaiti
mekanenukanarimakaitini haputsu.

⁴ Hiki Kakuwu kaniwaruta'iwawiya
tehiwemete:

—ǂHakewa xepekiekatari xeme?

Miki mipai mekatenita'eiya:

—Karani tepikiekatari.

⁵ Tawarita Kakuwu kaniuta'iwauni:

—ǂKamitsi xeme Rawani xetemate, Nakuxi
nu'aya?

—Huu tepimate —mekatenita'eiya.

⁶ Tawarita mipai Kakuwu katini-
waruta'iwawiya:

—ǂ'Aixia kapireu'erietiti?

Mikita mipai mekatenita'eiya:

—'Aixia pireu'erie. Kamimatsi niweya huma
kanamieni Xakeri muxatsi wara'arieti.

⁷ Hikita Kakuwu mipai katiniwarutahiawe:

—Matsi 'akuxi puximeri, yakipupauka 'akuxi
muxatsi xemiwareunaxianiki wakuraruta, 'aixia
piyini yumuxatsima xekeniwarutiharitiaka
xeketenewamiyu.

⁸ Miki mipai mekatenita'eiya:

—Hawaiki tepikayiwawe mipai temite'uyurieni
taxaitame, teyukwewiemeke tanaiti tehiwemete
tepenuku'iwe tete. 'Anake tepiyiwawe tamuxat-
sima temiwarutiharitiani.

⁹ Wahamatia tikuxatakaku 'akuxi, Xakeri kaninuani muxatsi wara'arieti yupaapa tewamama, miki kaniwahiwemetikaitini.

¹⁰ Hiki kepauka Kakuwu Xakeri muxei, yutatatsi Rawani niweya, mana 'uyaka haputsu kananutiyepieni, muxatsimama kaniwarutiharitiani.

¹¹ 'Anata kwitiwa Xakeri kaniu'itseni, meta kaniutatsuani,

¹² miki katinitaxatiani kename me'iwamarixi Xeweka minu'ayatikaiki. Hiki 'ayumieme Xakeri yapauka 'unautsarimetu kaneyani yupaapa hetsia reitaxatiani.

¹³ Hiki Rawani yumatsu Kakuwu 'utamarioka kaneyani kaneikunake kanitatapa meta kani'itseni, yukie kanei'inieni. Hiki Kakuwu naime katinitaxatiani naime kemireyi,

¹⁴ Rawani mipai katinitahiawe: «'Ekitsi yuheyemeki ta'iwa pekanihikiti».

Kakuwu Reya meta Xakeri kemitiwarutiwiti

Merikitsi Kakuwu xeimetseri kaniukateitini Rawani hetsia.

¹⁵ Mipai katinitahiawe:

—Tsepaneti hurawa pemine'iwa yakixeikia pepikati'uximayaka nehetsia. Yakenetineutahiawi kepaimepepeu'iwamiki.

¹⁶ Rawani yuhutame kaniwarexeiyakaitini yuniwema 'ukari, kurieya Reya pititewakai, taruyata Xakeri.

¹⁷ Reya hixiteya witsipi'anenekai, peru Xakeri witsipitiyuxexeyakai naiti.

¹⁸ Hiki Kakuwu Xakeri mihiwe'eriekaiki yutatatsi mipai katiniutahiawe:

—'Atahuta wiyari nepiti'uximayaka 'ahetsia, 'aniwe yaki miyumate Xakeri nemitiwitiniki.

¹⁹ Rawani mipai katinita'eiya:

—'Aixia kaniyimiki nemimatsiwititaniki 'eki, xeime nemika'imate nemikakuwitiwaniki. Nehetsia keneuyuhayewa.

²⁰ Hiki Kakuwu 'atahuta wiyari katini'uximayakaitini Xakeri mitiwitiniki, hiki 'apikareuterixi tsepa mixa tukari manuyetia waikawa minaki'eriekaiki.

²¹ Hiki Kakuwu mipai Rawani katiniutahiawe:

—'Ari nepiraye'atia kenemutayi. Keneneyetuiriri nemitiwitiniki.

²² Rawani mana kiekatari yunaime kaniwaruta'inieni, 'ixiarari mariweme kaniuwewieni.

²³ Peru kepauka mukiyirixi, kurieya pita Kakuwu kaniyetuirieni Reya mititewakai, 'ana Kakuwu hamatiana kaniukahuni.

²⁴ Reya xeime ti'uximayatame pexeyakai Tsiripa titewakame, 'ayumiemeta Rawani kanixatiani miparewiekaki.

²⁵ Hiki 'uxa'arieka katinetimani Reya matia pita mukateiki, 'ayumieme Rawani mipai katiniutahiawe:

—¿Titayari miyapenetiuyuri? ¿Netami nekamatiuta'uximayatsiri Xakeri nemitiwitiniki? ¿Ketitayari penetiuitai?

²⁶ Rawani mipai katinita'eiya:

—Tame tayeiyari mipai pi'ane 'iki kwieyaritsie, Kurieya meri pitiwikieni 'ariketa taruya.

27 'Ayumieme hiki kenaye'atia tsemana kemireuyewetse, tawarita 'uximayat-sikaki 'atahuta wiyariki tawarita xeime nepimatsiwititiani.

28 Kakuwu mipai katinikayani, kepauka tsemana maye'atia xeimetsie mieme kemireuyewetse, Rawani Xakeri kaniyetuirieni 'iyaya mayaniki.

29 Xakeri xeimeta ti'uximayatame kanex-eiyakaitini Wiriha titewakame, Rawani kaniyetuirieni miparewiewekaki.

30 Hiki Kakuwu kaniukahuni hamatiana, waikawa matsi Xakeri kaninaki'eriekaitini Reya 'akuxi matsi 'etsiwa, tsepa 'akuxi 'atahuta wiyari tawarita Rawani mitiuta'uximayatsiri.

Kakuwu niwemama

31 Kepauka Yawé Reya muxei kanaki'eriwame, kanipitiani türi miwarayexeiyaki, Xakeri 'akuxi pikaniwewekai.

32 Hiki Reya kaniutihukata, xeime 'ukitime kaniutiniweni Xuweni katiniteriwa, mipai 'utayika: «Yawé pinetsi'uxei kenemistinehiweriekai, hikirixia nekina pinetsinaki'erieka».

33 Hutarieka kaniutihukata xeimetsiere 'ukitime kanayexeiya, Tsimehuni katiniteriwa, mipai 'utayika: «Yawé pe'enaxi, kename nekanaki'eriwa, 'ayumieme xeimeta pinetsiheyeni'airi nunutsi 'ukitime».

34 Hairiekata kaniutihukata xeime nunutsi 'ukitime kanayexeiya, Rewi katiniteriwa, mipai 'utayika: «Hikirixiari nekina netsinaki'erieti payani, yuhaikameri türi hetsiena mieme nemiwarayexeiki».

35 Nauriekata kaniutihukata Reya, xeime 'ukitime kaniutiniweni, Kura katiniteriwa, mipai 'utayika: «Hiki Yawé nekanitaniawamiki». Mipai tiuniweka tawarita pika'utiniwexi.

30

¹ Kepauka Xakeri tiri mikawarayexeyawekai Kakuwu hetsiemieme, yukuri kani'uxiwe'erikaitini, hiki Kakuwu mipai katiniutahiawe:

—Neta keneneupitia tiri nemiwaxexeyaki, xika pekanetsi'upitiani, nepimini.

² Hiki Kakuwu kaniuyeha'ani waikawa, mipai katinitahiawe:

—¿Ne Kakaiyari peneti'erie? Miki kanihikitini pekaniweweme mimatsi'ayeitia.

³ Xakeri mipai katinitahiawe:

—Mana puka neti'uximayaitsiriwame Wiriha, hamatiana keneukahu'i. Kepauka meyexeya ne-tunutetia pihiani, neta 'ana nepiwarexeyani tiri miki tiyurieyu.

⁴ Hiki Xakeri Kakuwu kaniyetuirieni tiyu'uximayatsiriwame Wiriha 'iyaya mayaniki, Kakuwu hamatiana kaniukahuni.

⁵ 'Ana Wiriha kaniutihukata, xeime nunutsi mekanayexeya Kakuwu matia.

⁶ Xakeri mipai kaniutayini: «Kakaiyari nehetsiemieme 'aixia katiniuyurieni. Kenemitiyuiweriekai kaneniu'enieni, xeime nunutsi kaneneyeni'airieni». 'Ayumieme Xakeri Rani katiniteriwa.

⁷ Tawarita Wiriha Xakeri parewiwameya, hutarieka kaniutihukata mekaneyexeya xeime tawarita nunutsi 'ukitime Kakuwu matia.

⁸ Xakeri mipai kaniutayini: «Mariwemeki nepinemiene nekuri hamatia, hiki peru nepirayu'iwa». 'Ayumieme Xakeri Nepitahari katiniteriwa.

⁹ Reya timaitiri tawarita mikatiniwekekaiki, tiyu'uximayatsiriwame Tsiripa Kakuwu kaniye-tuirieni 'iyaya mayaniki,

¹⁰ mikita xeime mekanayexeiya nunutsi Kakuwu matia.

¹¹ Hiki Reya mipai kaniutayini: «Nehetsie pīreuyiwe». 'Ayumieme Kahari pititeriwaxi.

¹² Hutarieka Tsiripa, Reya ti'uximayatameya, Kakuwu matia xeime nunutsi 'ukitime mekanayexeiya.

¹³ Reya mipai kaniutayini: «Waikawa nepinetemawie. 'Ukarawetsixi mipai mepinetekihaweni pepi'atemawie». 'Ayumieme miki 'Atsexi katiniteriwa.

¹⁴ Merikitsi tiriku mati'itsanariwa tukariyarit-sie, Xuweni kaneyani mirati'uximayatsiwatsie, mana 'ikwaxi kanetaxeiya manirakura, yumaama Reya kanetikirieni. Hiki Xakeri mipai Reya katiniutahiawe:*

—Neuxei, miki manirakura keneneumikwa 'et-siwa 'aniwe mimatsi'atiri.

¹⁵ Peru Reya mipai katinita'eiya:

—'Aiyari 'aixia kati'ane nekina peminetsi'unawairi, 'akuxita hiki manirakura penetinawairiemiki neniwe mi'atia.

Mipai katinita'eiya Xakeri:

* **30:14 30:14** manirakura. *Tupiriya 'itsita mieme miniweweniki 'uayeyari mepi'eriekai 'ana, yeri-yari tewi hepai pi'anekai, 'ikwaxiyari witsipu'iatikatei.*

—Xika penetsi'umini manirakura 'aniwe mi'atia hiki tikariki Kakuwu 'ahamatia pikahuni.

¹⁶ Hiki kepauka Kakuwu munua taikai, Reya kaneikunake mipai katinitahiawe:

—Hiki tikariki nehamatia pekanikahuimiki, ne 'akimana nekatiniupata 'ikwaxi manirakuraki neniwe mi'atia.

'Ana tikariki kaniukahuni Kakuwu Reya matia.

¹⁷ Kakaiyari Reya kaniu'enieni, miki kaniutihukata 'auxiwirieka nunutsi 'ukitime Kakuwu matia mekaneyexeia.

¹⁸ Reya mipai kaniutayini: «Kakaiyari kanetini-upitiani ti'uximayatame nekina nemuwititiaki». 'Ayumieme 'Itsakaxi katiniteriwa.

¹⁹ Tawarita Reya kaniutihukata, 'ataxewirieka nunutsi 'ukitime mekanayexeia Kakuwu matia.

²⁰ Reya mipai kaniutayini: «Kakaiyari 'aixia pinetsi'uyuri 'aixia ti'aneme pinetiumi, hikiri nekina 'aixia pinetixeiyani, 'ataxewirieka nunutsi temayexeiki». 'Ayumieme Tsawuruni pititeriwaxi.

²¹ 'Imatirieka Reya xeime 'ukatime kanayexeia Rina katiniteriwa.

²² Meta Kakaiyari Xakeri kanaye'erieni, nenewierieya kaniu'enieni kanipitiani mitiniweniki.

²³ Hiki miki kaniutihukata xeime 'ukitime kanayexeia. Mipai kaniutayini: «'Ax-anemikaramamatiwaniki pineranuyeitiiri Kakaiyari».

²⁴ 'Ayumieme Kutse pititeriwaxi, mipai 'utayika: «Xika tima tiyiwenike Yawé netsi'upitiani ke xeime tawarita nemitiniweniki».

Kakuwu rexeiyati kemiratia

25 Hiki 'ari Xakeri Kutse 'ayexeiyaku, Kakuwu Rawani mipai katiniutahiawe:

—Keneneupitia nemiyemieki nekiepaiti.

26 Keneneyetuiriri ne'itama kimana nemimatiuta'uximayatsiri meta neniwema, keneneupitia nemiyemieki. 'Eki pepitimate kenemiti'uximayakai 'ahetsiemieme.

27 Rawani mipai katinita'eiya:

—Neuxeitsi, pepikaheyeikani. Ne mipai nepiretima Yawé 'aixia pinetsiyurie, 'eki penetsiparewiekaku.

28 Mipaitatsiere katinitahiawe:

—'Eki yakeneutayiki kepaimepe pe-meu'iwamiki, ne mipai nepimatipitiani.

29 Kakuwu mipai katinita'eiya:

—'Eki pepitimate kehepai nemiti'uximayakai, neyuhitiatu kenemitiwa'iwiyakai 'atewama.

30 Kepauka nekanuawekaku pemirexeiyakai pikatimiirekai, hikiri waikawa mepite'utamirixi, ne netiyurienekaku Yawé 'aixia pimatsiyurie. Hikiri ne xaitsie nepitita'uximayata netiriyama wahetsiemieme.

31 Rawani mipai katinita'iawawiya:

—¿Kepaimepe pepau'iwamiki?

Kakuwu mipai katinita'eiya:

—Pepikanetikupitiwani. Xika 'eki yapetiutanaki'erieni kenemimatitahiawe, nekaniwa'iwiyakamiki 'amuxatsima.

32 Hiki ne kepauka yunaime 'amuxatsima memuyenatikatsie nemuyeyani, 'eki pepiwaranuyeteixi memeuyiyiwi, memeukutuxa,

meta tsipuri memeukuyiyiwi memeukutuxa. Miki nem'iwa'iwani mekanihikitikakuni.

³³ Hiki kepauka 'uxa'a peminierimie keyupaimeme nem'iwara'iwaxiri ke'aixia nemitiuka'iyari pekatinetimaimiki: Xika xeime pehetaxeiya muxa yatini tsipu kaheukuyiyiwime kaheukutuxame meta muxa kaheuyiwime tatsiari ne nematsi'unawatsirieku.

³⁴ Rawani mipai kaniutayini:

—'Aixia piyini, yanepira'eriwa kepemaine.

³⁵ Hiki kwitiwa miki tukaritsie kani-waranuyeteixi tsipuri 'ukitsi 'ukari, memeukuyiyiwi, memeuririnawi, yunaime kemi'ane 'etsiwa memeukutuxa, metatsiere yunaime muxatsi memeuyiyiwi, miki yunaime kaniwaruhiritiani yuniwema.

³⁶ 'Ana Rawani kaneyani haika tukari heteewakaku Kakuwu manukateitsie yeyaka. Peru Kakuwu yaxeikia kaniwa'iwiyakaitini memuyuhayewaxi Rawani tewamama.

³⁷ Kakuwu meta haramu kaniutiwiteni yuyurime meta 'arimerituru metatsiere karu kiyeyari, miki kanikaxixiexiani 'ukatuxati kanayani.

³⁸ Miki kiyexi mixixiyatika kaniuka'uitiani muxatsi wahareweme matinenieretsie 'auriena memitihareweniki. Kepauka muxatsi 'ukari meyuweiyaniati mematiharewetsie mekani'axekaitini,

³⁹ 'ukitsi mekaniwarutiweweyakaitini 'ukari mana kiyexi mixixiyatika hixie, mipai 'ana mekaniwarayexexeyakaitini meheuririnawime, meheukutuxame, meheukuyiyiwime.

⁴⁰ Hiki Kakuwu xaitsie kaniwakupatakaitini memeuririnawi wahetsia, memeuyiyiwi Rawani muxatsimama wahetsia. Mipai tiuyurieka yute-wama warexeiyati kanayani Rawani tewamama wahepai meka'aneneme.

⁴¹ Matsi kepauka muxatsi 'ukari memi'axekai 'amemipapa, Kakuwu kanika'uitiwakaitini kiyexi, hixiena memuyutiweiyaki.

⁴² Peru kepauka memi'axekai memiwawaki, 'ana pika'ika'uitiwakai kiyexi. Miki memiwawaki Rawani hetsia miemete mepihikitikai, memiwaiyatikata Kakuwu hetsia miemete.

⁴³ Mipai 'ana Kakuwu waikawa rex-eiyati kanayani, yuwaikawame muxatsi, te'uximayatamete 'ukitsi 'ukari, puxuri meta kameyutsixi.

31

Kakuwu kemitiyuta'unaxi Rawani hetsia

¹ Hiki Kakuwu mipai katiniuyumarieni kename Rawani niwemama mipai me'utiyuanekai: «Kakuwu naima katinepiini tapaapa tewamama, piiniteyaki waikawa rexeiyati kanayuyeitiani».

² Yaxeikiata Kakuwu katinetimani Rawani 'aixiari mikatixeyakaiki meripaiti kemikatixeyakai.

³ Hiki Yawé Kakuwu mipai katiniutahiawe: «Kenakunua 'apaapa kwieyatsie, hakewa 'aiwama meme'uwa, ne 'ahamatia nepuyeikani».

⁴ Hiki Kakuwu katiniutani'ani yu'itama Xakeri meta Reya waheki, muxatsi miwarahinetsie paiti,

⁵ mipai katiniwarutahiawe:

—Mipai nepitimate xepaapa 'aixia pikanetixeyari meripaiti hepai. Peru tsepa, nepaapa Kakaiyarieya pinetsiparewie.

⁶ Xeme xekatenimaika kenemitiuta'uximayataxi xepaapa Rawani hetsiemieme neyutatuati yuheyemeki.

⁷ Peru miki matsi miixa pinetsi'ukwamanaxi, waikawa 'ikupatati ne'iwarika. Peru Kakaiyari pika'ipitia 'axaminetsiyurieniki.

⁸ Kepauka mipai minetikihiawekai: «Yunaiti tewaxi memeupipitu 'a'iwarika mepakine», 'ana 'ukari yunaiti mepiwatiniweyakai meheupipitume xeikia. Kepaukata mipai minetikihiawekai: «Yunaiti tewaxi memeuririnawi 'a'iwarika mepakine», 'ana 'ukari yunaiti mepiwatiniweyakai meheuririnawime xeikia.

⁹ Mipai Kakaiyari xepaapa tewamamata katini-unawairieni, nepita kanetiniupitiani.

¹⁰ »Merikitsi kepauka tewaxi mematiniweiyatsie 'ana mipai nekatiniuheinini. 'Ukitsi mekaniwaweyatiwekaitini 'ukari, memeuririnawi meta memeupipitu.

¹¹ Miki heinitsikatsie meta niuki tuayame Kakaiyari hetsia mieme, mipai kanetiniutahiawe: “Kakuwu”. 'Ana mipai nekatinita'eiya: “Ena nepuyeika”.

¹² Hiki miki mipai kanetiniutahiawe: “Paratsi keneuyi'wiya, tuurutsixi 'ukari memiwaweyatiwe mekaneuririnawini meta mekaneupipitini. Ne nepitimate kemimatsi'uyuri Rawani.

¹³ Ne Kakaiyari nekanihikitini Weteri nemu-nehekiataxi, hakewa mawari pemewewi nehet-

siemieme tetetsie, meta kepemainekai nehixie. 'Ayumieme kenanukukexi 'iki kwieyaritsie, kene-mie kemi'ane kwieyaritsie pemetinuiwaxi'».

¹⁴ Xakeri Reya matia mipai mekatenita'eiya:

—Tixaitiri tame pikatatikupinierie tapaapa tahetsie timieme.

¹⁵ Matsi mikatatsimatani hepai pitatixeiya. Pitatsi'utua, miki naimeri pitiutixitia tita mirakapitiarie tahetsiemieme.

¹⁶ Kaniyuritini Kakaiyari naime mitinawairi tapaapa mirexeiyakai tahetsiemieme katinihikitini meta tatiriyama wahetsiemieme. 'Ayumieme yaketineuyuri Kakaiyari kemimarahiawe.

¹⁷ Hiki Kakuwu kaniyukuha'aritan, yuniwema yu'itama kaniwaranutiyatsa kameyutsixi wahetsie.

¹⁸ Yunaime tiwara'arieti yutewama Parani-'Arami mitiukaxeiyakai, mekanekine Kanani me'eriet, 'ukiyarieya 'Itsahaki manukateitsie.

¹⁹ Mexi Rawani yumuxatsima warexinegai, Xakeri yapauka heyaka kaniwarunawani kakaiyariximama.

²⁰ Mipai katinikwamana Kakuwu Rawani 'arameu tewiyari, kaniuyuta'una 'atsikati-tahiaweka.

²¹ Kakuwu kaneyani yunaime tiwara'arieti tita mirexeiyakai. 'Epirata hatuxameyaritsie 'uyeyaka, muhiriyatsie Karaha kanitiyune.

Rawani Kakuwu kemiranukuweiyaxi

²² Hairieka tukari 'anukayaku Rawani katiniutaxatiarieni, kename Kakuwu 'uyuta'unakai.

23 Hiki Rawani kaniwarukuxeirieni yu'iwamarixi, miki mekaniwaranukuweiya 'atahuta tukari mekaniuhukaitini, mekani-waranuku'axeke Karaha hiriyaritsie paiti.

24 Perutsi miki tikaritsie Kakaïyari Rawani 'arameu tewiyari katiniutaxatiani kutsukaku mipai katinitahiawe: «'Amarima 'aixia Kakuwu pepika'utate'ani».

25 Rawani Kakuwu kaniwaranuku'axe Karaha hiriyaritsie miki mana me'uxipiekaku. Metatsiere Rawani mana kaniyuhayewa yu'iwama warawititi.

26 Mipai Kakuwu katiniutahiawe:

—¿Kepetiuyuri 'aku? Pekanetiniu'itaiya, neni-wema pekanwareyewitini pìretsutsixi wahepai.

27 ¿Ketitayari pereyetia 'atsipekanere-tahiaweka? Ne 'aixia 'anemeki nekameneta-teutianikekaitini neyutemawieti ne xawererutsixi nepiwareta'inienikekai.

28 Tsikere neniwema nemiwareti'itsenikekai pepikanetsihepitia meta neteukarima. Pemika'uka'iyarini hepai pepeyi.

29 Ne nekaniyiweni nemitixe'utikwinitiani, peru 'iki tikaritsie 'apaapa Kakaïyarieya pìneretaxatia mipai pìneretahiawixi: “Amarima 'aixia Kakuwu pepika'utate'ani”.

30 Mipai nepiretima 'apaapa manuyeikatsie peyeimiti pepiyiane, ¿peru ketitayari petiwarenawa nekakaïyarixi?

31 Kakuwu mipai katinita'eiya:

—Ne yemeki waikawa ne petima, mipai nepire'eri ne'itama penetsihenawairienike nepe'eriekai.

³² Keniwarutiwawa 'akakaɪyarixi, kemi'ane pemiɬaxeirieni miki ke'ukumawere. Ta'iwama memunenierixi mekanakinikuni: Ketineutiwawa tita miɬi'apiini, ketinapiti.

Perutsi Kakuwu 'atsipikatimaikai, Xakeri Rawani kakaɪyariximama miwarenawakai,

³³ Hiki Rawani Kakuwu xamaruyata meri kaniuti'iwauni, kwitiwata Reya xamaruyata meta memiyuhuta te'uximayatamete 'ukarawetsixi waxamaruta, nitixaiti pikatiukaxei. Kepauka Reya xamaruyata miwayetia, Xakeri xamaruyata kaneutahani.

³⁴ Hiki Xakeri kakaɪyarixi kaniwaruti'awieta kameyu xirayatia, mipai tiuyurieka waheima kanayerini. Rawani naime kaniu'iwauxiwiya, miki pikawarutaxei.

³⁵ Hiki Xakeri yupaapa mipai katiniutahiawe:

—Neuxeitsi, nepitikuye, nepaapa, 'ukarawetsixi ketemiyitika mipai nepi'ane, nepikayawe 'anemu-takeni pepikaha'aka.

Rawani kakaɪyarixi kaniwarutiwauni, peru pikawarutaxei.

³⁶ Merikitsi Kakuwu kaniuyeha'ani, Rawani hepaitsita mipai katinenutahiawixiani:

—ǂKekuta yemeki netiuyuri, xurikime nekapeu-tiwiwexia, titayari miya petatiyuriene?

³⁷ Nepiinite naime pemitutixei, ǂtita petiukaxei miɬi'apiini? Xika tixaiti petiutaxeiya, ta'iwama wahixie ketinekupini, miki yameke'utiyuani kemi'ane tame temitahuta heitserie pexeya.

³⁸ Xeitewiyari wiyari 'ahetsia nepuyeikakai, 'amuxatsima 'atsipurima hatsuaku

mepika'anuye'ikwiti^{axia}, nitima xeime muxa nepika'utakwai 'akurarutamieme.

³⁹ Xeime hatsuaku nepika'atia 'irawe 'itexierieya, nepita nepirayukatuayakai mikiki. Yaxeikiata hekita tikariki meminawarietiwakai 'eki mikiki pepinetsiwiyakai.

⁴⁰ Tukariki xiriki nepitiuka'eniwakai, tikariki xeriki neputimimiwekaitima, yemeki nepikatikukutsukai.

⁴¹ Xeitewiyari wiyari 'akie nepuyuri, tamamata heimana nauka wiyari nepiti'uximayakai 'aniwema wahetsiemieme, 'ataxewime wiyari 'atewama nepuwahikai, peru 'eki miixa pepipataxi kenemiti'iwakai.

⁴² Xika nepaapa Kakaiyarieya 'Itsahaki meyemakaxe, meta 'Apirahami Kakaiyarieya, xika kanetsiparewiekake, 'eki nemaweme pekanenanuni'anikekaitini. Kakaiyari pinetsi'uxei kenemitiuka'eniwakai neti'uximayati, 'ayumieme takai tikariki kename ne heitserie nehexeiya putayi.

⁴³ Rawani Kakuwu mipai katiniuta'eiya:

—'Iki 'ukari mepineniwema, 'iki temari mepineteukarima, muxatsitsiere mepinetewama, tita pemirexeiya nepiini pitihiki naiti. ¿Ketsukuta newaruyurieni 'iki neniwema neteukarima?

⁴⁴ Matsi tiratu tepiwewieni 'eki matia ne, miki tiratu teme'eriwaniki mipai temitemaikaki.

⁴⁵ Hiki Kakuwu tete 'anukutuka 'akanitakeni 'iniari hepai,

⁴⁶ mipai katiniwarutahiawe yu'iwama:

—Tetexi xekeneukuxeri.

Miki mepititikixia, 'axeikia mepikuxeiri, mana mepite'ukwai, tetexi makuxeirietsie.

⁴⁷ Mana Rawani Yekaxi-Tsaruta katiniuteriwa meta Kakuwu Karaha katiniteriwa.*

⁴⁸ Rawani mipai kaniutayini:

—'Iki tetexi 'ena mukuxeirie teme'eriwaniki pi'iniaritini.

'Ayumieme mana Karaha pitiuteriwariwakai,

⁴⁹ metatsiere Mitsipa pitiuteriwariwakai, Rawani mipai mutayiki:

—Yawé ketatsixeyani kepauka tahamatia temika'u'uwanitsie tame teyuhutati.

⁵⁰ Xika 'eki neniwema 'axapewareyurieneni, xika hipame pita pewaretiwitini 'ukari, kena'eriwani Kakaiyari yapiretima, tsepa xewiti tawarita mikatatsixeya.

⁵¹ Rawani tetexi 'itiiyati mipai kaniutayini:

—Keneuxeiya tetexi mukuxeirie meta tete temikake.

⁵² Miki ya'ane mepimaika kename 'eki meta ne 'ena teka'anuyekikani 'axatetatiyuriexianike.

⁵³ 'Apirahami Kakaiyarieya meta Nakuxi Kakaiyarieya ta'itsikame kehikitini.

Hiki Kakuwu 'aixia kaniutayini Kakaiyari hepaitsita paapaya 'Itsahaki mimakaxekai hetsie.

⁵⁴ Hiki mawari kaniuwewieni yemuri 'amanu-titewatsie paiti, yu'iwama waruta'inieka yunaiti memitehekwaniki. Yunaiti mete'ukwakari, mana mekanitiheteitini.

⁵⁵ 'Uxa'arieka ximeripaiti Rawani 'anukukeka, yuteukarima kaniwaruti'itseni Yawé wawirieti

* **31:47 31:47** *Yekaxi-Tsaruta 'aramauki paine meta hepirayuki Karaha, 'iniari mitihekiata panuyine.*

'aixia miwayuriekaki meta yuniwema, hiki nakunuani yukie.

32

Kakuwu 'Etsahu hetsia yuteiterima kemitiwareni'a

¹ Merikitsi Kakuwu kanayeyani kemitimiekai, 'umiekaku mekanenukunake niuki tuayamete Kakaiyari hetsia miemete.

² Kakuwu waruxeiyaka mipai kaniutayini: «'Ena xiri Kakaiyari manuka piti'ane». 'Ayumieme mana Makanahini pitiuteriwaxi.

³ Hiki Kakuwu kaniwareni'ani yuteiterima 'Etsahu hetsia, Tsehixi kwieyaritsie paiti, 'Erumi mirakutewatsie.

⁴ Mipai katiniwarutahiawe mipai memiteheitahiaweki: «Neti'aitiwame 'Etsahu, mati'uximayatsiriwame Kakuwu, pitatsiheyeni'a mipai tematetaxatianiki miki Rawani kie pekatei kemireuterixi,

⁵ hiki piwarexeiya wakaitsixi, puxuri, muxatsi, te'uximayatamete 'ukitsi 'ukari. Mipai pireyeni'a, 'aixia 'anemeki pemitakwewiekaki».

⁶ Kepauka teiterimama memakunuaxia, Kakuwu mipai mekatenuatixiani: «'A'iwa 'Etsahu tepitehetaxatia, 'upamie pimatsihanakimie nauka tsienituyari wara'inieti yuteiterima».

⁷ Kakuwu waikawa kanekamatiyani yu'iyaritiati. 'Ayumieme yuteiterima muwarawitikikai hixiapa kaniwatsana, yaxeiata kaniwarukuxerieni muxatsi, wakaitsixi, kameyutsixi,

8 mipai tiu'erieka: «Xika 'Etsahu warutakwini hipame, hipati xeikia mepiyuta'una».

9 Hiki Kakuwu 'ayumieme kaniuyutane-newieni: «Yawé neteukari 'Apirahami meta nepaapa 'Itsahaki wakakaiyari pemihiki, mipai peminerahawekai nekehakunuanike nekie ne'iwama wahetsia, meta kename penetsiparewiekakekai:

10 ne xiari mati'uximayatsiriwame heitserie nepikahexeiya 'aixia peminetixeiyaniki pemnetsiparewiekaku. Kepauka Kuru-tani hatuxameyaritsie nemanatia tixaiti nepikarexeiyakai ne'itsi xeikia nepakwekai, peru hiki hutakia mepukutei neteiterima.

11 Kenenewikweitsitiaka ne'iwa 'Etsahu netsi'umieniki nepeuma 'ukarawetsixi warukwini meta tiiri.

12 'Eki mipai pepinetiutahawixi kename penetsiparewiekakekai, kename nexiiyarima yumuireti mehakinekekai, xiekari haramara tetsita mitixeirie mikayu'iniatsinia hepai».

13 Miki tikaritsie Kakuwu mana puyuhayewaxi, kepaime me mirexeiyakai katiniwaranuyeteixi yu'iwa 'Etsahu mitiminiki,

14 huta tsienituyari tsipuri 'ukari, xeitewiyari tsipuri tuurutsixi, huta tsienituyari muxatsi 'ukari meta xeitewiyari muxatsi 'ukitsi,

15 xeitewiyari heimana tamamata kameyutsixi 'ukari meniwetikaime, huta tewiyari wakaitsixi, tamamata tsikerutsixi xeiwiwari mehitiikaime, xeitewiyari puxuri 'ukari meta tamamata puxuri 'ukitsi.

16 Hiki kaniwaruhiritiani yuxexime te'uximayatamete mipai katiniwarutahiawe: «Xeme xekenanuyeyaxi xete'u'arieti perutsi yunaiti xeka'uhuti yaxe'ayuxeiyati».

17 Manuyehaitianiekai mipai katiniuhiritiani: «Kepauka mimatsihanukunake ne'iwa 'Etsahu, xika matsiheta'iwawiya, kemi'ane hetsia pepimieme, hakewa pepeutia, kemi'ane mepitehatewama 'iki pemiwara'arie,

18 mipai pepireita'eiya: “'Iki 'imikieri 'ahet-sie pitimieme neti'aitiwame 'Etsahu, Kakuwu mati'uximayatsiriwame pimatsiheyeni'airi yute-wama wahetsie waranuyeteixika, mikitatsiere ta'utima kanamieni”».

19 Kakuwu yaxeikiata katiniuhiritiani hutarieka mieme, meta hairieka mieme, yaxeikia yunaime katiniwarutahiawe tewaxi memuwaru'ariekai. Mipai katiniwarutahiawe: «Kepauka 'Etsahu xemanukunake mipai xekateneitahiawikuni,

20 mipaitatsiere xekateneitahiawikuni: “Mati'uximayatsiriwame Kakuwu ta'utima 'ukanamieni”».

Mipai pitiku'eriwakai Kakuwu: «'Imikieriki meri nekaninitiamiki, 'ariketa ne kanenanukunakimiki heiwati 'aixia netiutahiawe».

21 Hiki mipai 'imikieri meri katineni'ani, Kakuwu 'akuxi mana puyuhayewaxi miki tikaritsie mematitekaitsie.

Kakuwu kememite'uyutakwi niuki tuayame hamatia

22 Hiki miki tikaritsie Kakuwu kani-uyukuha'aritanian, yu'itama meta memuyuhuta te'uximayatamete, meta tamamata heimana

xewi wara'inietî yuniwema, haa 'etsimipetsie mekaniukîne Kawuki mirayetewatsie.

²³ Hiki kepauka muwaranutua, yutewama yupi-inite naime katinanutuanita,

²⁴ hiki yuxaitame kaniuyuhayewa. 'Ana xewiti tewi kanitamieni kaniukatare 'imienekaku.

²⁵ Kepauka 'iya tewi mipai miretima Kakuwu mikaha'iwakaiki, teurieya mitiwayewiyatsie kanitahutsuni, 'anari kaniwayexine 'uti'itsaiwati kanayani meywukwitiwekaku.

²⁶ Hiki tewi mipai katinitahiawe:

—Keneneutatua, 'ari pikahekiaririme.

Kakuwu mipai katinitahiawe:

—Kepaukake 'aixia peminetsiyurieni 'anake nepimatsitatuani.

²⁷ Tewi mipai katinita'iwawiya:

—¿Kepetitewa?

—Kakuwu nepititewa —katinita'eiya.

²⁸ Hiki tewi mipai katinitahiawe:

—Kakuwu pepikatitewakari, 'Ixaheri pita, Kakaiyari pemitamiki meta teiteri, pemirayu'iwaki.

²⁹ Kakuwu mipaita katinita'iwawiya:

—'Ekita, ¿kepetitewa?

Tewi mipai kaniutayini:

—¿Titayarikuta penetiku'iwawiya kenemititewa?

Mana kwitiwa 'aixia kaniyurieni.

³⁰ Hiki Kakuwu mana Penuheri katiniuteriwa, mipai 'utayika: «Kakaiyari nierikaya nepuxei, 'ayiwekatika nepayeyuri 'akuxi».

³¹ Tau panatine Penuheri 'uyemiekkaku Kakuwu. Mutiteurimirariekaiki 'uti'itsaiwati kaneyani.

32 'Ayumieme 'ixaheritsixi wai teuri mirawiyatsie mieme mepikakwa'a, Kakuwu mana mutahutsunarieki.

33

Kememite'anuyukunakixi Kakuwu 'Etsahu matia

¹ Kepauka Kakuwu 'Etsahu muxei 'a'amiekame teiteri nauka tsienituyari warawitikime, yu'itama waniwema me'ayenaukame kaniwarayeitiani Reya, Xakeri meta te'uximayatamete memuyuhuta.

² Miki 'ukarawetsixi memuyuhuta te'uximayatamete kaniwaranuyeyatsa yuniwemakame, wa'utimata Reya yuniwemakame, 'imatiriekaka Xakeri yuniwe Kutse matia.

³ Hiki Kakuwu meri nanuyeyerini, 'atahutamexia 'umieti kananakatutsitakaitini kwiepa paiti yu'iwa 'anukunakirimeti.

⁴ Peru 'Etsahu kaniutanautsa 'enukunakeke, 'itapaka kani'itseni. Hiki yuhutati mekaniutit-suani.

⁵ Kepauka 'Etsahu 'ukarawetsixi miwaruxei meta tiiri, mipai katiniuta'iwauni:

—¿Kemi'aneta 'iki mepiyia, memimatsi'aweiya?

Kakuwu mipai katinita'eiya:

—Miki tiiri mepihiki Kakaiyari ti'a'uximayatsiriwame meyen'aiiri.

⁶ Miki yuhutati te'uximayatamete 'ukarawetsixi 'amenakine yuniwema mewaruwititi 'Etsahu hixie mekanakatutsitaxiani.

⁷ Kwitita Reya meta niwemama yaxeikiata mekaniuyini, 'imatiriekaka Kutse Xakeri matia yaxeikiata mekaniutihixima'uni.

⁸ 'Etsahu mipai katiniuta'iwauni:

—ǃKepaititiri miki tewaxi pemɨnetsiheni'airi?

Kakuwu mipai katinita'eiya:

—Kimana 'aixia pemɨneranunakeki nepɨtiuyuri.

⁹ 'Etsahu mipai kaniutayini:

—Neuxeitsi, nemuta, matsi neta waikawari nepɨrexeiya. Ketinapiti 'apiinite.

¹⁰ Kakuwu mipai kaniutayini:

—Neuxeitsi hawaiki, xikari 'aixia 'anemeki penetsi'utahiawe, ketineutanaki'eri tita nema-timikwa. 'Aixia 'anemekiri pekaneniutahiawe, 'anierika nexeyati Kakaiyari nemixeyiani hepai nekatiniama.

¹¹ Ketineutanaki'eri 'imikieri nemimati'atiri. Kakaiyari 'aixia pitiuka'iyari nehetsiemieme, waikawa matsi nepɨrexeiya tita nemireuyehiwa.

Miya tikihiaweti Kakuwu 'ameteneutere, 'imatirieka 'Etsahu yakatiniutanaki'erieni.

¹² 'Arikekeri 'Etsahu mipai katinitahiawe:

—Kimitsiari tekaniyehuni, ne nekame-nanuteitamiki.

¹³ Peru Kakuwu mipai kaniutayini:

—Neuxeitsi, nematsika meta neti'aitiwame, tiiri mepika'ikiniwawe meta muxatsi wakaitsixi meputiniwexia, nepiwata'iwiya. Xika xeiya neware'arieni yunaiti xeitukaritsie mepikwini.

¹⁴ 'Ayumieme peuyewetse pemanuyeyerini mati'uximayatsiriwame hixie, ne'anikai nepiyemie netewama wahamatia meta tiiri, Tsehixi paitike tekaneyukaxeyakuni.

¹⁵ 'Etsahu mipai kaniutayini:

—'Aixia kani'aneni, peru neteiterima
nekaniwaku'eirimiki yayupaimeme
memimatsi'anuteitaki.

Kakuwu mipai katinita'eiya:

—Neuxeitsi pepika'a'iyaritiaka, matsi 'aixia
'anemekiri tepuyutahiawixi, miki matsi waikawa
peuyewekai.

¹⁶ Miki tukaritsie kwitiwa 'Etsahu kanakunuani
Tsehixi paiti.

¹⁷ Kakuwu, kaneyani Tsukuti 'erieti, mana
kaniuyutakitiani meta kuraru kaniutiwewieni
yutewama wahetsiemieme. 'Ayumieme mana
pitiuteriwarie Tsukuti.

¹⁸ Kepauka Kakuwu makunua Parani-'Arami,
'aixia 'anemeki meta 'aixia reu'erieti Tsikeni
kiekariyaritsie kaninuani, Kanani kwieyaritsie,
miki hixie kaniutayerini.

¹⁹ Hiki xeitsienituyari pirata tuminiyariki
kwie kaniunaneni, Kamuxi niwemama
kaniwarunanairieni Tsikeni paapaya mana
kaniyutaxamarutiani.

²⁰ Metatsiere mana mawari taiyame
kaniutawewieni, 'Eruhe-'Ixaheri katiniteriwa.

34

Rina kemitiunawarie

¹ Merikitsi Rina Kakuwu niweya Reya
hetsie meyexei, hipame 'ukarawetsixi
kaniwareku'iwata mana kiekatari.

² Kepauka mixei Tsikeni, Kamuxi nu'aya,
heweu tewiyari, mana mitiwa'aitiakai, 'iwiyaka
wairiyarika 'ipitiat hamatiana kaniukahuni
kaninanaimani.

³ Miya 'iyuriekaketa kanitihiwe'erieni 'aixia katinixeyakaitini pitiwitiniekai.

⁴ Hiki yupaapa mipai katiniutahiawe: «Miki 'uka keneutawawa ne'iya mayaniki».

⁵ Hiki Kakuwu mipai katinetimani kename Tsikeni nu'aya Rina 'unanaimakai, 'atsipika'utayi niwemama yeuta meme'uwakaiiki tewaxi metewarehitiweti, me'u'axiakuke katiniwarutaxatiani.

⁶ Hiki Kamuxi Tsikeni paapaya, Kakuwu hetsia kaneyani hamatiana titaxatake.

⁷ Kepauka Kakuwu niwemama memu'axia mekatenuutamarieni kemitiiyikai, pikawarunakixi waikawa meha'ati mekaniuyuhayewa. Tsikeni waikawa 'axakatinuiyuriekaitini 'Ixaheri hepaitsita niweya munanaimaki, pikaheuyewekai matsi mipai mitiyurieniki.

⁸ Kamuxi peru mipai katiniwarutahiawe:

—Neniwe Tsikeni xe'iwa 'uka kanihiwe'erieka. Neuxeikuta xekeneupitia memuyutiwitiniki.

⁹ Tepitatimareta. Taniwema mepuyuwititweni.

¹⁰ Mipai xepiteyuhayewani xeme tahamatia, 'iki kwie xehetsiemieme pihikitini 'ena xekeneu'uواني kemitixenake xete'uximayati, meta kwie xekeneukukurarutiixia.

¹¹ Hiki Tsikeni mipaita katiniwarutahiawe Rina 'iwamama meta paapaya:

—Xika xeme xenetsi'utanaki'erieni, ne nepitixepitiani tita xeminetetawawirieni.

¹² Xepiyiwawe tita xeminete'utawawirieni kimana, meta 'imikieri nemitixeminiki, peru yemeki xekeneneupitia 'uka ne nemitiwitiniki.

¹³ Hiki wa'iwa Rina munanaimarieki, Kakuwu niwemama mekaniwaruta'eiya kwamanarikaki Tsikeni meta paapaya Kamuxi.

¹⁴ Mipai mekateniwarutahiawe:

—Tame tepikayiwawe mipai temite'uyurieni. Xika ta'iwa teyetuani xeime xitekiya 'iniariyari kahexeyame hetsia tepitatewiyatsitiani tame.

¹⁵ Ketemtexetahiawe xika mipai xe'uyini 'ana yatepitetanaki'erieni: yunaiti xeme 'ukitsi xitekiya 'iniariyari xekeneuyuwewiri tahepai xemi'aneneniki.

¹⁶ 'Anake taniwema temiwatawititiwani kaniyiwemiki, xehamatia temititeni xeikiekariyari temihikitini.

¹⁷ Mexika yaxekate'utanaki'erieni xitekiya xeka'uyuwewirieni, ta'iwa te'awititi tame tekaniyehuni.

¹⁸ Kamuxi Tsikeni matia yameteniu-tanaki'erieni kememutiyua,

¹⁹ Tsikeni kwitiwa kaniuyu'iniairitiani Kakuwu nu'aya kwiniemieme mitinaki'eriekaiki.

Tsikeni waikawa 'iwamama memei'eniekaiki,

²⁰ paapaya Kamuxi kaneiteita kiekari kitenie paiti, mana mekateniutixata kiekatari wahamatia. Mipai mekateniwarutahiawe:

²¹ —'Iki teiteri 'aixia mepitekahu mepihamikutsixi. Xekeniwarupitia takwieyarit-sie memu'uwaniki, mekete'uximayaka 'ena, 'apakuyewakuta wahetsiemieme. Meta tame tepiyiwaweni temiwatiwitini waniwema, mikita taniwema.

²² Miki yamepiteha'eriwa tahamatia memuyuhayewaki xeikiekariyari temakineki,

xika yatetekakine kememaitika: xika teyunaiti 'ukitsi xitekiya 'in'ariyari te'uyuwewirieni, miki kememite'uhu.

²³ Hikimitika yatepitekakine, tahamatia memuyuhayewaniki. Mipai wawakaitsixi naime tita memitehexeiya tapiini mepitehikitini.

²⁴ Yunaiti kiekari kitenie memuyuxeirie kai, yameteniutanaki'erieni Kamuxi meta nu'aya Tsikeni kememaitikatei, 'ana yunaiti 'ukitsi mekanu'in'aritarieni xitekiyaki.

²⁵ Hairieka tukaritsie, 'ukitsi 'akuxi mete'ukakukuinekaku, yuhutati Kakuwu niwemama Tsimihuni Rewi matia, Rina matsikamama, yu'ixipara me'u'iti kiekaritsie mekanekine, 'ukitsi memuyeheitekateitsie mekay'i'wiyyati, yunaime mekaniiwarukwini.

²⁶ Kamuxi meta nu'aya Tsikeni mekaniumieni, Rina Tsikeni kiita mewayehanaka mekanekine.

²⁷ Hiki hipatita Kakuwu niwemama mekanu'axiani, mikite watsata me'utakineka, kiekaritsie naime wapiini mekatene'arieni wa'iwa munanaimarieki.

²⁸ Yupiini mekateneitiani wamuxatsima, wawakaitsixima, wapuxurima, naime tita kiekaritsie mitiyepikai meta tita memite'ekai.

²⁹ Naime mekateneipini tita memitehexeiyakai, meta waniwema wa'itamata naime mekatenu-nawani kiita mirayepitikatei.

³⁰ Hiki Kakuwu mipai katiniwarutahiawe Tsimihuni Rewi mame:

—Waikawa 'uximatiarika xepinetsiheutiwiwiriexia. Hiki 'ena mitiyehane kananeutsixi, peretseutsixi, 'enakiekatari yunaiti, menetsi'aye'unieti

mepakine. Xika miki me'uyukuxeirieni menetsi'utamieni, mepinetsimieni netiriyama yunaime mepiwakwini, waikawa teiteri nepikawarexeiya.

³¹ Peru miki mipai mekatenita'eiya:

—Kamitsi tete'ihayewakekai tsepa 'iya ta'iwa tuminiki muyumayinia hepai miranuyemieniki.

35

Kakuwu Weteri kemiretia

¹ Merikitsi Kakaiyari Kakuwu mipai katiniutahiawe: «Kenemie, Weteri kenekani. Mana mawari taiyame kenetawewi nehetsiemieme hakewa peminetsihexei mana pe'uyemieti 'Etsahu heki pe'uyu'unarimeti».

² Hiki Kakuwu mipai katiniwarutaxatiani yutiriyama meta hamatiana memu'uwakai: «Xekeniwaruhayewa hipame wakakaiyarixi yuhetsia xemiwarexeiya, xekeneuyu'iti, hipame pita yu'ixurikite xeketenanakatixia.

³ Weteri paiti tekaniyehuni. Mana tenari mawari taiyame nekanetawewimiki Kakaiyari hetsiemieme minetsi'uparewi ne'uweiyariekaku, huyeta nehamatia mumie».

⁴ Hiki Kakuwu mekateniyetuirieni yukakaiyarixi memiwarexeiyakai, yunakitsate yunakatesie memanuyewutiakai, Kakuwu katiniukateuku xiu hetia Tsikeni hehurakaku muwekai.

⁵ Kepauka memeki, nixewiti pikawaranukuwei Kakuwu tiriyamama, waikawa memutimamakaiki kiekari mamanetikatsie.

⁶ Mipai tiyiku Kakuwu 'Arimetira maku'u kan-inuani, tatsiari Weteri, meta memeweiyakai yu-naiti, Kanani kwieyaritsie.

⁷ Mana mawari taiyame kaniutawewieni, meta Weteri katiniuteriwa, mana matsikime mayuyeitiaki Kakaiyari kepauka 'Etsahu heki muyu'unarimekai.

⁸ Hiki 'ana Rewura kaniumini, Xeweka mi'iwiyakai, xiu manuwe hetia mekanikateuku Weteri 'aurie. 'Ayumieme Kakuwu mana 'Eruni-Wakuti katiniuteriwa.

⁹ Kepauka Kakuwu Parani-'Arami heyeyaka munua, hutarieka Kakaiyari matsikime kanayuyeitiani 'aixia kaniyurieni,

¹⁰ mipai tikihiaweti: «Kakuwu pepititewa, hikiri mipai pepikatitewaka. 'Ena mitiyehane 'Ixaheri pepititewaka pita». Mipai katiniteriwa.

¹¹ Tawarita Kakaiyari mipai kaniutayini: «Ne Kakaiyari Naimekimitirikaie nekanihikitini. Kenexika kene'amiriyani. 'Ahetsie mepiyekine yumireti 'anuiwarima xeikia, manata te'aitamete mepitixuawere.

¹² 'Apirahami meta 'Itsahaki kwie nemiarumi 'eki nepimatsiyetuirie meta 'anuiwarima».

¹³ Hiki Kakaiyari Kakuwu hamatia tiutaxataka kaneyani.

¹⁴ Kakuwu mana tete kaniutakeni hakewa Kakaiyari hamatia miretixa. Miki tete kaxie winuyariki kanika'iya meta huriwa hatseitiyari kanikawirieni,

¹⁵ hakewa Kakaiyari Kakuwu metahiawixi Weteri katiniuteriwa.

*Xakeri meta 'Itsahaki kememite'ukumawerixi
(Tsut 35:23-26 - 1Kem 2:1-2)*

¹⁶ Hiki 'arike Weteri mekaniyekine. 'Epirata 'akuxi 'ahetewakaku Xakeri kaniutiniweni, wairiyarika nunutsi kanayexeiya.

¹⁷ Kwiyianekaku niweneti, tiniweritsitiwame mipai katinitahiawe: «Pepikamaka, tawarita xeime nunutsi 'uki pekanayexeyarimeni».

¹⁸ Perutsi miki miximeti, 'imatirieka yuniwe Wenuní katiniuteriwa, peru paapaya Wenikamini pita katiniteriwa.

¹⁹ Mipai Xakeri katiniumini, 'Epirata huyeyari 'utia mekanikateuku, hiki Wereni mirakutewatsie.

²⁰ Memekateukixitsie Kakuwu 'iniari kaniutakeni, hiki 'akuxi peyuhekia hakewa Xakeri mekatuekie.

²¹ 'Ixaheri yuhuyeta kaneyani hiki Mirari-'Eraxi manunieretsie kaniutayerini.

²² Miki kwieyaritsie mekuteti, Xuweni Wiriha hamatia kaniukahuni, yupaapa 'iyaya hamatia. Kepauka 'Ixaheri miretima waikawa kaniuyeha'ani.

Kakuwu tamamata heimana yuhutame kaniwarutinuarieni:

²³ Reya niwemama mepihiki: Xuweni, Kakuwu matiarieya matia, Tsimehuni, Rewi, Kura, 'Itsakaxi meta Tsawuruni.

²⁴ Xakeri niwemama mepihiki: Kutse meta Wenikamini.

²⁵ Wiriha niwemama mepihiki Xakeri parewiwameya: Rani meta Nepitahari.

²⁶ Tsiripa niwemama mepihiki Reya parewi-wameya: Kahari meta 'Atsexi.

'Iki mepihiki tiri Kakuwu miwarayexei Parani-'Arami kwieyaritsiepai.

²⁷ Kakuwu yupaapa kie kanakunuani Mamire, Kiriati-'Ariwa 'aurie, Hewuruni mirakutewatsiere, 'Apirahami meripaiti manuyeikakai meta 'Itsahaki.

²⁸ 'Itsahaki xeitsienituyari heimana nauka tewiyari wiyari kanexeyakaitini kepauka mumi.

²⁹ Waikawa 'ukiratsititi kaniiyini, niwemama 'Etsahu, Kakuwu 'ukiyarimama wahamatia mekanikateuku.

36

*'Etsahu nuiwarimama
(Tsut 36:10-14, 20-28 - 1Kem 1:35-42)*

¹ Merikitsi 'iki mepihiki 'Etsahu nuiwarimama, meta 'Erumi mititewakaita.

² 'Etsahu, 'ukari Kanani kiekatari piwarutiwiti: 'Ara kaniutiwitini 'Eruni niweya Heti tewiyari, 'Ahuriwama kaniutiwitini 'Ahana niweya Tsiwehuni teukarieya heweu tewiyari,

³ meta Watsemati kaniutiwitini 'Itsimaheri niweya Newayuti taruya.

⁴ 'Iki mepiniwemama 'Etsahu: 'Ara hamatia kaneyexeiya 'Eripaxi. Watsemati hamatia kaneyexeiya Xehuier.

⁵ 'Ahuriwama matia mekaniwarayexeiya Kehutsi, Karani meta Kure. 'Iki tiri 'Etsahu

muwarayexei mekanihikitini Kanani kwieyaritsie 'uyeikati.

⁶ Hiki 'arikeke 'Etsahu kaneyani yu'itama yu-niwema meta yunaima teiteri memiparewiekai warawititi, yutewama wara'arieti naime yupiinite Kanani kwieyaritsie m'itiukaxeiyakai, xeime kwieyaritsie kaniuyupata Kakuwu hamatia mika'uyeikaniki.

⁷ Yuhutati waikawa mepitehexeiyakai yupiinite 'ayumieme mepikayiwawekai 'axeikia memukuteni, 'ixa pumawekai watewama wahetsiemieme.

⁸ Mipai katininuani 'Etsahu, metatsiere 'Erumi mititewakai, h'iritsie Tsehixi kwieyaritsie.

⁹ 'Iki mekanihikitini 'Etsahu nuiwarimama, 'erumitsixi wa'ukiyari, h'iritsie Tsehixi kwieyaritsie memitamarixi.

¹⁰ Waniwema mipai mekatenitetewakaitini: 'Eripaxi 'Ara nu'aya, 'Etsahu 'iyaya, Xehueri Watsemati nu'aya, 'Etsahu 'iyaya.

¹¹ 'Eripaxi niwemama mekanakine: Temani, 'Umaxi, Tsepuhu, Katani meta Kenatsi.

¹² 'Eripaxi yutuxeri Timina hamatia xeime kanayexeiya nunutsi 'Amareki katiniteriwa.

Miki yunaiti 'Ara teukarimama mekanakine, 'Etsahu 'iyaya.

¹³ Xehueri niwemama mekanakine: Nakati, Tsera, Tsama meta Mitsaha. 'Iki Watsemati teukarimama mekanihikitini, 'Etsahu 'iyaya.

¹⁴ Hipatita 'Etsahu niwemama 'Ahuriwama hetsiemieme, 'Ahana niweya Tsiwehuni

teukarieya, mekanihikitini: Kehutsi, Karani
meta Kure.

¹⁵ 'Iki memanuyetei mekanakine 'Etsahu nuiwarimama wahetsie:

'Eripaxi 'Etsahu matiarieya nuiwarimama
memanuyetei mepaki: Temani, 'Umaxi,
Tsepuhu, Kenatsi,

¹⁶ Kure, Katani meta 'Amareki. 'Iki memanuyetei mekanakine 'Eripaxi nuiwarimama wahetsie 'Erumi kwieyaritsie, miki yunaiti 'Ara teukarimama xeikia mepihikitikai.

¹⁷ 'Etsahu nu'aya Xehueri niwemama, memanuyetei mekanakine Nakati, Tsera, Tsama meta Mitsaha.

'Iki memanuyetei mekanakine Xehueri nuiwarimama wahetsie 'Erumi kwieyaritsie, yunaiti miki Watsemati teukarimama mekanihikitikaitini, 'Etsahu 'iyaya mihikitikai.

¹⁸ 'Ahuriwama niwemamata 'Ahana niweya, 'Etsahu 'iyaya, memanuyetei mekanakine Kehutsi, Karani meta Kure.

¹⁹ 'Iki 'Etsahu nuiwarimama mepaki, metatsiere 'Erumi mititewakai, meta yuxexuiti nuiwarite wahetsie memanuyetekai.

²⁰ 'Iki Tsehixi nuiwarimama mekanihikitini hureu tewiyari, mana memitamakai:

Rutani, Tsuwari, Tsiwehuni, 'Ahana,

²¹ Ritsuni, 'Etsexi meta Ritsani. 'Iki Tsehixi nuiwarimama wahetsie memanuyetei mekanakine hureutsixi wahetsie 'Erumi kwieyaritsie.

- 22 Rutani niwemama mekanakine: Huri, Humanu matia. Rutani xeime yu'iwa 'uka kanexeiyakaitini Timina titewakame.
- 23 Tsuwari niwemama mepihiki: 'Ariwani, Manakati, 'Ewari, Tsepuhu meta 'Unami.
- 24 Tsiwehuni niwemama mepihiki: 'Ayaha meta 'Ahana. 'Iki 'imatirieka mieme haa xikame mutaxei kanihikitini makumawetsie hetineikatikaime, yupaapa puxurimama wahineti Tsiwehuni.
- 25 'Ahana niwemama mepihiki: Ritsuni meta 'Ahuriwama, 'Ahana niweya.
- 26 Ritsuni niwemama mepihiki: Hemirani, 'Etsiwani, 'Itirani meta Kerani.
- 27 'Etsexi niwemama mepihiki: Wirani, Tsawani meta 'Akani.
- 28 Ritsani niwemama mepihiki: 'Utsi meta 'Arahani.
- 29 Hureutsixi wa'ukiyarima mepaki Rutani, Tsuwari, Tsiwehuni, 'Ahana,
- 30 Ritsuni, 'Etsexi meta Ritsani. Miki yuxexuiti yunuiwari hetsie memanuyetei mepaki Tsehixi kwieyaritsie.

*Te'aitamete 'Erumi kwieyaritsie
(Tsut 36:31-43 - 1Kem 1:43-54)*

- 31 'Ixaheritsixi te'aitamete mekawarexeiyakaku 'akuxi, 'iki mepanuka'ui 'Erumi kwieyaritsie:
- 32 Wera Wehuxi nu'aya 'Erumi katiniuta'aita. Kiekarieya Rinawa katinitewakaitini.
- 33 Kepauka Wera mumi, hetsienamieme katiniuta'aita Kuwawi Tsera nu'aya, Wutsira meyeyakai.

- ³⁴ Kepauka Kuwawi mumi, hetsienamieme katiniuta'aita Kutsani Temani kiekame.
³⁵ Kepauka Kutsani mumi hetsienamieme katiniuta'aita Harari Werari nu'aya. Miki mariyanitsixi miwara'iwaxi Muhawi kwieyaritsie. Kiekarieya 'Awiti pititewakai.
³⁶ Kepauka mumi Harari, hetsienamieme katiniuta'aita Tsamira, Matsireka kiekariyaritsie kiekame.
³⁷ Kepauka mumi Tsamira, hetsienamieme katiniuta'aita Tsahuri, 'aki Xekuwuti manuyeka kiekame.
³⁸ Kepauka mumi Tsahuri, hetsienamieme katiniuta'aita Wahari-Kanani 'Akuwuxi nu'aya.
³⁹ Kepauka Wahari-Kanani mumi 'Akuwuxi nu'aya, hetsienamieme katiniuta'aita Hara. Kiekarieya katinitewakaitini Pahu. 'Iyaya katinitewakaitini Mehitaweri, Matereri kaninu'ayatini, Metsawi teukarieya.
⁴⁰ Mipai mepitetetewakai me'anuyetetimemaki 'Etsahu nuiwarimama, yuxexuti yutiriyama mewarexeiyati meta yukwie: Timina, 'Ariwa, Keteti,
⁴¹ 'Ahuriwama, 'Eraha, Pinuni,
⁴² Kenatsi, Temani, Miwitsaxi,
⁴³ Makirieri meta 'Irami. 'Tki mepihiki memanuyeyaxixi 'Erumi kwieyaritsie, kememite'ukutetikatei.

'Iki 'Etsahu 'erumitsixi wa'ukiyari kanihikitini.

37

Kutse heinitsikateya

1 Merikitsi Kakuwu Kanani kwieyaritsie kaniukateitini, 'ukiyarimama memakutekaitsie, peru mana mepikakiekataritikai 'akuxi.

2 'Iki pihiki 'ixatsi yuri maine, yaxeikiata Kakuwu, tiiriyamama wahepaitsita kemituuyi.

Merikitsi kepauka Kutse tamamata heimana 'atahuta wiyari mihikai, yu'iwama kaniwaparewienekaitini, Wiriha Tsiripa watiriyama, muxatsi wahiyariki. Miki Kutse yupaapa katinikuxaxatiwakaitini 'iwamama 'axakememiteyuriekai.

3 'Ixaheri matsi waikawa Kutse kani-naki'eriekaitini ke hipame 'iwamama, 'ukiratsititi meyexeiki. 'Ayumieme kamixa 'atewime witsi'aneme* pita'aitsiri.

4 Hiki 'iwamama me'ixeiyaati paa-paya kemitinaki'eriekai, matsi waikawa mekani'uxiwe'eriekaitini ni tima 'aixia mepikate'ikuhawekai.

5 Merikitsi heiwa Kutse tiuheinika, yu'iwama katiniiwarutaxatiani. 'Ana matsi waikawa mekan-iti'uxiwe'erietikine,

6 mipai mitiwarutaxatiaki:

—Xekeneneu'eni nepitixetaxatiani kenemireheini.

7 Hiki tiriku tenehiatiwekaitini mirati'uximayatsiwatsie. Yapauka ne nemenahia 'akaniutakeni, xemeta xemenahiaxia 'auriena 'u'axiaka hixiena kaniukahixima'uni.

8 'Iwamama mekanita'eiya:

* 37:3 37:3 kamixa 'atewime witsi'aneame. Yatini kamixaya witsimi'ane 'amimamatetiti pikwaniwe. Yaxeikia 37:23.

—Mipai xiari pepitiku'eriwa, 'eki petatita'aitianike pepi'a'erie petatsitani'anike.

Hiki matsi waikawa mekaniuyeha'ani heinitsika hepaitisita mitiwarutaxatiaki.

⁹ Merikitsi hutarieka katiniuheinini, tawarita katiniwarutaxatiani. Mipai katiniwarutahiawe:

—Tawarita mipai nepireheini. Tau, metseri, tamamata heimana xewi xurawetsixi nehixie mekaniukahixima'uni.

¹⁰ Kepauka mipai mitiwarutahiawixi, paapaya mipai katinitatieni:

—¿Kehepaititiri 'eki nepireheini? ¿Kamitsi ne, 'amaama, 'aiwama tanaiti 'ahixie tetekahixima'uni?

¹¹ 'Iwamama waikawa mepihekakai, paapaya matsi pita puyu'iyaritiakai naime miki hepaitisita.

Kutse 'iwamama kememite'itua

¹² Merikitsi Kutse 'iwamama mekanekine, yupaapa muxatsimama metewareumiyuka Tsikeni paiti.

¹³ Hiki 'Ixaheri[†] Kutse mipai katiniutahiawe:

—'Aiwama keniwaxeiyamie, muxatsi memiwarahitiwetsie Tsikeni paiti mepekutei.

Kutse mipai katinita'eiya:

—'Aixia pi'ane.

¹⁴ Tawarita katinitaxatiani paapaya:

—Naime pepinetitaxatiani 'aiwama kememiteheu'erie, meta xika muxatsi mewarehitiweni, mipai nemiretimaniki hekwareki.

Hiki kaneyani. Hewuruni 'uyeyaka Tsikeni neta'ani.

[†] 37:13 37:13 'Ixaheri yaxeikia panuyine Kakuwu.

15 Xewiti tewi kanenukunake yeuta 'uyeikakaku kawataxeiyawekaku. Miki mipai katinita'iwawiya:

—ǃTita petiwaune?

16 Kutse kanita'eiya:

—Ne'iwama nepiwawaune. ǃ'Eki pekatimate hakewa memitehehiwe?

17 Miki tewi mipai katinitaxatani:

—Takai 'atupaiti mepeki, nepiwaru'eni mipai mepitekuxata kai kename Rutani kiekariyaritsie meyehukai.

Hiki Kutse waruwauximeti kaneyani, Rutani 'aurie kaniwarutaxeiya.

18 Hiki 'iwamama mekanixeiya 'ateewa 'amiekaku kuxi. Mexi kata'awekai mekaniiyu'enieni kememite'imieniki.

19 Mipai meteniyukuxaxatiwakaitini yuxexuiti:

—Mana pamie mitiheiniwe.

20 Hikirixia tukarieya kanaye'ani. Tekanimiekuni xeime putsu muyewakita tekaneikahiakuni, mipai tekanetiyuakuni kename tiyukwa'ame 'itakwai. Mipai tepitehetimani xika 'aku heinitsieya yuritini.

21 Hiki kepauka Xuweni miwaru'eni yu'iwama, yu'iwatsie tanuanike memika'ikumemiwaniki, mipai katiniwarutahiawe:

—Matsi tepika'ikumemiwani.

22 Putsu muyewakita xeikia xekeneukahiwa makumawetsie, xepika'ikumemiwani, xepikate'ikwinitia.

Xuweni mipai pitiwarutahiawixi 'arike Kutse watihanake 'iyetuanike paapaya hetsia.

23 Kepauka Kutse yu'iwama wahetsia muta'a, mekaniwiya kamixaya witsimi'ane 'amimamatetiti mekaniutatsana.

24 'Anari meheihanaka putsu muyewakita mekaneikahiani.

25 Hiki mekatenukwani. Yareutewikaku mekaniwaruxeiya harerutsixi tenawemete 'itsimaheritsixi teiteriyari, Karaha memayenexia. Kameyutsixi wahetsie mepite'a'ikataakai witsimu'ia waritsamu mixaxi‡ meheitanike 'Ekipitu.

26 Merikitsi Kura mipai katiniwarutahiawe yu'iwama:

—¿Tita tetea'iwa xika ta'iwa te'umieni 'atsiteka'utiyuani?

27 Matsi 'aixia katiyini 'itsimaheritsixi teiteriyari xika tewarutuirieni muta'iwaki.

'Iwamama yamepite'utanaki'eri kemainekai,

28 'ayumieme kepauka wahetsia memu'axia harerutsixi mariyanitsixi, yu'iwa Kutse putsuta mekanewatihana 'itsimaheritsixi mekaniwarutuirieni xeitewiyari pirata tuminiyariki. Mipai tiunanaiyaka 'Ekipitu kanewitikieni Kutse.

29 Hiki Xuweni nuaka putsu muyewakita, yu'iwa kaniwatihanakekaitini. Meukanierixi Kutse puyemawekai. Hiki yukamixa neukatsana, mipai mitimatsiikiniki kename yuhiwerie waikawa.

30 Hiki yu'iwama wahetsia kaneyani mipai katiniwaretahiawe:

—Temaiki peuyemawe. Hikita, ¿keri nehaineni?

‡ 37:25 37:25 waritsamu mixaxi. *Tkwa tsuayari witsimu'ia.*

³¹ Hiki Kutse kamixaya me'utihurieka, tsipu me'umieka mekanitaxurimani.

³² Hiki hipame mekaniwareni'ani kamixa me'ahuriekame yupaapa hetsia, mipai memiteheitahiaweki: «'Iki 'aniwe katikamixaya tekaneitaxeiya».

³³ Kepauka Kakuwu kamixa metima mipai kaniutayini: «Miki pihiki neniwe kamixaya. Kauka tiyukwa'ame neitakwai».

³⁴ Hiki Kakuwu hiwerikaki yukamixa kaneukat-sana, miyuiwierie hepai katiniuyukemaritiani, miixa piyuiwieriekai yuniweki.

³⁵ Hiki yunaiti niwemama mekanikinitiwakaitini peru miki pikayinitiariniakai mipai 'utaiti: «Hawaiki, ne nepikahetimaiya hetsiana neheta'ameke mikite watsata». Mipai 'utaiti pikatihayewakai yuiwierieti Kutse ha'eriwati.

³⁶ Merikitsi harerutsixi mariyanitsixi Kutse mekaniutuani, 'Ekipitu paiti Putipaxi hetsia, Parahuni parewiwameya kaninaneni kuyaxi wa'ukiyari mitiwa'aitiwametikai.

38

Kura Tamaxi matia

¹ Merikitsi Kura yu'iwama waruku'eirieka kaneyani xaitsie paiti. Xeime kie kaniutayerini Hiraxi titewakame hetsia, 'Arurani kiekame hetsia.

² Mana Kura 'uka kaniutiwitini Tsua titewakame niweya kananeu tewiyari. Kepauka hamatiana mukahui

³ miki kaniutihukata 'ukitime kaniutiniweni, 'Exi katiniteriwa.

4 'Ariketa hutarieka kaniutihukata 'ukitimetsiere kaniutiniweni, 'Unani katiniteriwa.

5 Tawarita 'arike xeime nunutsi mekanayex-eiya 'ukitime, Ketsiwi kiekariyaritsie mutinui-waxi, Tseraxi katiniteriwa.

6 Hiki Kura 'uka kaniutawauni Tamaxi tite-wakame 'Exi, yuniwe 'amiyumate hetsiemieme.

7 Matsi Yawé pika'inakixi Kura nu'aya kemitiyurienekai, kaninawairieni tukarieya.

8 Hiki Kura yuniwe 'Unani mipai katiniutahiaawe: «'A'iwa wiuraya keneutiwitiki, 'aitsika kemaine kwetsikatsiemieme kenaye'atia, mipai 'amatsika niweya payeneni».

9 Perutsi 'Unani pitimaikai nu'aya mitinuiwakekai nu'aya pika'ayanikekai. 'Ayu-mieme kepauka mikumaiwakai puyu'iwiyakai 'iyaya mikatihukataniki. Mipai pitiyurienekai matsikaya nu'aya mikatinuiwaki.

10 Hiki Yawé pika'inakixi miyamitiyurienekaiki, 'ayumieme yaxeikia kanimieni.

11 Merikite Kura yumu'e mipai pitiutahiawixi: «'Apaapa kie pewiuratiti kene'ahayewani, kepaukake neniwe Tseraxi 'amuyutamani». Peru Kura mipai pitiku'eriwakai Tseraxi minike pi'eriekai, yumatsikama wahapai. Hiki Tamaxi kaneyani yupaapa kie mekaniki.

12 Hiki miixa tukari 'anuyeyaku Kura 'iyaya kaniuminita Tsua niweya. Hiki hiwerika hatimaiyaka, kaneyani Kura Timinati kiekariyaritsie yumuxatsi waretixinike. Hamikuya kaneiweiya Hiraxi mititewa 'Arurani kiekame.

13 Kepauka Tamaxi m̄retima kename mu'eya Timinati heyakai yumuxatsima wareuximieka,

14 wiura kamixayari kananutihina, yihixie kaneuyukunani kapa xewit̄i heitimaniki, kiekari 'Enahini manuyeniere m̄ranuyekikat̄iretsie kanayerini, Timinati huyeyari manuyehane kiekari mukumatsie. M̄pai kaniuyini, m̄pai m̄itimaikaiki Tseraxi 'amuyumaikaikiri memika'iwititiawekaiku kinaya mayaniki.

15 Kepauka Kura heuyuku'eimame muxei, 'uka tuminiki muyumaȳinia kani'eriekaitini.

16 Yumu'e ka'eriet̄i hepana kaneyani, m̄pai katinitahiawe:

—'Ahamatia nepikahuni pekati'awairiya.

'Uka m̄pai katinita'iwawiya:

—¿Tita penetipitiani, x̄ika ne'unewairiya?

17 Kura m̄pai katinita'eiya:

—Xeime tsipu nunutsi nep̄imatsihani'airieni nekuraruta mieme.

'Ukata m̄pai katinitahiawe:

—'Aixia kani'aneni. Peru hiki mexixi tixait̄i kenetineupitia yanem̄itimaikaki kename 'aku penetipitiani.

18 Kura m̄pai katinita'iwawiya:

—¿Ketitakuta pereuyeh̄iwa nem̄ireukapine?

Tamaxi m̄pai katinita'eiya:

—Kena 'atseyu wiwierimakame meta 'a'itsi pe-makwe'e.

Kura katiniyetuirieni, hamatiana kaniukahuni, miki kanitihukatiani.

19 Tamaxi kepauka manukuke kaneyani yapauka, yuhixie meuyukunakai kaneuyukuyepi-eni, wiura kamixayari kananakatini.

20 'Ariketa Kura tsipu kaneni'ani, yuhamiku 'Arurani kiekame kaniutani'ani mirewayepiniki tita mireku'eiriekai, hiki hamikuya 'uka pikahetaxe.

21 Merikite teiteri mana kiekatari kaniwaruta'iwawiya:

—ǂHakewari 'uka tuminiki muyumayinia 'Enahini kiekame huye tetsita mutiyeixakai?

Miki mipai mekatenita'eiya:

—'Ena 'ukaratsi muyumayinia mitiwawa yukakaiyarixi wahetsiemieme matsi pumawe.

22 Hamikuya kanakunuani hakewa Kura meyeikakai, mipai katinitahiawe:

—Nepikaheitaxe. Teiteri mana kiekatari mipai mekanaitikani, kename mana 'umawe 'ukaratsi mipai tiuka'iyariti.

23 Kura mipai kaniutayini:

—Tsepa mirepi nepiinite, ne nepikatiu'ita. Heitseriemeki pitihekia teiteri 'axamemikahaitikaniki nehapaitsita: Ne nepeini'airi tsipu, 'ekita pepikaheitaxe.

24 Haika metseri 'anukayaku, Kura mipai katiniutahawarieni:

—'Amu'e Tamaxi tuminiki muyumayinia kanayuyeitiani, miyayianeti kaniutihukata.

Kura mipai karima kaniutayini:

—Xekenewayehani xekenetataiya.

25 Hiki kepauka miwayehaniwakai yumu'e hetsia xeime kaneni'ani mipai haineme: «'Iki piinite kutsiyari pinetsi'utihukatia. Heiwati peheitimani kemi'ane 'iki tseyu yuwiwierimakame mukutsiyarieya meta 'iki 'itsi».

26 Kura retimaika mipai kaniutayini: «Ne kenemitikamie, matsi miki 'aixia katinikamieni, ne neniwe Tseraxi nemika'iwititiaki». Peru tawarita hamatiana pika'ukahui.

27 Kepauka maye'a mitiniweki Tamaxi, yuhutame kaniwarayexeia.

28 Xewiti katinuiwaweti 'akuxi, mamaya meri kananeni, hiki 'ukaratsi tiniweritsitiwame, wita xetame mamayatsie kaneitapirieni, mipai kaniutayini: «'Iki meri kaniutinuiwa».

29 Hiki nunutsi yumama kaneutahana, xewiti pita meri kaniutinuiwa 'iwaya. Hiki 'ukaratsi tiniweritsitiwame mipai kaniutayini: «Kehepai peretia». 'Ayumieme Paretsi mepite'iteriwaxi.

30 Miki 'utiaketa 'iwaya kaniutinuiwa, yumamatsie wita xetame meutapieka, miki Tsera mekateniteriwa.

39

Kutse Putipaxi 'iyaya hamatia

1 Merikitsi kepauka mewitikie Kutse 'Ekipitu, 'Itsimaheri nuiwarimama mekanituani Putipaxi hetsia, xeime 'ekipitutanaka Parahuni parewiwameya kuyaxi wa'ukiyari hetsia.

2 Hiki matsi Kutse 'aixia katini'uximayakaitini Yawé 'iparewiekaku. Kepauka 'ekipitutanaka ti'aitiwameya hetsia mayekatei,

3 miki mipai piretima Yawé miparewiekaiki waikawa 'aixia mitiyurieneniki.

4 Hiki Putipaxi Kutse 'aixia katiniumani 'aixia mitiuka'iyarikaiki, 'ayumieme katinihiritiani naime yupiinite meta kiena miti'aitaniki kanipitiani.

5 'Ekipitutanaka kepauka Kutse mītihiiritia yukie timieme, Yawé 'aixia katiniyuriekaitini 'ekipitutanaka Putipaxi tita mirexeiyakai hetsiemieme takwana timieme meta kiita.

6 'Ayumieme Putipaxi matsi Kutse naimē katiniuhiritiani, tixaitiki pikatiyu'iyaritiakai pītiutikwa'akai xeikia.

Kutse matsi witsipitiyuxexeiyakai pītemaikīikai.

7 Hiki 'arikeke ti'aitiwameya 'iyaya kanitix-eiyatīyani 'ihiwe'erietī, mipai katinitahiawe:

—Nehamatia keneukahu'i.

8 Kutse kayuwairiyati, mipai katinitahiawe:

—Neuxei 'ukaratsi: neti'aitiwame netsi-naki'erietī pīnetiuhiritia, yupiinite yukie timieme naimē mikareukweriwayuriekaki.

9 'Iki kiita xewiti pumawe 'aixia tiuka'iyariti mihiritiariiekaki nehēpai. Neti'aitiwame tixaiti pikanetikweririe. 'Eki pemi'iyaya, xika nematsi'ukumayiani, 'axanepitiyurieni Kakaiyari hixie.

10 Matsi miki tukariki nikuxeiyanekaitini yaxeikia tikihiaweti. Peru Kutse kaniyuku'imawakaitini.

11 Merikitsi xeime tukaritsie, kiita Kutse ka-neutahani yukuha'aritanike kemītihiiritiariiekai, mexi me'uyemawekai te'uximayatamete hipati.

12 Hiki Putipaxi 'iyaya manayuku'eimatsie kanikawiere. Mipai katinitahiawe: «Nehamatiariki keneukahu'i».

Perutsi Kutse manayuku'eimakai 'uku'eirieka takwa kananuyeyani.

13 'Ukaratsi 'ixuriki 'uxeiyaka Kutse miku'eirieikai,

14 kiita te'uximayatamete kaniwarutahi-wieni, mipai katiniwarutahiawe: «Neuxeï, nekina 'iki hepirayu tewiyari mitatsi'atiiri, mitatsinanaimaniki xeikia punua. Nekiita 'atahaka nehamatia puhuimikikai, peru ne karima neputahiwaxi.

15 Kepauka ne'utahiwakaku minetsi'u'eni kani-uyuta'una, yu'ixuriki 'uku'eirieka ne'aurie».

16 Hiki 'ukaratsi Kutse 'ixurikieya kaniuti'uta, yukina mititaxatianiki nuayuke.

17 Kepauka kinaya munua, yaxeikia kaniutayini: «Hepirayu tewiyari pemi'atia nehamatia puhuimikikai.

18 Peru ne kepauka karima nemutahiwaxi, kananuyenautsa yu'ixuriki 'uku'eirieka ne'aurie».

19 Hiki Putipaxi yu'iya 'u'enieka, waikawa kani-uyeha'ani.

20 'Anari katiniuta'aita Kutse manutahiyaniki katsariyanata, Parahuni pïretsutsiximama me-manutaxiriwatsie.

Matsi tsepa manutahiyyakai

21 Yawé Kutse pika'uku'eiri 'aixia katini-parewiekaitini. Yakatiniuyurieni 'aixia mitixeiyaiki katsariyanata mitihiritiarië,

22 hiki miki Kutse kaniuhiritiani memanuta-xiriya muwaxeiyaniki meta miti'aitaniki muwa.

23 Yawé Kutse miparewiekaiki kemitiyuriënekai naiti 'aixia pitikuyinëkai, katsariyana hiritiariëkame pikareukweriwayuriëkairi, Kutse mitiuhiritiakaiki naimë.

40

Kutse heinitsi kemititahekiata

¹ Merikitsi miixa tukari 'anukayaku, Parahuni tekixi memikuhanitiwa winu 'uyemakame tiwa'aitiwame, meta paa wewiwamete tiwa'aitiwame, 'Ekipitu kwieyaritsie ti'aitame hetsiemieme memite'uximayakai 'axamekateni-uyurieni.

² Hiki kaniuyeha'ani ti'aitame Parahuni, miki yuhutame wahetsiemieme hetsiana te'uximayatamete, tekixi hanamete wa'ukiyari, meta paa wewiwamete wa'ukiyari.

³ 'Ayumieme kaniwareni'ani kuyaxi wa'ukiyari hetsia katsariyana mexeyakaiki, miki katsariyana Kutse muwayewekaitsie pihikitikai.

⁴ Muwa Kutse puhiritiariakai miwa'iwiyani, kuyaxi wa'ukiyari tawarita yuhutame pihiritia.

Miixa tukari me'aye'uti katsariyanata,

⁵ tikariki mekatenuheinini, 'iki yuhutati te'uximayatamete, tekixi winu muyema 'uitiwamete tiwa'aitiwame, paa wewiwamete tiwa'aitiwame, yuxexuiti mepite'uheinixia, yaxeikia ka'anuyitikaime.

⁶ 'Ukatareku ximeri, kepauka Kutse miwarekuxei me'iyarixietikaime kaniwarutaxe-
eiya.

⁷ 'Ayumieme piwaruta'iawawiyaxi:

—¿Titayari xetenututuixie?

⁸ Miki mipai mekatenuhiawe:

—Tame hiki tepite'uheinixia, pumawe mitatsitahekiatiani.

Kutse mipai katiniwarutahiawe:

—Kakaiyari kaniyiwēni mitahekiata. Tsiparatsi xekeneneutaxatia kexemite'uheini.

⁹ Hiki tekixi 'uitiwamete wa'ukiyari Kutse katiniutaxatiani kemituheiniakai, mipai katinitutiani:

—Mipai nepitiuheini, nehixie kaxie puwekai,

¹⁰ 'anutahaikati. Miki kaxie kepauka mutayiraxi kaniukaxutuni, yapauka 'ukayaxeka takari kaniutikwani.

¹¹ Ne, nemamatsie nepehanakai Parahuni ti'aitame tekixieya. Hiki kaxie takari ne'aka'inika tekixita nepeikapinaxi, miki tekixi Parahuni mamayatsie nepeke.

¹² Kutse mipai katinitahiawe:

—Kepemitiuheini mipai pitimatsiiki: Kaxie manuhaika, haika tukari pi'iniariyari.

¹³ Haika tukari 'anukayayu, Parahuni ti'aitame tawarita peiti'erieni kepemireyuri, hekwameki matsihepitiani pemitita'uximayataki hetsiana meripai hepai. Hiki Parahuni ti'aitame tekixieya kaxie takari hayari muyema hekwameki mamayatsie penekemiki, meripai pemitiyurienekai hepai.

¹⁴ Ne, nepimatsiwawirie waikawa pepikanetsihatitimaiani, kepauka 'aixia mireyini kenemaine, Parahuni ti'aitame nehetsiemieme kinitaxatia, 'uwa nemika'ayeweniki.

¹⁵ Hepirayutsixi takwiewaritsie paiti wairiyarika nepeyehanie 'ena nepi'atiarie, tixaiti 'atsinekareyurieka 'uwa nepayewe.

¹⁶ Paa wewiwamete wa'ukiyari 'u'enaka, 'iwaya 'aixia miti'ane hetsiemieme mitiutahekiatarieki, mipai Kutse katiniutahiawe:

—Neta mipai nepitiuheini. Nemu'utsie haika tsikiiwitiyari paa nepanamanakai,

¹⁷ tsikiiwiti mutinatitsie yutsata paa witsimi'anene piyemanekai, Parahuni ti'aitame hetsiemieme. Hiki maraikatsixi mepi'axekai me'itikwanike tsikiiwititsie nemenamanakai.

¹⁸ Kutse kanita'eiya:

—Kepemitiuheini mipai piti'iniariyari: Haika tsikiiwitiyari pi'iniariyari haika tukari.

¹⁹ Haika tukari 'anukayayu, Parahuni ti'aitame pimatsita'aita, 'amu'u manutiwitekieniki, kiyetsie pemikaxuiyaniki, 'ana maraikatsixi 'awaiyari mepitakwani.

²⁰ Hiki haika tukari 'anukayaku, Parahuni ti'aitame yutukari kaniuwewieni yuhetsiamiemete wahetsiemieme. Hiki miki yunaime wahixie katiniuta'aita memanutaxiriyakai memiwayehapanieniki, tekixi 'uitiwamete tiwa'aitiwame, paa wewiwamete tiwa'aitiwame.

²¹ Tekixi 'uitiwamete tiwa'aitiwame, hekwameki kaniupitarieni mitita'uximayataki hetsiana, mipai miki katininuani Parahuni ti'aitame mamayatsie tekixieya mikuhanitiwaniki meripai hepai.

²² Paa wewiwameta kaniuta'aita kiyetsie mimierieniki, Kutse kemitiwaruhekiatiakai mipai katiniuyini.

²³ Ana tekixi kaxie hayari muyema 'uitiwamete tiwa'aitiwame, Kutse kemirehiawekai pikaheye'eri, yuheyemek katinatimaiya.

41

Parahuni heinitsikateya

¹ Merikitsi huta wiyari 'anukayaku, Parahuni mipai katiniuheini: Niru hatuxameyari tetsita kaniuwekaitini.

² Yapauka hapa mekanatinexiani, 'atahuta meyupaimeti wakaitsixi mewaiyatikaiti, mekatenikwatiwekaitini makutsiiraiyetsie.

³ Hiki wa'utimata mekanatinexiani, wahepai meyupaimeti, mewawakiti 'axameteyuxexeiyati, mana mekaniti'uni memiwaiyatika wa'aurie Niru hatetsitayaritsie.

⁴ Wakaitsixi memiwawaki mekaniwarutikwani memiwaiyatika.

'Anari Parahuni kananutaniere.

⁵ Hutariekata kaneukuni. 'Ana tawarita pituhei. Tiriku xeikiyeyaritsie 'uye'ukame puxei kikireme witsi'aneneme.

⁶ 'Utimanata kanixeiya, hepaina paimeme wawakime 'eka mixikaki.

⁷ 'Atahuta tiriku miwawaki kanitikwani tiriku mikikire witsimi'anene.

'Ana Parahuni kananutaniere, mipai retimaika miheinitsikatikaiki.

⁸ Nutuixieti yu'iyaritiati ximeri kananukukeni. Katiniwarutani'airieni 'awie temaiwawemete 'ekipitutari. Katiniwarutaxatiani kemituhei, peru nixewiti pika'itahekiatia heinitsikaya.

⁹ Hiki tewi tekixi 'uitiwamete mitiwa'aitia, mipai Parahuni katiniutahiawe: «Neuxei, nepaye'eri ke'axanemitiuyuri.

¹⁰ Kepauka Parahuni muyeha'a teyu'uximayatsiriwamete waheki, kuyaxi mitiwa'aitia katananutaxirieni ne meta paa wewiwame.

11 Xeime tikaritsie taxexuiti tepite'uheini, xexuiti peixeiyakai heinitsika kemiti'ayumiemetikai.

12 Hiki xewiti tahamatia payekatei, temaikititi Hepirayu tewiyari kuyaxi mitiwa'aitia miparewiekai. Tepitaxatia ketemite'uheini. Miki pitatsi'utahekiatia xexuime.

13 Naiti yapiraye'a miki kemitatiutaxatia. Ne hutarieka nepuhiritiarie ne'uximayatsika, xewिता pumierie kiyetsie».

14 Hiki ti'aitame Kutse katiniutani'airieni. 'Ana kwiti kaniwayexinarieni katsariyanata. Kwiti 'uyutikemaritiaka, kaninuani Parahuni hixie.

15 Ti'aitame mipai katinitaxatiani:

—Ne nepitiuheini, xewiti pika'ihekiatawe. Peru xewiti pinetiutaxatia, kename 'eki peyiwe pemitahekiata heinitsi.

16 Hiki Kutse kanita'eiya:

—Ne nepikahiki. Kakaiyari kanihikitini mitahekiata.

17 Hiki ti'aitame Parahuni Kutse mipai katiniutaxatiani:

—Neheinitsita, Niru hatuxameyari tetsita nepuwekai.

18 Hiki yapauka hapa mekanatinexiani, 'atahuta meyipaimeti wakaitsixi mewaiyatikaiti, witsime'ananeti 'ixapa mekatenikwatiwekaitini.

19 Yapaukata wa'utima mekanatinexiani wahapai meyupaimeti, mewawakiti 'axameteyuxexeyati. Hatsuaku kenemikatiwaxeyawekai mipai me'ananeme 'Ekipitutsie.

20 Kwitiwata 'atahuta wakaitsixi memiwawaki, mekaniwarutikwani memiwaiyatika.

21 Tsepa memiwarutikwakai, yaxeikia mepitewawakikai. 'Ana nepanutanierixi.

22 »Hutariekata nepitiuheini, 'atahutame nepuxei tiriku miayeyari kikireme witsi'aneneme, piwawerekai xeikiyeyaritsie tiwiyati.

23 'Utimanata nepixei, hepaina paimeme tiriku wawakime 'eka mixikaki.

24 Tiriku miwawaki 'aixia mi'anene kaniutikwani. 'Tki naime nepiwarutaxatia 'awie temaiwawemete peru nixewiti pikanetsi'utahekiatia».

25 Hiki Kutse kanitahekiatiani naime kemitiuheinikai Parahuni. Mipai kaniutayini:

—Puyuxewititi kepemitiuheini. Kakaiyari kanihikitini mimateiutahekiatia kemitiyini.

26 Miki matsu 'atahuta wakaitsixi memiwaiyatika, yaxeikia tiriku mikikire, miki 'atahuta wiyari pi'iniariyari. Miki puyuxewi heinitsika.

27 Wakaitsixi 'atahuta memiwawaki 'axamemi'anene, memiwaiyatika wa'utia mematinexia, meta 'atahuta tiriku 'etsimipepe miwawaki 'eka mixikaki, mikita pihiki 'atahuta wiyari. Mipai paimexa haakaxa payani.

28 »Kenemimarahiawe Parahuni, yuriki Kakaiyari kemimatihekiatia, pitihekiata kemitiyurieni.

29 'Anari kanaye'amiki, 'atahuta wiyari waikawa mititixuawere 'Ekipitu kwieyaritsie.

30 Hepaina paimeti mahu, haakaxa payani, 'anari pikatitixuawere, mepitehatimaiyani waikawa kememitehexeyakai meripaiti miki kwieyaritsie.

31 Yemeki waikawa haakaxa payani keyamikatiiwekai meripaiti.

32 'Eki Parahuni hutame pemuheini, Kakaiyari puyumexitia kwitiwa mipai mitiyurieniki.

33 »'Ayumieme, hiki Parahuni xeime keneutiwawa waikawa yiweme, timaiweme, pemihiritianiki 'Ekipitu kwieyari hepaitita.

34 'Eki Parahuni mipai ketineuyuri, keniwaruthiawi nenieremete naitsarie 'Ekipitu, 'atahuta wiyari waikawa mititixuawere 'itsanari 'auxiwimexia tixeirikame, xeime xemiti'utaki Parahuni hetsiemieme, naitsarie 'akwiepa.

35 'Eki Parahuni peti'aitakaku, miki nenieremete meke'ikuxerieni 'ikwai 'aixia mitixuaweretsie mieme, meke'iti'uta naitsarie kiekaritetsie, 'ikwai xemexeiyaniki mitiumawenitsie.

36 Miki 'ikwai miti'utsieni 'Ekipitutsie mieme payani, 'atahuta wiyari mihaakaxatintsie, mipai teiteri miki kwieyaritsie haakaki mepikakwini».

37 Hiki Parahuni 'iyarieya 'aixia kaniuyini Kutse kemititahekiatia, yaxeikiata 'iparewiwame-temama.

38 Hiki Parahuni mipai katiniwaruta'iwawiya memiparewiekai:

—Kamitsi hakewa tepeikaxeiya xeime 'iki hepai 'anekame, Kakaiyari 'iyarieya hexeiyaame.

39 Hiki ti'aitame Kutse mipai katiniutahiawe:

—Mipai nepiretima Kakaiyari pimatihikiatia 'iki naime, xewiti pumawe yiweti, timaiweti, 'ahapai.

40 'Eki nepimatsihiritiani nemira'aitatsie, neteiterima yamepitekakine 'eki

petiwa'aitiakaku. Ne xeikia matsi nemimariwe
nepihikitini, nemiti'aitameki.

Kutse kemiti'aitakai 'Ekipitu kwieyaritsie

⁴¹ Hiki Parahuni mipai Kutse katiniutaxatiani:

—Hiki ne nepumatsihiritia 'Ekipitu kwieyari
naime.

⁴² 'Ana kwitiwa Parahuni yuhanira 'anutihinaka
Kutse 'itiwameyatsie kanekamanirieni, katini-
uta'aita memenakatitiani ki kamixa witsimi'ane
meta huru kukayari mepetititia kiipitiana.

⁴³ Hiki yuparewiwame kaxetayatsie
kanenutiyeni, teparewiwamete me'utihiwakaku
ya'ane mewapitiakaku yunaiti meka-
niukatunuma'uwekaitini hixiena. Kanihiritiani
'Ekipitu kwieyaritsie naime.

⁴⁴ Hiki Parahuni mipai katinitahiawe:

—Ne ti'aitame Parahuni nepihiki, peru
xewiti 'Ekipitutsie yapikatiyurieni 'eki
yapekahainekaku.

⁴⁵ Hiki kanipata kemititewakai, Tsapenati-
Paneha katiniteriwa. 'Uka kaniwitiitiani 'Atsenati
titewakame, Putipera niweya mawari wewiwame
'Uni kiekame. Mipai katinanukakeni Kutse
'Ekipitu ti'aitati.

⁴⁶ Xeitewiyari heimana tamamata kanihikaitini
Kutse kepauka mitiukatsutia ti'uximayati
ti'aitame tsiemieme.

Kutse Parahuni hixie kaniutateuta, kaneyani
'Ekipitu kwieyaritsie, kanikuniere.

⁴⁷ Miki 'atahuta wiyaritsie 'aixia
mitiwiyekekaisie, 'ana waikawa katiniutixu-
awere.

⁴⁸ Hiki Kutse katiniuti'uta naime tikwaiwamete, miki 'atahuta wiyaritsie mieme katiniuti'uta kiekaritsie.

⁴⁹ Kutse tiriku puti'utaxi xiekari muti'uta hepai, pitiyuxexeyakai mi'iniataakai pitihayewaxi mikayu'iniatsiniakaiki.

⁵⁰ Mexiakame ka'anuyeyeiwekaku haakaxa wiyari, Kutse tiri yuhutame mepiwarayexei 'Atsenati matia, Putipera mawari wewiwame niweya 'Uni kiekame.

⁵¹ Yumatari Manatsexi katiniuteriwa mipai 'utayika: «Kakaiyari pitiyuriene nemirati maiyaki naime 'uximatiarikaki nekie hakewa nemetinuiwaxi».

⁵² Hutarieka mieme 'Epirahini pititeriwaxi mipai 'utayika: «Kakaiyari pinetsi'upitia nemixiikaki, 'iki kwieyaritsie hakewa nemireka'eniwakai».

⁵³ Hiki 'atahuta wiyari 'aixia mitiwiyekekaitsie kanaye'ani.

⁵⁴ Kutse kemutayikai haakaxa kaniuyutsutiani 'atahuta wiyari, haakaxa kanayani naitserie kwie mumanetikateitsie. 'Ekipitu kwieyaritsie xeikia puxuawekai, Kutse mitiuta'aitakaiki mititi'utsieniki.

⁵⁵ Kepauka 'ekipitutari memuhaakakwi, teiteri Parahuni hetsia mekaniye'axiani 'ikwai mete'iwawirieti, hiki Parahuni mipai katiniwarutahiawe teiteri 'ekipitutari: «Xekenehu Kutse hetsia yaxeketenekakini kemetayini».

⁵⁶ Kepauka yuwaikawati memiyehaakakwitiwekai, Kutse katineuyepieni tiriku miwa'utikaitsie watuirienike 'ekipitutari.

⁵⁷ Yaxeikiata 'ateewa paiti meheyekikati 'Ekipitu mekani'axekaitini, tiriku mekunanetiweti Kutse hetsia, mihaakaxatikaiki kwinimieme naitsarie kwie kemiyewa.

42

Kutse 'iwamama 'Ekipitutsie mepeki

¹ Merikitsi Kakuwu kepauka mitiutamari, ke-name tiriku hexiawe 'Ekipitu, mipai yuniwema katiniwarutahiawe: «¿Ketitayari mana xetekutei, kwi xeyuxexeyati xeikia?»

² Mipai nekatini Marieka ke-name tiriku hexiawe. Mana xekenehu xekenenanaiyu tahetsimieme temikakwiniki hakaki».

³ Tamamata meyupaimeti mekaniyukuha'aritari Kutse 'iwamama 'Ekipitu meteheunanaiyuka.

⁴ Peru Kakuwu Wenikamini pika'upitia miyemieki Kutse mutaya, mipai tiku'eriwati: Nikahirixia miwa hemierieni.

⁵ Hiki 'Ixaheri tiiriyamama kepauka memeta'axia metetaxiawienike, matsi naitsarie waikawa kanihaakaxatikaitini, Kanani kwieyaritsie.

⁶ Kutse kuwexinaruri pihikitikai miki kwieyaritsie. Tiriku mepiwatuiriekai, naitsarie kiekaritetsie teiteri memi'axekai. Kepauka 'iwamama hetsiana memu'axia, kwiepapai mekaniukahixima'uni.

⁷ Kutse waruxeyaka yu'iwama, kaniwareti-mani. Perutsi mikawamateni hepai katiniwarutahiawe:

—Xemetsi, ¿hakewa xepeyekei?

Miki mipai mekatenita'eiya:

—Tame Kanani kwieyaritsie tepeyekī tiriku tepikunanetiwe.

⁸ Kutse piwaretimaikai, peru miki 'iwamama mepika'imatekai.

⁹ Meriki 'ana Kutse kanaye'erieni, kemitiuheinikai wahetsiemieme. 'Ayumieme mipai katiniwarutahiawe:

—Xemetsi 'awie nenieremete xepiyia xetatsi-hupietiweti.

¹⁰ Mipai mekatenita'eiya:

—Hawaiki ti'aitame, matsiparewiwamete tepiyia. Tiriku tepikunanetiwe xeikia.

¹¹ Tame tepixeinuiwari tapaapa puyuxewi, heit-seriemeki yatepitekahu, tepika'awienenieremete.

¹² Kutse mipai katiniwaruta'eiya:

—Pikayuri, xeme kexemutiyuane. Xepikunieretiwe xeikia kemitiu'ane.

¹³ Perutsi miki tawarita mipai mekatenita'eiya:

—Tame, mate'uximayatsiriwamete, tamamata heimana huta tepiyupaimekai, tanaiti tapaapa puyuxewi Kanani kwieyaritsie kanekani. Tamuta peyuhayewaxi yupaapa hetsia, xewitiri pika'uyeika.

¹⁴ Merikitsi Kutse tawarita mipai katiniwarutahiawe:

—Netsi kenemitixekihawe, 'awie nenieremete xekaniyiaka.

¹⁵ Kamitsi xika yuri xe'utiyuaneni: Ti'aitame kemaine yaxeikia tepixe'anutaxirieni 'ena, yu'iwa xe'atiayuke xepanuyekine.

¹⁶ Xeme, xewiti yu'iwa piwitimie, xekenanuni'a. Hipatita katsariyanata xepaye'uka. 'Anake mipai tekatenetimaikuni xika 'aku yuri xe'utiyuaneni,

mexika katixaitini, yuriki mipai nekanaineni Parahuni hetsiemieme, hupamete xekaniyiaka.

¹⁷ Hiki Kutse kaniwaranutaxirieni katsariyanata haika tukari.

¹⁸ Hiki hairieka tukaritsie mipai katiniwarutahiawe:

—Ne tewi Kakaiyari nemayemakaxe nepihiki, xemeta yaxeketeneuyuri kenemitixetahiawe, xemiutawikweitsitiani.

¹⁹ Xikatsi xeme heitseriemeki yaxetekahuni, 'uwa xewiti xeikia kaniyuhayewamiki. Hipatita xekaniyehuni, tiriku xekanituayuni xeniwema memitehekwakaki.

²⁰ Perutsi tsiere yumuta xekaneni'atiiriekuni, neyuri nemitixeta'eririeniki xemikakwiniki 'ena.

Mipai mekaniutiuyuani:

—'Aixia piyini, mipai tepiteyurieni.

²¹ 'Ana mipai metenanuyutahiawekaitini yunaiti:

—Xiari hiki tepite'uka'eniwa tamuta temite'ukwinitiaki, tsepa mitatsiku'imaiyakai tepika'enu'eni, hikiri xiari 'ayumieme tekateniuka'eniwani.

²² Hiki Xuweni mipai katiniwarutahiawe:

—Ne 'ayumieme mipai nepitixekihawekai, tepikate'ikwinitiaka tepika'ikumemiwani, xepikanetsi'u'eni. Hikiri xiari 'ayumieme tekatenayukatuyuani mumaweki.

²³ Kutse 'ekipitutari waniukiki miwakihiawekaiki, 'iparewiwameya piwahekiatiakai waniukiki. Miki mipai mepikatemalaikai wa'eniekame mepika'eriekai waniukiki.

24 'Anari Kutse 'anayeyaka yuxaita 'awie kani-utatsuani. Heyunitiaka hutarieka nuaka, Tsimehuni kaniuta'aita, mihiiyaniki yu'iwama wahixie.

25 Hiki Kutse katiniuta'aita memuka'ikatiarieniki tiriku hipineme, yaxeikiata watumini mukamanariexianiki wa'ikata, meta memuka'iniatiarieniki huyeta mieme. Mipai mekatenuyurieni.

26 Hiki yupuxuri mewaruti'ikatiaka, mekanakunuaxiani yu'utima.

27 Perutsi hakewa memekuhenikekai taikai, xewiti mana yupuxu titiminike, yukuxitari kananukixina, muwa yutumini kaniutaxeiya.

28 Hiki yu'iwama mipai katiniwarutahiawe:

—Neuxei, kari netumini nepeukayetsiyarie. 'Uwa patika yaxeikia paimeti.

Hiki 'iwamama waikawa mekaniutimamani. Mipai mekaniutiyuanekaitini:

—¿Kehepatitiri Kakaiyari pitatsiyuriene?

29 Kepauka memuta'axia Kanani kwieyaritsie, yupaapa Kakuwu mekatenuutaxatiani, naime kemite'anuyeki:

30 —Kuwexinaruri 'Ekipitu kwieyaritsie ti'aitame, waikawa pitatsiheku'iwawiyakai. Mipai pitarekuhiawekai: “Awienenieremete xekateyia”.

31 Tame mipai tepiteheitahiwixi: “Tixai tame heitseriemeki yatepitekahu tepika'awienenieremete.

32 Tame tepixeinuiwari tapaapa puyuxewi. Tamamata heimana huta tepiyupaimekai, xewitiri pumawe, tamuta xeikia peyuhayewaxi Kanani kwieyaritsie”.

33 »Hiki tewi mana miti'aita mipai katatinetahawe: «'Ikiiki mipai nekatini maikamiki xika 'aku heitseriemeki yaxetekahuni, xewiti 'ena kaniyuhayewamiki, hipati xeikia xekaniyehuni xeniwema memikaheyehaakakwitiweniki.

34 Perutsi xekaneni'atiriekuni yumuta 'imatireme, yuri nemitixeta'eririeniki kename 'awie nenieremete xekayia. 'Anake xe'iwa nekanixeyetuiriemiki, yaxeikiata heitseriemeki tepixemateni, 'ena xemu'uwaniki* takwiepa kemitixenake».

35 Hiki kepauka yukuxitari memanukuxinaxia, mekanitaxeiya purutsa watumini muyetei. Mikiki yunaiti mekaniutimamani.

36 Hiki Kakuwu mipai katiniwarutahawe:

—Xemeri neniwema tixaiti xepikanetehayewieni. Kutse tahamatiari 'apika'uyeika, Tsimehuni meta pumawe. Hikitari Wenikamini xepiyewitixime. Waikawa xepinetsihiweritia xeikia.

37 Perutsi Xuweni, yupaapa mipai katiniutahawe:

—Ne Wenikamini nepanuwitini nepiyihiritiani nemi'atiani. Mexika neka'i'atiani, pepiyiwe neniwema yuhutame pemiwarukwini.

38 Kakuwu tawarita mipai kaniutayini:

—Neniwe pikayemie xe'utima. Kutseri pika'uyeika, mutaya xeikia puyuhayewane. Xika huyeta yiki reiurieni, xemetsi pixehetsietini xika ne 'ukiratsi hiwerikaki ne'umini.

* 42:34 42:34 xemu'uwaniki. Yaxeikia nekutsiyu xemiwewiekaki.

43

*Kutse 'iwamama kememite'u'axia hutarieka
'Ekipitu*

¹ Naitsarie Kanani kwieyaritsie matsi waikawa mepiyehaakakwitiwekai.

² Merikite kepauka tiriku memuxi, memeikuxiawiekai 'Ekipitu, mipai katiniwarutahiawe wapaapa:

—Xekenehuta hutarieka tawarita xekenexiawiyu tiriku temeixeianiki ta'ikwai.

³ Matsi Kura mipai katinitahiawe:

—'Iya tewi heitseriemeki mipai pitaretahiawixi kename tawariri tekaheuhunikekai, ta'iwa xeikia Wenikamini te'awititi teyiawawekai.

⁴ Xika 'eki pe'itaunieka tamuta, tekatenixiawiyuni.

⁵ Ya pitikatixai, titayari teteheuhuni. Miki tewi heitserie mipai painekai kename tekahauhunikekai, tamuta xika tekahawitikini.

⁶ 'Ixaheri mipai katiniwarutahiawe:

—¿Titayari mipai xeteheitahiawixi miki tewi, kename yu'iwa xeime xehexeiya? 'Uximatiarika waikawa xepinetsiwiwirie.

⁷ Miki mipai mepite'ita'ei:

—Miki tewi pitatsiheku'iawawiyakai waikawa tahapaitsita: “¿Xepaapa 'akuxi reyeika? ¿Xemuta 'akuxi, xewiti reyeika?” 'Utaiti, ta'iwama tatiriyama wahapaitsita. Tame tepikaheyiawawekai yiki temetiyuanikekai. Ta'iwa tatsihetawawirienike tepikahe'eriekai.

⁸ Yuhetsiemieme Kura yupaapa 'Ixaheri mipai katiniutahiawe:

—Wenikamini keheyani tahamatia.
Keneneuhiritia, kwitiwa tekaniyehuni
temiwikwekaki tame meta taniwema.

⁹ Ne hetsiena mieme nekaninehiritiamiki. Xika
nekamatsi'atirieni 'ena, ne hetsiena mieme ner-
apiti nekanayeimiki neheyemeki.

¹⁰ Xika niuki tekaxiatiaakake waikawa, 'ari
hutakia tepakunuaxianike.

¹¹ Hiki 'Ixaheri wapaapa mipai katiniwaru-
tahiawe:

—Kamitsi mipai xeketeneuyuri, yu'iwa
xekenanuwitiki. Takwiepa mitixuawe 'aixia
miti'anene xeketeneuka'ikata yukuxitariteta.
Xeketenanutikiri 'iya tewi, xekenemikwa
waritsamu 'etsiwa, xiete, witsimu'ia, mixaxi,
pitsitatsi, 'erimenitira nuetsi hepai mi'anene.

¹² Tawarita pirata hepaina paimeme
xekenanu'iiri. Miki xepeiyetuirieni mamayatsie
yukuxitariteta xemeitaxei, tietitsi mipai
kara'eriwati muwa mineikamanaxi.

¹³ Yumuta xekenanuwitiki miki tewi hetsia.

¹⁴ Kaka'yari Naimekimitirikaiye miki tewi 'aixia
mitixexeianiki ke'upitiani, Wenikamini xeime
meta 'iwaya, meke'akunuaxiani xehamatia.
Xikari ne neniwema newareuyehiamiki, ʔketsiari
ne'uyini? Tsepari.

¹⁵ 'Ixaheri niwemama mekatenetini 'imikierite,
tawarita pirata hepaina paimeme, Wenikamini
me'awititi, meyumexitiati mekanekine 'Ekipitu.
Me'uta'axiaka Kutse hixie mekaniti'uni.

¹⁶ Kepauka Kutse Wenikamini muxei yunaime
wahamatia, yuparewiwame mipai katiniu-
tahiawe: «Keniwaranuwitiki 'iki teiteri nekie,

kenemi'a tuuru muwaiya 'ikwai kenekawewi, tuka nehamatia mekatenekwaikuni».

¹⁷ Ti'uximayatame katinaye'atiani kemitu'aitarie. Kaniwarewitini Kutse kie.

¹⁸ Miki metehetimaika Kutse kie memewitiekikaiki waikawa mekanimamakaitini. Mipai mepite'u'eri: «'Iki tewi pitatsi'atia yukie tapirata mikahe'iki matiar mieme. 'Iki xiari pitatsikwini 'uximayatsikaki wairiyarika tati'aitati meta tapuxurima».

¹⁹ 'Ayumieme kiita meheutahaxianike 'ahurawa mekaniukine, Kutse kie ti'uximayatame mipai mekatenuatahiawe:

²⁰ —Neuxei ti'aitame, 'eki pekatinimaika xeimiemi tepeikikinixia, tiriku tepekunanai.

²¹ Kepauka mana temeta'axia hakewa temekuheniekai tikariki, hiki takuxitarite temanukixinaxia. Muwa kanatimanekaitini pirata, kepaimemeki temiteyutuakai. Hiki tekane'ika miki pirata.

²² Hipameta pirata tekana'ika, tawarita tiriku teminaneniki. 'Atsitepikatemate kemi'ane muwa meikamanaxi.

²³ Ti'uximayatame mihiritiarie mipai katiniwarutahiawe:

—Xepikayu'iyaritiaka, ne nekaneni'ini miki pirata kimana xemite'uyutua. Xekakaiyari xepaapa kakaiyarieya muwa xiari peikamanaxia miki 'imikieri.

Ti'uximayatame Tsimelhuni kaniwa'atirieni,

²⁴ 'ana kaniwarewitini memeutahaxianiki Kutse kiita. Haa meta kaniwaruhanitiani yuketate memitihauxiniki, wapuxurimata katiniwarutimini.

25 Mikiri mepi^{ti}temaikai Kutse wahamatia mitikwanikekai tuka. Mekateniukuha'aritiaⁿⁱ 'imikieri kepauka munuanikekai.

26 Kepauka Kutse munua yukie, miki mekaniukahixima'uni hixiena. Mekaniyetuirieni 'imikieri memeyetikiriekai meta mekanitawairitiani.

27 Kutse kaniwaruta'iwawiya kemiteheu'eriekai. Mipaita katiniwaruta'iwawiya:

—ǵ'Aixia reu'eriekai xepaapa, miki 'ukiratsi xeminetsihaxaxatiwakai? ǵRayeyuri 'akuxi?

28 Miki mekatenita'eiya:

—Mikitsi tapaapa payeyuri, 'aixia katineu'erieka.

'Ana hutarieka hixiena mekaniukahixima'uni.

29 Kutse waranuxeiyatiyaka, kepauka Wenikamini yu'iwa muxei paapaya warutsieya hetsiemieme, mipai katiniwaruta'iwawiya:

—ǵ'Iki tihiki xe'iwa 'etsimiyumate xeminetsihaxaxatiwakai? Kakaiyari kematsi'iwiyani neniwe —katinitahiawe.

30 Kutse kaneyukaheiwerietiyani yumuta xeyati 'inaki'erieti. Yapauka kanewayeyani, miwayehuputsie heutahaka, kaniutatsuani.

31 'Uyunitiaka 'anaka'itaimaka, kaniwayeyani. Mipai kaniutayini: «'Ikwai xekenakatuaxia».

32 Kutse 'ikwaiya yuxaitame kanamaniyarieni, 'ekipitutari wa'ikwai yuxaitameta. Hepirayutsixi meta Kutse 'iwamama wa'ikwai yuxaita mepamaniyarie^{xia}, 'ekipitutari wahepaitsita 'axapi'anekai hipame wahamatia xika mete'ukwani.

³³ Kutse 'iwamama hixiena mekanayaxe, kememite'ununuiwaxi, kwimeniyuxexeiyakaitini mehixiyati.

³⁴ Kepauka 'ikwai Kutse mamaniyarie mexayatsie, Wenikamini kanamaniyarieni 'auxiwime xakiyari Kutse mexayatsie miemetime, 'iwamamata xeixakiyari xeikia mekanamaniyarieixiani yuxexuiti. Kaxie winuyari mekananu'ieni Kutse hamatia.

44

Kutse tekixieya

¹ Merikitsi 'ana kwiti Kutse tiyu'uximayatsiriwame katiniuta'aitiani kiiya hepaitsita mihiritiariakai: «Kenetihiniya 'iki teiteri wakuxitarite tirikuki. Yuxexuime wa'ikata wapirata keneukayatsa.

² Netekixi keneukaketsiri wamuta 'ikayata, pirata mame mitiuyutua». Ti'uximayatame naime katinaye'atiani Kutse kemitita'aitiakai.

³ Hiki 'amitiukatarixi, Kutse kaniwarupitiani memiyehuki yupuxurima mewaru'arieti.

⁴ Mehekineku yareutewikaku Kutse tiyu'uximayatsiriwame mipai pitiutahiawixi: «'Iki teiteri memeki, keniwaranukuweiya. Xika pewaranuku'axe mipai ketiniwaretahiawi: "¿Titayari 'axa'anemeki xenetehakapitia, titayari neti'aitiwame tekixieya xetehenawa pirata tekixiyari?

⁵ Kexemite'uyuri 'aixia pika'ane, miki tekixi kanihikitini neti'aitiwame kimana manuye'e, kimana miretimamate kemitiyini 'arike».

⁶ Kepauka ti'uximayatame mi'waranuku'axixi yaxeikia katiniwarutahiawe kemiretahawarie.

⁷ Miki mipai mekatenita'eiya:

—¿Ketitayari 'eki miya petatikihawe? Hatsuaku tame mipai tepikateheyurieka.

⁸ Perutsi tame tepeyeki takie Kanani kwieyaritsie, pirata teyetuanike temitaxe takuxitariteta. ¿Kehapai matsi huru, pirata tete'unawani mati'aitiwame kiita mieme?

⁹ Miki pirata tekixiyari, kemi'ane kuxitariey-ata pemitaxeiya, ke'umierieni. Tameta teyunaiti te'a'uximayatsiriwamete tepakine.

¹⁰ Ti'uximayatame mipai katiniwarutahiawe:

—Kexemaitika 'aixia kani'aneni, mipai nepitiyurieni. Perutsi kemi'ane tekixi muyekeka, miki xeikia neti'uximayatsiriwame kanayeimiki, xeme yunaiti xepixixinini.

¹¹ Yapauka yunaiti miki mekaniuti'ikapiexiani, yukuxitarite mekananukuxinaxiani.

¹² Hiki ti'uximayatame kanitiwauni yuxexuime wakuxitarita wamatsikatsie 'itsutiaka. Kanitaxeiya tekixi wamuta Wenikamini kuxitarieyata.

¹³ Kepauka memixei, Kutse 'iwamama yukamixa mekaneukatsanaxiani hiwerikaki. Hiki mewaruti'ikatiaka yupuxurima, mekaniukunuaxiani yu'utima kiekaritsie.

¹⁴ Kepauka Kura yu'iwama warawititi memu'axia Kutse kie, yukiita payekatei 'akuxi. Hiki mekaniukahixima'uni kwiepa paiti hixiena,

¹⁵ hiki Kutse mipai katiniwarutahiawe:

—¿Titayari miyaxenete'uyuri? ¿'Atsixekatemalaikai kimana nemitimaiwe, kemitiyini 'arike?

¹⁶ Kura mipai katinita'eiya:

—¿Ketsi'aku te'utiyuani? 'Eki tati'aitiwame pepihiki. Tepikayiwawe temuyutahekiata 'atsitemikate'uyuriki. Kakaiyari kanikaxeiya tahetsie tita 'axatemite'uyuri, 'ena tekaniti'uka. Te'a'uximayatsiriwamete tepihimetini wairiyarika, meta kemi'ane 'atekixi muyekakai.

17 Kutse mipai katinita'eiya:

—Ne nepikayiwe mipai nemixe'uyurieni. Xewiti xeikia netsiparewiwame kanayeimiki, kemi'ane tekixi muyekakai. Hipatita xekaniyehuni xekayu'iyaritiati yupaapa hetsia.

18 Kura 'ahurawa kaniuyani Kutse hixie, mipai katinitahiawe:

—Pepikaha'aka neti'aitiwame, 'awie nepimatitaxatianikeyu. 'Ekitsi ti'aitame pepimariwe yaxeikia Parahuni hepaititi.

19 'Eki pepitatsiku'iwwawiyakai xika tapaapa tehexeiyani, yata'iwa xeime tehexeiyani.

20 Tame tepimatsi'uta'ei, tapaapa 'ariri pi'ukiratsi. Yuniwema yuhutame piwarayexei, wamaama piyuxewikai. Xewiti kaniimini, xewiti xeikia kaneyeikani mutaya. Waikawa kaninaki'erieka tapaapa, 'ukiratsititi meyexeiki.

21 Merikite 'eki pepitatsi'utawawiri temewitiniki pemeitimaniki.

22 Tame mipai teputiyua, temaiki pikaheyiwe yupaapa meku'eirieni, yuxaitame xika heiku'eirieni hiwerikaki pemini.

23 Peru 'eki pepitarahiawekai xika ta'iwa teka-hawitinike tepikamatsixeiyanikekai.

24 Kepauka takie temeta'axia tapaapa naime tepiteheitaxatia kepemitatiutahiawixi.

25 'Ariketa tapaapa mipai katatinetahiaawe: “Xekenehu tawarita 'etsiwa tiriku xekene-nanaiyu”.

26 Peru tame mipai tepiteheitahiawixi: “Tepikayiwawe temeixeiyaki miki ti'aitame, xika ta'iwa tamuta kaheyani tahamatia”.

27 Tapaapa mipai pitaretahiawixi: “Xeme xepitemate Xakeri matia yuhutame tepiwarayexei.

28 Xewitiri nu'aya pukumawerixi nehetsia, mana mitiyetia 'anatitiri nepika'ixeyawe. Mipai nepitiku'eriwa, xiari yeutanaka peitakwai.

29 Xikata 'iki xehewitini, xika yiki reiyurieni, xemetsi pixehetsietini xika ne 'ukiratsi hiwerikaki ne'umini”.

30 »Xika nepaapa hetsia nehenuani, tamuta xika kahenuani tahamatia tapaapa matia xei'iyariyari memihiki,

31 tapaapa heitatimaiyame kanemimiki. Kamitsi tame tahetsie pirayani, xika tapaapa hemini hiwerikaki.

32 Ne nepenehiritia 'iki temaiki tapaapa hixie. Mipai nepireitahiawixi: “Nepaapa, xika neka-matsi'atirieni 'aniwe, nehetsie kerahiiani 'atsita kepauka nemimini”.

33 'Ayumieme ne nepimatsiwawirie, 'eki pemintsipitianiki ne pita neminehayewaki matsiparewiwame nemayani hetsienamieme. Miki temaiki keneupitia miyemieki yumatsikama wahamatia.

34 Titayari nereumieni nepaapa hetsia xika temaiki nehamatia kaheyani, ne tixai nepikaheixeiyamiki nepaapa yuhiweriekame».

45

Kutse kemitiyutahekiataxi

¹ Merikitsi Kutse pikayiwekairi mitinewieniki yuparewiwamete wahixie. Mipai katiniwarutahiawe: «Yunaiti xekenanuyekini 'uwa xemayetei». Nixewiti pika'uyuhayewaxi hamatiana. Kepauka muyutahekiataxi kename wa'iwa,

² miki 'ana pitsutia yuhiwerieti 'utatsuati karima. 'Ekipitutari mepu'enana, yaxeikiata Parahuni pitiutamari.

³ Mipai katiniwarutahiawe yu'iwama:

—Ne Kutse xe'iwa nekanihikitini. ¿Nepaapa 'akuxi rayeyuri?

Miki matsi mekaniutimamani mepikayiwawekai memita'eiyaki.

⁴ Miki mipai katiniwarutahiawe:

—'Ahurawa xekenakini.

Miki 'ahurawa mekaniukine. Hiki mipai katiniwarutahiawe:

—Ne Kutse nekanihikitini, xe'iwa 'ekipitutari xemiwarutuiri.

⁵ Hikiri yiki xepikateyikihaweni miya xemite'uyuriki. Kakaiyari pita pitiuyuri, 'ena ne meri minetsi'atia, para xemitawikweniki.

⁶ Huta wiyari panuyemie, 'ena mepite'uka'eniwa haakaki. Peru 'akuxi peuyewetse 'auxiwime wiyari mepika'uka'etsani mepika'uka'itsanani.

⁷ 'Ayumieme Kakaiyari pinetsiheyeni'a meripaiti, xetukari mitawikweitsitiarieniki Kakaiyari mariwemekti tiyurienekaku,

xetiri yama meta memikaheuyeweniki 'ena kwiepa.

⁸ Kakaiyari pita pinetsiheyeni'a, xeme pikatixai. Miki 'ena pinetsi'upitia, yanemiti'aitaniki Parahuni ti'aitame paratsiyuy-ata kemiti'uximayatsieka, meta naitsarie 'Ekipitu kwieyaritsie.

⁹ 'Ayumieme kwiti xekenakunuaxia yupaapa hetsia. Mipai xeketenetaxatia: "Aniwe Kutse mipai paine: 'Kakaiyari pinetsi'upitia ti'aitame nemayaniki 'Ekipitu kwieyaritsie naitsarie. Kenamie kwitiwa, peminetsixeyaki.

¹⁰ Kutseheni mirakutewatsie xepikuteni, 'eki 'aniwema 'amu'e'ema watewama xepiini naiti. Mana hurawa pepukani.

¹¹ 'Auxiwime wiyari pihaakaxatini 'akuxi, peru ne 'ena nepixeparewieka 'ikwai xemexeiyaniki. Mexika mana xeheyuhayewani Kanani kwieyaritsie, naime xepiteheuyehiani yupiinite'".

¹² Hikiri xeme xepihime xemunenierixi kenemitixe'utahiawixi hiki. Ne'iwata Wenikamini pinetsi'uxe, yapiretima ne Kutse nemihikiki.

¹³ Naime xeketenetaxatia nepaapa tita xemite'uxe, kenemitimariwe 'ena 'Ekipitu kwieyaritsie. Peru xekeneyukumexitia 'ena xemi'atianiki.

¹⁴ Hiki Kutse yumuta Wenikamini kaniutapa, 'ana kaniutatsuani, 'iwayata yaxeikia.

¹⁵ 'Ariketa yunaime piwaruti'itsi yu'iwama 'utatsuati, 'anakeri mepitahiawixi 'iwamama.

¹⁶ Kepauka niuki mu'eni ti'aitame Parahuni, kename Kutse 'iwamama me'u'axia, 'ana

kaniyutemawiekaitini, yaxeikiata teiterimama.

¹⁷ Hiki Parahuni Kutse mipai katiniutahiawe: «Mipai ketiniwarutahiawi 'a'iwama: «Xekeni-waruti'ikatia yutewama, xekenakunuaxia Kanani kwieyaritsie.

¹⁸ Yupaapa xekenawitiki, yutiiriyama yunaime. Nehetsia xekenahu. Ne nepiwaxatiani kwie yemeki 'aixia miraku'ane 'ena 'Ekipitu kwieyaritsie, meta mepitekwaka tita yemeki 'aixia miti'anene yu'ikwaite mepitehexeiyani.

¹⁹ Mipaita ketiniwarutahiawi: Xekeni-waranuhapani kaxetate 'Ekipitutsie miemete para xemiteha'ikataki, yutiiriyama yu'itama, meta yupaapa xematiniki.

²⁰ Xepikahe'iyarixieka, yupiiniteki tita xemiteheku'eirieni. 'Tiki kwieyaritsie tita mitixiawe 'aixia ti'ananeti, xepiinite katinayeimiki».

²¹ Hiki mipai mepite'uyuri, 'Ixaheri niwemama. Kutse kaxetate piwayetuiri, kemainekai Parahuni, 'ikwai piwareni'airi huyeta mieme.

²² Meta yuxexuime 'imikieri piwayetuiri 'ixurikite mihehekwa. Wenikamini pirata piyetuiri haika kiruyari raheteme, 'ixuriki meta 'auxiwime kemariyari witsi'ananeme.

²³ Yaxeikiata Kutse yupaapa pireni'airi: tamamata 'ikayari puxuri wahetsie, tita matsi 'aixia miti'ananekai 'Ekipitu mitixuawe, puxuri 'ukari wahetsie tamamata 'ikayari tiriku, meta tikwaiwame Kutse paapaya hetsiemieme huyeta mamietsiemieme.

²⁴ Meriki Kutse wateutiati, mipai katiniwarutahiawe yu'iwama, «Huyeta

xepikaheyukwitiweni».

²⁵ Hiki miki 'iwamama mekanayekine 'Ekipitutie. Kanani kwieyaritsie paiti mekaneta'axiani hakewa wapaapa mekatei Kakuwu.

²⁶ Meheta'axiaka mipai mekatenitahiawe: «Kutse 'apuyeika 'akuxi. Kuwexinaruri kanehikiti, naitsarie 'Ekipitu kwieyaritsie pire'aita». Kakuwu matsi pihixiyakai, yuri pikatiwa'eririekai,

²⁷ perutsi miki yameputiyuanekai, naime Kutse kemitiwaretahawixi. Hiki kepauka Kakuwu kaxetatsixi muwaruxei Kutse miwareyeni'a memenutini, 'anake puyukatemawi.

²⁸ Hiki mipai kaniutayini: «'Aku yuri xeputyuane. Neniwe Kutse payeniere. Nepiyemie nepixeyamie mexi nekamiwe».

46

Kakuwu 'Ekipitu kemiretia

¹ Merikitsi 'Ixaheri kanayeyani, yupiinite naime ratiti, tita memitehexeyikai. Kepauka Weritsewa meta'a, mawari kaniuwewieni, kemi'ane paapaya 'Itsahaki mikakaiyarieyatikai.

² Miki tikaritsie heinitsitana, Kakaiyari 'Ixaheri mipai katiniutaxatiani:

—Kakuwu. Kakuwu 'aku.

—'Uwa nepayeka —tinita'eiya.

³ Kakaiyari mipai katinitahiawe:

—Ne Kakaiyari nepihiki, 'apaapa Kakaiyarieya. Pepikaheumaka 'Ekipitu pemiyemieki. Matsi ne yumireme nepixe'ayeitiani, mana xehekutekaku.

⁴ Ne 'ahamatia nepuyeikani 'Ekipitu paiti. Yax-eikia nepimatsi'akunuitiani hutarieka. Kepauka pemimiximeni, Kutse pihikitini mimatsi'iwiyani, pemiyu pimatsi'anuka'eima.

⁵ Hiki Kakuwu kanayeyani Weritsewa mirakutewatsie, hiki 'Ixaheri niwemama mekaniyukuha'aritiai, Kakuwu yupaapa mekananutiyeni, meta yuniwema yi'itama mekaniwaranutiyatsa kaxetatetsie Parahuni ti'aitame miwareyeni'atsie.

⁶ Meta mekateniware'arieni yutewama metatsiere tita memite'ukaxeiyakai Kanani kwieyaritsie. Mipai Kakuwu meta nuiwarimama 'Ekipitu mekateniu'axiani.

⁷ Miki yunaime kanewarewitini yutiiriyama 'ukitsi 'ukari, meta yuteukarima 'ukitsi 'ukari, yunaime yunuiwari.

⁸ 'Iki mepihime 'ixaheritsixi teiteriyari kememitetetewakai, Kakuwu niwemama memeyeki 'Ekipitu paiti:

Xuweni, Kakuwu matiarieya pihikitikai.

⁹ Xuweni niwemama mepitetetewakai: Kanuki, Paru, Ketsiruni meta Karimi.

¹⁰ Niwemamata Tsimihuni mepitetetewakai: Kemueri, Kamini, 'Uhari, Kakini, Tsukaxi, meta Tsahuri, maamaya kananeu tewiyari pihikitikai.

¹¹ Rewi niwemama: Keritsuni, Kuhati, meta Merari.

¹² Kura niwemama: 'Exi, 'Unani, Tseraxi, Paretsi, Tsera. (Peru 'Exi matia 'Unani, mepekwikairi Kanani kwieyaritsie paiti). Paretsi niwemama: Ketsiruni meta Kamuri.

- 13 'Itsakaxi niwemama: Tura, Puwa, Kuwi, meta Tsimiruni.
- 14 Tsawuruni niwemamata: Tsereri, 'Eruni, meta Yareri.
- 15 'Iki mepihime Kakuwu Reya memiwarayexei Parani-'Arami me'u'uwati, meta waniwe Rina 'uka. Yunaiti mipai mepiyupaimekai, 'ukitsi 'ukari, xeitewiyari heimana tamamata heimana yuhaikati.
- 16 Kahari niwemama, Tsepuni, Kaki, 'Etsiwuni, Tsuni, 'Eri, 'Aruri, meta 'Areri.
- 17 'Atsexi niwemama: 'Imina, 'Itsiwa, 'Itsiwi, Weriya, 'iwaya 'ukatiti Tsera mititewakai. Weriya niwemamata mepitetetewakai: Hewexi meta Marikiheri.
- 18 Miki mekanihikitini Tsiripa niwemama Kakuwu matia memiwarayexei, miki ti'uximayatame pihikitikai Rawani hetsiemieme, yuniwe Reya piyetiiri hetsiena mieme miti'uximayakaki. Wanuiwari mepiyupaimekai tamamata heimana 'ataxewi mekanihikitikaitini.
- 19 Xakeri niwemama Kakuwu 'iyaya: Kutse meta Wenikamini.
- 20 'Ekipitu Kutse yuniwema piwarayexei, 'Atsenati matia Putipera nu'aya mawari wewiwame pihikitikai 'Uni mieme: Manatsexi, meta 'Epirahini.
- 21 Wenikamini tiriya mama: Wera, Wekexi, 'Atsiweri, Keraha, Nahamani, 'Ehi, Xutsi, Mupini, Kupini, meta 'Axi.
- 22 'Iki mepihikikai Kakuwu nuiwarimama Xakeri matia memiwarayexei, yunaiti tamamata heimana yunaukati mepiyupaimekai.
- 23 Rani nu'aya pititewakai: Kutsini.

24 Nepitahari niwemama: Yatseri, Kuni, Ketsexi, meta Tsireni.

25 Miki mekanihikitikaitini Wiriha niwemama Kakuwu matia memiwarayexei, miki ti'uximayatame pihikitikai Rawani hetsiemieme, yuniwe Xakeri piyetiiri hetsiena mieme miti'uximayakaki. Wanuiwari mepiyupaimekai 'atahuta mekanihikitikaitini.

26 Yunaiti Kakuwu tiriyamama memu'axia 'Ekipitu, xeinuiwari mepihikitikai, haika tewiyari heimana 'ataxewi mepiyupaimekai 'ukari meka'iniariti.

27 Kutse meta yuhutame piwarexeiyakai yuniwema memutinunuiwakai 'Ekipitu kwieyaritsie. Miki yunaiti haika tewiyari heimana tamamata mepiyupaimekai Kakuwu nuiwarimama mana memu'axia.

28 Kakuwu Kura kaniutani'ani manuyehaitianiki Kutse miretaxatianiki, menunakeki Kutseheni paiti, kepauka mana memeta'axianikekai. Kepauka mana memu'axia,

29 Kutse pitiuta'aitaxi mukuha'aritarieniki kaxetaya, 'anari miki petia Kutseheni paiti mitahiaweki yupaapa 'Ixaheri. Kepauka mixei 'anakayaka 'utanautsaka kanitapa, mana 'epireuterixi 'utatsuati tapana heukuniereti.

30 Hiki 'Ixaheri Kutse mipai katiniutahiawe:

—Hikirixia nepimatsi'uxei nehixiki, neka'uximatiarietiri nepimini, 'akuxi 'apepuyeika pepayeniere.

31 Mipai Kutse yu'iwama katiniwarutahiawe:

—Tsiparatsi, Parahuni nepiretaxatiani kename xe'u'axiari nehetsia ne'iwama, nepaapa niwemama Kanani kwieyaritsie memetitekai.

³² Mipai nepireitahiawe kename tewaxi wahiwemete xehiki, kename muxatsi wakaitsixi xetewa'atia, naime tita xemitehexeyakai.

³³ 'Ayumieme kepauka Parahuni mixeta'iwawiya: “¿Ketitaki xete'uximayatamete?”,

³⁴ mipai xeketeneutahiawi kename xeme xetehiwemete yaxeikia yuteukarima wahepai. Xika matsi mipai xete'itahiawe, mana xepiyuhayewani Kutseheni mirakutewatsie. Miki 'ekipitutari pikawanake 'ahurawa memitehirieka.

47

¹ Hiki Kutse katineikuxatiani Parahuni ti'aitame. Mipai katineitahiawe:

—Nepaapa ne'iwama mepu'axiari, Kanani kwieyaritsie meheyekineka yutewama yunaime tita memitehexeyakai meteha'arieti. Kutseheni mirakutewatsie mekanetiteni.

² Kutse kaniwarawitikaitini yu'auxiwime yu'iwama Parahuni xeitsitiani.

³ Parahuni mipai katiniwaruta'iwawiya:

—¿Ketitaki xeme xete'uximayatamete?

Miki mipai mekatenita'eiya:

—Tame te'a'uximayatsiriwamete, muxatsi wahiwemete tepihiki, yaxeikia meripaiti tateukarima kememite'uximayakai.

⁴ Tame 'ena tepu'axia 'iki kwieyaritsie, 'ixa memawekaiki Kanani kwieyaritsie, tatewama wehetsiememe, waikawa pehaakaxari miki kwieyaritsie. 'Ayumieme tepimatsiwawirie

waikawameki pemitatsipitianiki Kutseheni
mirakutewatsie temitahayewaki.

⁵ Hiki Parahuni Kutse mipai katiniutahiawe:

—'Apaapa 'aiwama mepu'axia 'ahamatia
memu'uwaniki.

⁶ 'Ekipitu kwieyari katini'ahetsiemietini.
'Aixia miraku'anetsie keniwarexatia mana
memekuteniki Kutseheni mirakutewatsie.
Meta xika hipame pewamaika 'aixia mete-
heutahiiwaweme keniwarehiritia netewama.

⁷ Hiki Kutse yupaapa Kakuwu newitini,
Parahuni kaniutahiwitsitiani. Kakuwu Parahuni
'aixia katiniutahiawe,

⁸ 'ana Parahuni mipai katinita'iwawiya:

—¿Kepaimeme wiyari pepexeiyari?

⁹ Kakuwu mipai katinita'eiya:

—Xeitsienituyari heimana xeitewiyari heimana
tamamata wiyari nepexeiya nekuyeikati.
Netukari pikwaniwe neka'anutineweti,
ne'ukiyarima netutsima kememiteheuterixia.

¹⁰ Hiki Kakuwu Parahuni kaniutateutiani, tixaiti
karayuyeitaiti.

¹¹ Hiki Kutse yupaapa yu'iwama kani-
wayetuirieni kwie 'Ekipitu kwieyari 'aixia
miraku'anetsie, Parahuni kemutayikai
Kutseheni mirakutewatsie, 'arikeke Xamitsexi
mitiuteriwarie.

¹² Kutse katiniwamikwakaitini yupaapa
yu'iwama watiriyama, yuxexuiti ke-
memiteheuyehiakai.

Kutse kemitiuta'aitaxi

¹³ Merikitsi haaka kaniwekaitini 'Ekipitu, yax-
eikia Kanani. 'Ikwai katiniumawekaitini nait-
sarie, teiteri mekanikwiximekaitini.

14 Naime pirata 'Ekipitu kiekatari meta Kanani kiekatari kimana yu'ikwai memunanekai, Kutse kaniwaye'ini Parahuni kiita neita'ina.

15 Kepauka 'Ekipitu kiekatari meta Kanani kiekatari pirataki memu'ixia, Kutse hetsia mekaniu'axiani mipai me'utiyuati:

—'Ikwai ketaneumikwa. Tepikwixime haakaki 'ahixie, piratari tepikahexeiya.

16 Kutse kaniwaruta'eiya:

—Xika pirata xekahexeianiri, yutewama xekeniwarahapani, nepitixepatsirieni 'ikwaiki.

17 Hiki 'ekipitutari yutewama Kutse mekaniye-tuirieni, wakaitsixi, kawayutsixi, muxatsi, pux-
uri, tsipuri, Kutse tirikuki katiniwapatsiriekaitini
miki wiyaritsie.

18 Hairieka wiyaritsie Kutse mipai mekateniu-
tahiawe:

—'Eki pepiti'aitame, temite'anukanaka
pikayiwe, pirata tepikahexeiyari, tatewama
'atewama mepihikiri, tixaitiri tepikatehexeiya.
Tame xeikiari meta kwie temexeiya.

19 'Eki pepikatatsipitiaka temikwiniki, takwie
meta kapa reuyeweniki. Ketaneutinanai
'eki takwie mame, petipatati 'ikwaiki. Mipai
Parahuni te'uximayatametemama tepihikiti
takwie teyunaiti. Mipai teteyurieme 'eki, 'imiari
pemitatsitikitiani temayeyuyuriniki, 'akuxi
takwie yuxaita mikayukuhayeikawaniki.

20 Hiki mipai tiuyiku, Kutse 'Ekipitu kwieyari
kaniunaneni naime Parahuni hetsiemieme, 'ekip-
itutari meyehaakakwitiweti memituiriki naime
yukwie. Mipai tiuyiku, naiti 'Ekipitu kwieyari
Parahuni tipiinieya katinayani.

21 'Ana yunaiti 'ekipitutari wairiyarika te'uximayatamete mekanakine.*

22 Kutse mawari wewiwamete wakwie pika'unanai. Parahuni mitiwamikwakaiki, 'ayumieme yukwie mepika'utua.

23 Hiki Kutse teiteri mipai katiniwarutahiawe:

—Hikititi xeme meta xekwie, Parahuni hetsia xekanimiemetetini ne nemixe'utinanaiki. Kami 'imiari xekeneuka'etsa.

24 Kepauka 'itsanaxa mayani, 'auxiwimexia tixeirikame xepitiwewieni yaxeikia papaimeme, xeime Parahuni xekaniyetuiriekuni, xemerita naukame xemitekwakaki, meta xemika'enitsiemieme.

25 Teiteri mipai mekaniutyuani:

—'Eki pepitatsi'utawikweitsitia, waikawa pepitatsi'uparewi. Parahuni te'uximayatsiriwamete tepihikitini.

26 Kutse miki 'iniari, 'aitsika kanayeitiani naitsarie 'Ekipitu kwieyaritsie. Hiki 'akuxi kaneyuhekiaka yapaimeti Parahuni tsiemieme kanayeikani. Perutsi mawari wewiwamete xeikia wakwie Parahuni tipiinieya pikaratia.

27 Hiki 'ixaheritsixi 'Ekipitu mekanitiyaxe Kut-seheni mirakutewatsie. Mana waikawa metehex-eiyati mekanakine, waikawa mekaniutamire.

28 Kakuwu tamamata heimana 'atahuta wiyari 'Ekipitu kaniukateitini. Xeitsienituyari heimana huta tewiyari heimana 'atahuta wiyari kaniutihuni.

* 47:21 47:21 wairiyarika te'uximayatamete mekanakine. Meripaiti mieme Kaka'yari niukieya muti'utsie, tsamariyatari waxapa meta Haika tewiyari heimana tamamata xapayari, Ratinitsixi waxapa.

²⁹ Kepauka 'Ixaheri† m̄iximeti, Kutse katiniutani'airieni. M̄ipai katinitahiawe:

—Xika 'aheyemeki penetsinaki'erieka, neteuritia keneutame'i 'iniari mayaniki kename yapem̄itikayani, yakenetineutahiawi yuri pe'utaiti, pem̄ikanetsikateukuniki 'Ekipitu.

³⁰ Kepauka nem̄imini, ne'ukiyarima wahetsia kenenetuamie, 'Ekipitu pep̄ikanetsi'ukateukuni.

Kutse m̄ipai katinita'eiya:

—Kepem̄aine yanep̄itikayani.

³¹ Paapaya tawarita kanita'iwawiya:

—Xika yapetikayeimiki yakenetineutahiawi heitseriemeki Kakaiyari matsi'eniekaku.

Kutse yatinitahiawe. Hiki 'Ixaheri yu'utatsie kakaiti 'utih̄iximakeka kaniyutanenewieni.

48

'Epirahini meta Manatsexi 'aixia kememu'it̄iarie

¹ Merik̄itsi 'arike Kutse katiniutamarieni kename paapaya rekuye. Hiki kaneyani yuniwema warawit̄iti Manatsexi 'Epirahini mame.

² Kepauka Kakuwu m̄iretima, wairiyarika kananukuyerini yu'utatsie.

³ Kutse kaniutahiawe m̄ipai 'utaiti:

—Kakaiyari Naimekimit̄irikaiye kanenitahiawe Rutsi kiekaritsie, Kanani kwieyaritsie. 'Aixia kaneniuyurieni,

⁴ m̄ipai 'utaiti: «Ne yanep̄itiyurieni waikawa t̄iri pem̄iwarayexeyaki, pem̄itam̄ireki, 'anuiwaritsie yuwaikawati nuiwarite mepayenexiani. 'Iki kwie yuheyemeki puwakwietini».

† 47:29 47:29 'Ixaheri. Kakuwu pititewata.

5 Merikite 'aniwema memuyuhuta 'Ekipitu pemiwarayexei nekamatsitahiawiwekaku 'akuxi, mepineniwematini. 'Epirahini Manatsexi yuheyeme mepineniwematini yaxeikia Xuweni meta Tsimehuni kememineteniwema.

6 Miki wa'utimake pemiwarayexeiya mepi'aniwematini, kwie memiyetuiriyarienitsie wamatsikama mikita mana mepiwayetuirieni.

7 Parani-'Arami ne'akunuaku, Xakeri 'amaama kanemini 'Epirata 'aurie, hiki Wereni mirakutewa, miki huyeyari'utia tekaneikateuku, Kanani kwieyaritsie.

8 Hiki 'Ixaheri Kutse niwemama waruxeiyaka, mipai katiniuta'iwauni:

—¿Miki temari kemi'ane mepiyia?

9 Kutse yupaapa mipai katiniutahiawe:

—Miki neniwema mepihiki Kakaiyari minetsiheyeni'airi 'ena memutinunuiwaxi.

Hiki 'Ixaheri yuniwe mipai katiniutahiawe:

—'Enahurawa keniwati'uitia nemiyutanenewieniki wahetsiemieme.

10 'Ixaheri matsi kani'ukiratsitikaitiniri, pikahaunierekairi. 'Ayumieme Kutse 'ahurawa kaniwati'uitiani yuniwema. Paapaya kaniwaruti'itseni kaniwarutitapa.

11 Hiki Kutse mipaita katiniutahiawe:

—Neri tawarita nekamatsixeyake nepine'eriekai. Matsi hiki Kakaiyari pinetsi'upitia meta 'aniwemata nemiwaxeiyaki.

12 Hiki Kutse yuniwema kaniwaranukuhapani yupaapa hixie, mikita kaniutihiximakeni.

13 'Anukukeka yuniwe 'Epirahini yutserieki kaniuwiya, yu'utakita Manatsexi. Hiki

yupaapa hixie kaniwati'uitiani, 'Epirahini
'etsimutewikaiki, yuteukari 'Ixaheri 'utata
mutikeniki, Manatsexi mimatsikayatikaiki
yuteukari tserieta mutikeniki.

¹⁴ Peru wateukari 'Ixaheri yutanenenewienike
yumamate kaniupataxiani, 'Epirahini hetsia
yutserieki heimana kaneutimeni tsepa
'etsimutewikai, Manatsexi hetsiata yu'utata
miemeki pitiunakixi tsepa mimatsikayatikai.

¹⁵ Kanitsutiani mipai 'utaiti:

«Kakaiyari 'aku,
'Apirahami 'Itsahaki 'ahamatia ke-
memite'u'uwakai,
peminetsi'iwiya kepaukapai nemutinuiwaxi,
mana mitiyetia meta hiki.

¹⁶ Niuki tuayame minetsi'utawikweitsitia naime
'axamiti'anetsie,
'aixia keniwayurieka 'iki tiiri.

'Uxa'atini warie nepaxaxatsiwani,
yaxeikiata ne'ukiyarima 'Apirahami 'Itsahaki
wahepai.

Xeke'utiwawere xeke'utaxiini 'ena kwiepa».

¹⁷ Hiki Kutse pika'inakixi yupaapa xeiya,
'Epirahini mutayatsie meutimekaiki yutserieki.
Yupaapa mamaya 'uwiya, kanipata Manatsexi
hetsie pita,

¹⁸ mipai rehiaweti:

—Nepaapa, tixai mipai neniwe 'amiyumate,
Manatsexi pihiki. 'Atserieta miemeki mana pita
keneutime'i.

¹⁹ Perutsi paapaya yapikatiutanaki'eri. Mipai
katinitahiawe yuniwe:

—Ne nepitimate Manatsexi kiekarieya mari-weti kanayeimiki, matsi mutaya pita waikawa kanitaximiki, nuiwaritemama kiekari makate mekanakinikuni.

²⁰ Miki tukaritsie Kakuwu 'aixia kani-waruyurieni mipai 'utaiti:

«Kepauka nenuiwarima xeime hepaitsita 'aixia memutiyaneni,

mipai mepitekihawariwani:

“Kakaiyari kematsi'iwiyani.

Kemitiwa'iwiyakai 'Epirahini meta Manatsexi”».

Mipai 'utayika, 'Ixaheri 'Epirahini mexiakame kanayeitiani 'arike Manatsexi.

²¹ Hiki 'imatiriekia 'Ixaheri Kutse mipai katiniutahiawe:

—Pehurari nemiminiki, perutsi Kakaiyari xehamatia kaniuyeikamiki, kanixe'akunuitiamiki xeteukarima wakwietsie.

²² 'Eki Kutse 'a'iwama wahetsiemieme heitserie pepexeiya waikawa, nepimatsixatia Tsikeni* kwieyari, 'amuxeutsixi teiteriyari nemwarunawairi newakwineti.

49

Kakuwu yuniwema kemitiwarutahiawixi

¹ Merikitsi Kakuwu yuniwema kaniwarutakwewieni, mipai katiniwarutahiawe: «Xekeneuyukuxeiri nepitixetaxatiani kemitiyini xehetsie.

²»Neniwema: 'Ahurawa xekenakini, xekeneneu'eni kenemitixetahiawe.

* 48:22 48:22 Tsikeni. Kiekari panuyine hiri meta naipari.

- 3 » 'Eki meri Xuweni peminematari,
 'akimana meri pimatsiikikai
 kenemitiirikaiyekai tiiri
 nemiwarexeiyaniki.
 'Eki matsi heitserie pepexeiya,
 'Eki matsi pepitirikaiye.
- 4 Perutsi 'eki mexiakame pepikahikitiniri:
 'Axapemnetsi'uyuriki.
 Ne'iya matia pemukahuiki neti'uximayatsiriwame,
 'ayumieme hamewari mikayunitarinia hepai
 pepi'aneni.
- 5 » Tsimehuni matia Rewi yawixi memayu'eririya
 wahepai mekani'aneneni,
 yu'ixiparaki mepiteyumemiwa.
- 6 Ne wahetsia nepikaheu'ixiaramiki.
 Kapa 'axatiyuruwame hepai netiuxei-
 yarieniki.
 Yuhaxiaki teiteri mepiwarukwi,
 mewaikatiweti tuurutsixi mepiwarutixite
 wa'ikatetsie.
- 7 Wahaxia 'axake'itiarieka kememiteyumemiwa,
 yuhaxiaki piwanake hiwerika
 memiwapitiakaki hipame.
- Ne nepiwatani'axiani nekwiepa,
 nepiwataxiexiani 'Ixaheri kwieyaritsie.
- 8 » 'Eki Kura, 'a'iwama 'aixia meputiyuaneni 'ahet-
 siemieme.
 Memimatsi'aye'unie pepiwaraiwani,
 'ahixie mepititunuma'uni 'a'iwamatiti.
- 9 Neniwe Kura, maye temaiki hepai pepi'ane,
 maxa muwiyarie mikwa'a hepai.

Maye 'amipa hepai, pe'itakwaka pehakunuaka pe-manuhuputsie pekaniyuhayewa.

Maye 'uka hepai, xewiti pikayiwe mimatsi'uximatianiki.

10 Kura xewiti pika'inawairieni ti'aitame 'itsiya, nuiwarimama yuheyemeki mepiteta'aita.

Kepaukake munuani yuriki ti'aitame, 'aixia mitiuka'iyari meuyewetse hixiena yamemitekahuniki kwiepa memitama.

11 Kura kaxie waikawa pexeiya.

'Ayumieme yupuxu pakuwiwa kaxie kiyeyaritsie,

meta puxu nunutsi pikwa'a kaxie xawariyari.

Yu'ixurikite piti'ekwa kaxie winuyaritsie, yi'ikarite kaxie takari hayariyaritsie piti'ekwa.

12 Kaxie winuyari waikawa pexeiya, 'ayumieme hixiteya piyiyiwi.

Retsi kemtituxa, matsi waikawa putuxa tameteya.

13 »Tsawuruni haramara tetsita kiekame kanayeimiki,

nawiyatsixi miwa'axe 'aixia mitiuye'ane kanayeimiki,

Tsiruni paiti kwieya kaniye'atikaimiki.

14 »'Itsakaxi puxu hepai piranuweri, peru naitsata heuti'ikatikaiti 'apuka.

15 Kepauka mixei yukuraru 'aixia tiuye'ane kame, kwiepa 'aixia raku'ane kame mika'uxipieniki, puyuwairi 'ika matikiniki, ti'uximayatame payuyeitia.

- 16 »Rani 'itsikame hepai pitiyuriⁿⁱ yuteiterima wa-
hetsiemieme
'Ixaheri nuiwaritemama watsata.
- 17 Rani pitirikaⁱyeni, kuu mitiyumemiwa hepai
huyeta mikaka,
kepauka kawayu 'ikayatsie mitakeni,
manaka yuwarima peukaweni.
- 18 »Yawé 'aku 'awikweitsitiarika nepitakwewie.
- 19 »Kahari, tenawayamete memanitamiekuni,
matsi miki wawarita kanakuyeimiki kani-
wakwimiki.
- 20 »'Ekita 'Atsexi, 'ikwai 'aixia ra'ane^{kame}
pepitikwa'a,
'aixia ra'ane^{kame} petiukawewiwati
pepitiwamikwani kwiepa te'aitamete.
- 21 »Nepitahari, maxa 'uka yuxaita muyeikani hepai
pi'aneni,
maxatsi tirixi witsimemi'anene yumaama
wahepai.
- 22 »Kutse, hatetsita 'iteiritsiekame hepai pi'ane,
waikawa miyira,
mamateya kurarutsie manutimake hepai.
- 23 Kuyaxi tupi memu'i mekanitamini,
mekaheinenimayati me'ihekali.
- 24 Perutsi Kutse yutupi heitserie pakwe'e,
mamateya pika'akatutuke.
- Pamipariyutsi Kakuwu kakaiyarieya
pemitirikaⁱye,
pemitatsi'iwiyame 'ixaheritsixi,

tete mitse'i hepai.

²⁵ Neuxei Kutse:

Pamipariyutsi 'apaapa Kakaiyarieya
mimatsiparewie.

Pamipariyutsi Kakaiyari Naimekimitirikaiye,
'aixia mimatsiyurie.

Ke 'aixia mimatsiyurie taheima miemeki wiy-
erikita,
matsipitiati meta 'emeukatewatsie miemeki
haixaki,
niwekate tiri kememitewarayexexeiya ke-
memitewatsitsitia.

²⁶ Matsi 'aixia piti'anene tita 'apaapa nehikititi ne-
matiyetuirie,
hiri ke 'aixia mitipitiarie meripaiti mieme re-
utiyetana,
matsi waikawa 'aixia peke'itiarieka.

Hiki 'aixia kenemimatsiyurie pi'ahetsiemieme
Kutse,
'aiwama watsata pepanayexeiyarie.

²⁷ »Wenikamini, 'irawe mayu'eriya hepai pi'ane,
ximeri tikwati tita mitiumi,
taikaita hipame pitiwamikwa tita
mitiutatexi».

²⁸ Mipai katiniwarutahiawe 'Ixaheri yuniwema,
tamamata heimana huta nuiwariyari,
yuxexuime 'aixia kaniwaruyurieni, yuhetsie
memeixeianiki.

'Imatirieka Kakuwu yuniwema
kemitiwarutahiawixi

²⁹ 'Imatirieka Kakuwu mipai katiniwaru-
tahiawe yuniwema: «'Ariri nekanimiximeni,

kepauka nemimini. Nepaapama memuyehetsie xekeneneutateka, terita 'Epuruni Heti tewiyari mikwiewatikaisie.

³⁰ Teri Makipera nekanixatani Mamire hixie miti'ane, Kanani kwieyaritsie 'Apirahami minanai, 'Epuruni Heti tewiyari kaniunanairieni, yunaiti tiri Yamama muwa memeutatuariwaniki.

³¹ Muwa mekanayeheni 'Apirahami, 'iyaya Tsara, 'Itsahaki, 'iyaya Xeweka, muwa tsiere Reya neneutateni.

³² Miki kwie teri kaniunanaiyani, Heti teiteriyari meri katiniwapiinitikaitini».

³³ Kepauka mitiutahayewaxi Kakuwu yuniwema tiwakuxaxatiwati, 'ukahuka 'imatiriekaka kaniuka 'ietiyani kaniumini. Kaneyani yu'ukiyarima wahetsia.

50

¹ Merikitsi Kutse yupaapa kaniutapa, 'utatsuati kani'itseni.

² Hiki katiniwaruta'aitiani Kutse teyu'uayemawamete, memita'uayemaniki waritsamu witsimu'iki paapaya kaxarieya, hiki mipai mekatenuyurieni.

³ Mepeye'atia huta tewiyari tukari, mipai mepitewaraye'atiwakai memiwati'uayemawaniki wakaxarite. 'Ekipitutari haika tewiyari heimana tamamata tukari mepiyuhiweriekai.

⁴ Hiwerika 'anuyeyaku, Kutse kaniwarutahiawe Parahuni parewiwametemama, mipai katiniwarutahiawe:

—Ximixi Parahuni mipai xeketenetahiawi,

⁵ kepauka nepaapa mīmīximekai, mipai pinetiuhiritia, kename nekeheiteukimienike 'ukiyarimama memiwayehetsie, Kanani kwieyaritsie paiti. Mipai xeketenetawawiri Parahuni, nemiteukimieki, kenameta ne'akunuani.

⁶ Parahuni mipai katinita'eiya:

—Kenemie, 'apaapa keneuteukimie, kemimatiutahiawixi.

⁷ Merikitsi Kutse kaneyani yupaapa mekateukuki. Yunaiti mekanekine 'iwa-mama, watīriyama, yaxeikia 'ekipitutari 'ukirawetsixi memiteitakai Parahuni, 'ekipitutari wa'ukiyarima yunaiti.

⁸ Yunaiti Kutse kie kiekatari, meta 'iwamama, meta paapaya kie kiekatari. Mekanekine, yutīriyama xeikia mepiwareku'eiri Kutseheni kwieyaritsie, yumuxatsima meta yuwakaitsixi.

⁹ Mepanutiyaxixia kaxetatetsie, kawayutsixi wahetsie me'utetita, waikawa 'ame'atayeuti mekaniuhukaitini.

¹⁰ Mekaneta'axiani hakewa Hatahari tiriku matihenatsie, mana Kurutani hatuxameyaritsie pehurakai. Mana Kutse 'atahuta tukari piyuiwieriekai paapaya mumiki.

¹¹ Kepauka kananeutsixi memiwaruxei meyuxeiriekame Hatahari maka'etsatsie me'utitsuaname, mipai mekaniutiuyuani: «'Ekipitutari hiwerika mepiwewie yemeki waikawa patsiekameki». 'Ayumieme mana, Kurutani meuhuratsie, mekatenuuteriwa 'Aweri-Mitsirahini.*

* 50:11 50:11 Hepirayuki 'Aweri-Mitsirahini panuyine 'ekipitutari wahiwerika.

12 Hiki mipai mekateniuyurieni Kakuwu niwemama kemitiwarutahiawekai meripaiti.

13 Mekaneikweni Kanani paiti, mana mekaneitateni terita Makipera kwieyaritsie, Mamire hixie, hiki Hewuruni mirakutewatsie, 'Apirahami meripaiti minanekai miki teri 'Epuruni Heti tewiyari 'ituirieku, 'Apirahami tiiriyamama wateukiya mayaniki.

14 Hiki Kutse kanakunuani 'Ekipitupai yupaapa hekateukuka, yu'iwama wahamatia, meyunaiti memeiweiyakai wahamatia.

Kutse kemitiwarunitia yu'iwama

15 Kakuwu 'ukumawereku, Kutse 'iwamama mipai mekateniyukuhawekaitini: «Xiari piha'a tahapaitsita. Xiari puyukihiani 'axaketemiyuri».

16 'Ayumieme mipai mekatenitani'airieni mipai mete'itahiaweke: «'Apaapa kamiweti 'akuxi mipai pitatiuhiritia:

17 “Mipai Kutse xeketeneutahiawi, kexereuyehiwirieka 'axakexemiyuri 'iwamama”. 'Ayumieme kwerietixia ketatineuyehiwirieka, tame 'apaapa Kaka'iyarieya te'uximayatametemama tepihiki».

Kepauka Kutse 'iki niuki mu'eni, kaniutatsuani.

18 Hiki 'iwamama mekaniu'axiani, mekaniu-tihixima'uni hixiena, mipai mekatenitahiawe:

—'Ena pepitatsiti'uitia, wairiyarika mate'uximayatsiriwamete tepihiki.

19 Kutse mipai katiniwarutahiawe:

—Xepikamamaka. Ne Kaka'iyari ne-maneyeitiwani nepikayawe.

20 Yuriki xeme xepinetsi'unanaimakai, peru Kakaiyari pipataxi 'aixia miti'aneki, yamitiyini hiki ketemiteneniere: yimiireti teiteri memikaheuyeweniki.

21 'Ayumieme, hiki xepikaheumamaka. Ne nepixeparewieka xeme meta xetiriyama.

Kutse mipai katiniwarunitiani, wanaki'eriet waikawa.

Kutse kemitiumi

22 Kutse meta paapaya tiriyamama 'Ekipitu kwieyaritsie mekaniuyuhayewa. Kutse xeitsienituyari heimana tamamata wiyari kaniutihuni,

23 kaniwaruxeiya 'Epirahini niwemama meta yututsima. Metatsiere Makixi niwemama yuniwema kaniwarayeitiani Manatsexi teukarimama.

24 Hiki 'arikemikake, Kutse mipai katiniwarutahiawe yu'iwama: «'Etsiwa xeikiari peuyewetse nemiminiki, peru Kakaiyari kanixeparewiekamiki, kanixe'ayewitimiki 'iki kwieyaritsie kanixe'anuwitimiki kwie 'Apirahami, 'Itsahaki meta Kakuwu miwaxatiakaitsie».

25 Hiki Kutse mipai katiniwaruhiritiani yuniwema: «Kaniyuritini Kakaiyari kanixeparewimiki. Kepauka mipai mitiyini 'ana ne'umeyarite xekananutikuni».

26 Kutse kaniumini xeitsienituyari heimana tamamata wiyari hexeiyati, 'Ekipitu kwieyaritsie. Waiyarieya me'uta'uayemaka waritsamu witsimu'aki, kakuni witsimi'anetsie mekanikateni.

**KAKAFYARI NIUKIEYA XAPAYARI
WIXARIKAKI**

**The Holy Bible in the in Huichol language of Mexico,
2020 edition**

**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3